

યોહાના લોખલી હારી ખોબાર પ્રસ્તાવના

યોહાના લોખલી હારી ખોબાર, યાહાટી લોખલાં ગીઅલાં આતા કા લોક ઈસુવોય બોરહો કોઅય હોકે (20 : 30-31), શુરવાતી વચન, પોરમેહેરાઆરે ઈસુ અનોખા સબંધા બારામાય જોર દેહે એને ઈ પ્રગટ કોઅહે કા ઈસુજ પોરમેહેર હેય, ઈ ચોપડી ઈસુવા દૈવીયતા દેખાડાહાટી આ હાત ચિન્હ-ચમત્કારાહાવોય દિયાન કેન્દ્રિત કોઅહે. ઈસુય લોકહાન અનંતજીવના વાયદો કોઅતા, આહાન આવોય બોરહો કોઅરાહાટી હાધા. આય લાજરસાલ જીવતો કોઅનાકોય ઈ સાબિત કોઅય દેના કા તો પોતે મોઅના એને મોઅલા માઅને જીવી ઉઠનાથી, જીવન દી હોકહે (અધ્યાય 11), યોહાન યે ચોપડીમાય ખ્રિસ્તા હાત “આંય હેય” ઈ વાત, નિકોદેમુસ એને સામરી થેએયે આરે હામ્મે-હામ્મે વાત કોઅના, આ શિક્ષણ જી આય ઉચલી ખોલ્યેમાય દેના એને શિષ્યહા પાગ દોવના (અધ્યાય 13-16), એને આ મોઠા યાજકા પ્રાર્થનાલ દર્શાવેહે (અધ્યાય 17). ઈ ચોપડી હારી ખોબારે હારી વાતહે સારાંશ બી 3:16 સામીલ કોઅહે, યે ચોપડી લોખનારો લેખક સંભવતઃ પ્રેષિત યોહાન હેય, એને ઈ ચોપડી લોખના સમય લગભગ ઇસવી સન 85 માય હેય.

પેલ્લા વચન આતા

¹ ઈ દુનિયા બોના પેલ્લા તો આતો, જ્યાલ વચન આખતેહે, એને તો પોરમેહેરાઆરે આતો એને તો પોરમેહેર આતો.

² તો દુનિયા બોના પેલ્લેથીજ પોરમેહેરાઆરે આતો.

³ બોદા દુનિયા આ કોઇન બોનાવ્યાં, એને બોદા દુનિયામાય આવોગાર કાયજ બોની નાંય હોક્યા.

⁴ તો બોદા જીવના ઝરો હેય, એને તોજ બોદા માઅહાન ઉજવાડો દેહે.

⁵ તો ઉજવાડો આંદારામાય ચોમકેહે એને આંદારાં આલ ઉલવી નાંય હોક્યા.

⁶ પોરમેહેરાય યોહાન નાંવા ચોક માઅહાલ દોવાડ્યો.

7 યોહાન સાક્ષી દાંહાટી યેનો, કા તો ઉજવાડા બારામાય સાક્ષી દેય, કા બોદે ય્યા સાક્ષી લીદે ઉજવાડાવોય બોરહો કોઅે.

8 યોહાન પોતે ઉજવાડો નાંય આતો, બાકી ઉજવાડા બારામાય સાક્ષી દાંહાટી યેનલો આતો.

9 તો હાચ્યો ઉજવાડો હેય, તો બોદા માઅહાન ઉજવાડો દેહે, તો દુનિયામાય યેનારો આતો.

10 તો દુનિયામાય આતો, એને દુનિયા ય્યા કોઇન બોનાવલા આતા, બાકી દુનિયા લોકહાય ય્યાલ નાંય વોળખ્યો.

11 તો પોતાના લોકહામાય યેનો, બાકી પોતાના લોકહાય ય્યા સ્વીકાર નાંય કોઅયો.

12 બાકી જોલા લોકહાય ય્યા સ્વીકાર કોઅયો, એટલે ય્યાવોય બોરહો કોઅયો ય્યાહાન યે પોરમેહેરા પોહે બોના ઓદિકાર દેનો.

13 ય્યાહા જન્મો આયહે આબહા ઇચ્છાકોય નાંય, કા યોકા માઅહા પોહા પૈદા કોઅના મોરજયેકોય નાંય, કા માઅહા ઇચ્છાકોય નાંય જાયો, બાકી પોરમેહેરા પાયને જન્મો જાયો.

14 એને વચન યોક માઅહું બોન્યો, એને મોયા એને હાચ્યાયેકોય પરિપૂર્ણ ઓઇન આપહેમાય વોહતી કોઅયી, એને આમહાય ય્યા મહિમા એઅઇ, જું પોરમેહેર આબા પાયને યેનલા યોકને-યોક પોહા મહિમા.

15 યોહાને ય્યા બારામાય સાક્ષી દેની, એને બોબલીન આખ્યાં, “ઓ તોજ હેય, જ્યા બારામાય માયે આખલા આતા કા, મા પાછે જો યેનારો હેય, તો મા કોઅતો મહાન હેય, કાહાકા તો મા કોઅતો પેલ્લા આતો.”

16 કાહાકા ય્યા સદા મોયા પરિપૂર્ણતા કોય આપા બોદહાન બોરકાત વોય બોરકાત મીળહી.

17 કાહાકા નિયમશાસ્ત્ર મૂસાકોય દેનલા આતા બાકી પોરમેહેરાય ઈસુ ખ્રિસ્તાકોય સદા મોયા એને હાચ્યાઇ દેખાડી.

18 પોરમેહેરાલ કાદે દેખ્યહો નાંય, બાકી પોરમેહેરા યોકનેયોક પોહો ય્યા પોરમેહેરા પાહાય રોહે, ચ્યેય ય્યાલ પ્રગટ કોઅયા.

યોહાન બાપતિસ્મા દેનારા સાક્ષી
(માથ્થી 3:1-12; માર્ક 1:1-8; લુક. 3:1-18)

19 જોવે યહૂદી આગેવાનહાય યેરૂસાલેમ શેહેરામાઅને યાજક એને લેવીયાહાન યોહાનાલ ઈ પુછા દોવાડયા કા, “તું કું હેતો?” તોવે યોહાના સાક્ષી ઈ.

20 યોહાને સાફ કબુલ કોઅયા, “આંય ખ્રિસ્ત નાંય હેતાઉ.”

21 તોવે ચ્યાહાય યોહાનાલ પુછ્યાં, “તે પાછે તું કું હેતો? કાય તું એલીયા ભવિષ્યવક્તા હેય?” યોહાને જવાબ દેનો કા “આંય નાંય હેય” “તે કાય તું તો ભવિષ્યવક્તો હેય, જો યેનારો હેય?” યોહાને જવાબ દેનો, “આંય નાંય હેય.”

22 તોવે ચ્યાહાય યોહાનાલ પુછ્યાં, “પાછે તું કું હેતો? કા આમા આમહાન દોવાડનારાહાન જવાબ દેજે, તું પોતાના બારામાય કાય આખતોહો?”

23 યોહાને આખ્યાં, “જેહેકોય યશાયા ભવિષ્યવક્તાયેબી લોખ્યાં, ‘ઉજાડ જાગામાય યોહાન બૉબલીન આખહે કા પ્રભુ યેયના વાટ હિંદી કોઆ.’ ”

24 કોલહાક લોક પોરૂષી લોકહાપાઅને દોવાડલા આતા.

25 તોવે ચ્યાહાય યોહાનાલ પુછ્યાં, “જોવે તું ખ્રિસ્ત નાંય હેતો, તું એલીયા નાંય હેતો એને તો ભવિષ્યવક્તા બી નાંય હેય, તે તું લોકહાન બાપતિસ્મા કાહા દેતહો?”

26 યોહાને ચ્યાહાન જવાબ દેનો, “આંય તે પાઆયાકોય તુમહાન પાપ કોઅના બંદ કોઅરાહાટી બાપતિસ્મા દેતહાવ, બાકી તુમા જ્યાલ વોળખેત નાંય ઓહડો ચોક માઅહું તુમહે વોચમાય ઉબલો હેય.

27 ઓ તોજ હેય, જો મા પાછે યેનારો હેય, આંય તે ચ્યા ચાકાર બોનીન ચ્યા ખાઅડા હુતળી છોડાબી લાયકે નાંય હેય.”

28 ચો બોધો વાતો ચારદેન નોયે અમેરે બેથાનીયા ગાવામાય બોન્યો, તાં યોહાન લોકહાન બાપતિસ્મા દેતો આતો.

પોરમેહેરા ગેટો

29 બીજે દિહી યોહાને ઈસુવાલ ચ્યાપાય ચેતા એઇન આખ્યાં, “એઆ, ઓ પોરમેહેરા ગેટો હેય, જો દુનિયા લોકહા પાપ દુઉ કોઅહે.

30 ઓ તોજ હેય, જ્યા બારામાય માયે આખ્યેલ કા, મા પાછે ચોક યેનારો હેય, જો મા કોઅતો મહાન હેય, કાહાકા તો મા કોઅતો પેલ્લો આતો.

31 એને આંય તે ચ્યાલ નાંય વોળાખતો આતો કા તો ખ્રિસ્ત હેય, બાકી ઈસરાયેલ લોકહાન ઈ આખાહાટી કા તો કું હેય, આંય પાઅયા કોઇન બાપતિસ્મા દેતો યેનો.”

32 યોહાને ઈ સાક્ષી દેયન આખ્યાં, “માયે પવિત્ર આત્માલ કબુતરા રોકા આકાશમાઅને ચ્યાવોય ઉતતા એઅયા, એને ચ્યાવોય ઠોરી ગીયા.

33 આંય ચ્યાલ નાંય વોળાખતો આતો કા તો ખ્રિસ્ત હેય, બાકી જ્યાંય માન પાઅયા કોઇન બાપતિસ્મા દાંહાટી દોવાડયો, ચ્યે માન આખ્યેલ કા, ‘તું પવિત્ર આત્માલ જ્યાવોય ઉતતો એને થોબતો એઅહે, તોજ પવિત્ર આત્માકોય બાપતિસ્મા દેનારો હેય.’

34 માયે ઈ પોતે એઅયા એને આંય સાક્ષી દેતહાવ કા, ઓ પોરમેહેરા પોહો હેય.”

ઈસુવા પેલ્લા શિષ્યા

35 બીજે દિહી યોહાન ચ્યા બેન શિષ્યહાઆરે ઉબો આતો.

36 ઈસુ તાં જાય રિઅલો આતો, એને ઈસુ એછે એઇન યોહાને આખ્યાં, “એઆ, ઓ પોરમેહેરા ગેટો હેય.”

37 તોવે યોહાનાલ એહેકેન આખતો વોનાઈન ચ્યા બેન શિષ્ય ઈસુવા પાહલા જાં લાગ્યા.

38 તોવે ઈસુવે ફિરી એઇન ચ્યાહાન પાહલા ચેતા દેખ્યા તોવે ચ્યાહાન આખ્યાં, “તુમા કાલ હોદતાહા?” ચ્યાહાય ઈસુલ આખ્યાં, “ઓ ગુરુજી*, તું કેછ રોતહો?”

39 ઈસુવે ચ્યાહાન આખ્યાં, “ચાલા, તે એઇ લીયા.” તોવે ચ્યા ઈસુઆરે ગીયા એને તો કેછ રોહોય તીં ચ્યાહાય એઅયા એને તોદહી ઈસુઆરે રિયા, ચ્યે સમયે લગભગ વોખાતેહે ચાર વાગલે આર્તે.

40 યોહાના આખલ્યા વોનાઈન ઈસુ પાહલા જ્યા બેન જાંઆ ગીઅલા આતા, ચ્યાહામાઅને ચોક જાંઆ સિમોન પિત્તરા બાહા આંદ્રિયાસ આતો.

* 1:38 રબ્બી

41 આંદ્રિયાસ પેલ્લા ચ્યા બાહા સિમોનાલ મિળ્યો એને ચ્યાલ આખ્યાં, “આમહાન ખ્રિસ્ત એટલે મસીહા, મિળી ગીયહો.”

42 આંદ્રિયાસ સિમોનાલ ઈસુવાપાય લેય ગીયો, ઈસુવે ચ્યાએછે એઇન આખ્યાં, “તું યોહાના પોહો સિમોન હેય, આમી પાછે તો નાંવ કેફા મતલબ પિત્તર રોય.”

ફિલિપ એને નતનએલાલ હાદના

43 બીજે દિહી ઈસુવે ગાલીલ ભાગા એછે જાઅના વિચાર કોઅયો, તોવે ફિલિપ ચ્યાલ મિળ્યો, તોવે ઈસુવે ચ્યાલ આખ્યાં, “મા શિષ્ય બોન.”

44 ફિલિપ તે આંદ્રિયાસ એને પિત્તરા ગાવા બેતસાદા ગાવા રોનારો આતો.

45 ફિલિપાલ નતનએલ મિળ્યો તોવે ચ્યાલ આખ્યાં, “આમહાન તી માઅહું મિળ્યહા, જ્યા બારામાય મૂસા નિયમશાસ્ત્ર માય એને ભવિષ્યવક્તાહાય લોખલાં આતા, તો નાજરેત ગાવામાઅને યોસેફા પોહો ઈસુ હેય.”

46 નતનએલે ફિલિપાલ પુછ્યાં, “કાય કાદી હારી વસ્તુ બી નાજરેત ગાવામાઅને નિંગી હોકતી હેય કા?” ફિલીપાય નતનએલાલ જવાબ દેનો, “તું યેઇન એઈલે.”

47 ઈસુવે નતનએલાલ ચ્યાપાય યેતો એઇન ચ્યા બારામાય આખ્યાં, “એઆ, ઓ હાચ્યો ઈસરાયેલી હેય, ચ્યામાય કાયજ જુઠા નાંય મીળે.”

48 નતનએલાય ઈસુલ પુછ્યાં, “તું માન કેહેકે વોળાખતોહો?” ઈસુવે ચ્યાલ જવાબ દેનો, ચ્યા પેલ્લા કા ફિલિપે તુલ હાધો, “જોવે તું અંજીરા જાડા તોળે આતો, તોવે તુલ માયે દેખ્યેલ.”

49 તોવે નતનએલાય ઈસુલ આખ્યાં, “ઓ ગુરુજી, તું પોરમેહેરા પોહો હેય, તું ઈસરાયેલ દેશા મહારાજા હેય.”

50 ઈસુવે ચ્યાલ આખ્યાં, “કાય તું બોરહો યાહાટી કોઅતોહો કા માયે તુલ ઈ આખ્યાં કા માયે તુલ અંજીરા જાડા તોળે દેખ્યો? તું યા કોઅતા મોઠે-મોઠે કામે એઅહે.”

51 પાછે ઈસુવે ચ્યાલ આખ્યાં, “આંચ તુમહાન હાચ્યાં-હાચ્યાં આખતાહાવ કા, હોરગા ઉગડી જાતા એને પોરમેહેરા હોરગા દૂતહાન માઅહા પોહાવોય ઉતતા એને ઉચે જાતા એએહા.”

2

કાના ગાવામાય વોરાડ

1 ચ્યા પાછે તીજે દિહી ગાલીલ ભાગા કાના ગાવામાય ચોક વોરાડ આતા, ઈસુવા આયહો બી તાં આતી.

2 ઈસુ એને ચ્યા શિષ્યબી વોરાડામાય નિમંત્રિત કોઅલા આતા.

3 જોવે દારાખા રોહો પારવાઈ ગીયો તોવે ઈસુવા આયહે ચ્યાલ આખ્યાં, “ચ્યાહાપાય દારાખા રોહો ઘોટી ગીયહો.”

4 ઈસુવે ચ્યેલ આખ્યાં, “આયા, તું માન કાહા આખતીહી? ખ્રિસ્તા રુપામાય મા વોળાખ કોઆહાટી આજુ મા સમય નાંચ ચેનહો.”

5 બાકી ઈસુવા આયહે ચાકારાહાન આખ્યાં, “તો જહે આખે તેહે કોઆ.”

6 તાં ચહુદીયાહા ધાર્મિક નિયમા પરમાણે આથ દોવના રુડી આતી, એહેકેન કોઅરાહાટી ચ્યાહાય દોગડા છ વેંડલે થોવલે આર્તે, ચોકા ચોકામાય બેબુન, તીતુન મણ (ચોક મણ = વિહી લીટર લગભગ) પાઆઈ બોઆય એહેકેન ચ્યે આર્તે.

7 ઈસુવે ચાકારાહાન આખ્યાં, “વેંડલાહામાય પાઆય બોઆ” ચ્યાહાય ઉપે લોગુ બોઓઈ દેના.

8 પાછે ઈસુવે ચાકારાહાન આખ્યાં, “આમી કાડા એને ખાઅના કારબાર્યા પાય લેય જાયા” ચ્યા લેય ગીયા.

9 એને ખાઅના કારબાર્યાય દારાખા રોહો બોની ગીઅલા પાઆય ચાખ્યાં, આજુ ઓ દારાખા રોહો કંછને હંચ તી તો નાંચ જાંઅતો આતો, બાકી જ્યા ચાકારાહાય પાઆય કાડયેલ ચ્યા જાઅતા આતા, તોવે કારબાર્યે વોવડાલ હાદિન, ચ્યાલ આખ્યાં.

10 “કાદાબી માઅહું હારો દારાખા રોહો પેલ્લા પીયાંહાટી દેહે, જોવે બોદા લોક દારાખા રોહો પીન મોરસાય જાતહા, તોવે બોદહાય પિદાં પાછે ઓળકો દારાખા રોહો પિયાં દેહે, બાકી તુચે હારો દારાખા રોહો આમી લોગુ રાખી થોવ્યહો.”

11 ઈસુય ગાલીલ ભાગા કાના ગાવામાય ય્યા ચમત્કારહા શુરવાત કોઈન ય્યા મહિમા કોઅયી, એને ય્યા શિષ્યહાય ય્યાવોય બોરહો કોઅયો.

12 ય્યા પાછે ઈસુ એને ય્યા આયહો, ય્યા બાહા, એને ય્યા શિષ્ય કાપરનાહુમ ગાવામાય ગીયે એને તાં વોછા દિહી રિયે.

દેવાળામાઅને વેપાર્યાહાન બાઆ કાડના
(માથ્થી 21:12-13; માર્ક 11:15-17; લુક. 19:45-46)

13 જોવે ચહૂદીયાહા પાસ્કા સણા વોછા દિહી રિયા તોવે ઈસુ ચેરૂસાલેમ શેહેરામાય ગીયો.

14 દેવાળામાય ય્યે ડોર્બે, ગેર્ટે, એને કબુતર વેચનારાહાલ એને પોયહા બોદલી દેનારાહાન બોઠલા દેખ્યા.

15 તોવે ય્યે આસડેકોઈન ચોક ચોપકો બોનાવ્યો, એને બોદા ડોબહાન એને ગેટહાન દેવાળામાઅને બાઆ ફાડી દેના એને પોયહા બોદલી દેનારાહા પોયહા ય્યે વેરી દેના, ય્યાહા ટેબાલ કોથલાડી દેના.

16 એને કબુતર વેચનારાહાલ ય્યે આખ્યાં, “યાહાન બાઆ લેય જાયા, એને મા આબહા દેવાળાલ આટ બાઆના ગુઉ મા બોનાવાહા.”

17 તોવે ય્યા શિષ્યહાન યાદ યેના ફા એહેકોય લોખલાં હેય કા? “તો ગોઆ ભક્તિ મા આંદાર આગડા રોકી હોલગેહ.”

18 તોવે ચહૂદીયાહા આગેવાનહાય ય્યાલ આખ્યાં, “તું આમહાન કોઅહા ચિન્હ દેખાડી હોકતોહો, જ્યેકોય આમા ઈ જાઈ હોકજે કા તુલ એહેકેન કોઅના ઓદિકાર હેય?”

19 ઈસુવે ય્યાહાન જાવાબ દેનો, “ઈ મંદિર તોડી પાડા, એને આંચ તીન દિહામાય પાછો બોનાવી દિહી.”

20 ચહૂદીયાહા આગેવાનહાય ય્યાલ આખ્યાં, “ઈ દેવાળા બાંદતા છૅતાળી વોરહે લાગ્યે, એને કાય તું ય્યાલ તીન દિહાહામાય બોનાવી દેહે?”

21 બાકી ઈસુ ય્યા શરીરાલ દેવાળા રુપામાય વાત કોઈ રિઅલો આતો.

22 યાહાટી ઈસુવા મોઅલા માઅને પાછો જીવી ઉઠના પાછે શિષ્યહાન ય્યા ઈ વાત યાદ યેની. એને ય્યાહાય પવિત્રશાસ્ત્ર એને ઈસુ આખલા વચનાવોય બોરહો કોઅયો.

ઈસુ માઅહા મોન જાંઅહે

23 જોવે ઈસુ ચેરસાલેમ શેહેરામાય પાસ્કા સણામાય આતો, તોવે બોજ લોકહાય ચ્યા ચમત્કારાહાલ એઇન ચ્યાવોય બોરહો કોઅયો.

24 બાકી ઈસુય બોરહો નાંચ કોઅયો કા ચ્યાહાય ઈસુવોય બોરહો કોઅલો હેય, કાહાકા તો બોદા માઅહા મોના વિચાર જાંઅતો આતો.

25 ચ્યાલ કાદા માઅહા ગોરાજ નાંચ આતી કા, માઅહા બારામાય ચ્યાલ આખે, કાહાકા તો જાંઅતો આતો કા માઅહા મોનામાય કાય હેય?

3

ઈસુ એને નિકોદેમુસ

1 નિકોદેમુસ નાંવા ચોક માટડો આતો, તો ચહૂદીયાહા મોઠી સોબાયે આગેવાન આતો, તો ચોક પોરૂષી બી આતો.

2 તો રાતી ઈસુવાપાય યેનો, એને ચ્યાલ આખ્યાં કા, “ઓ ગુરુજી, આમહાન ખોબાર હેય કા, પોરમેહેરાય તુલ આમહાન હિકાડાંહાટી દોવાડલો હેય, કાહાકા જ્યા ચમત્કાર તું કોઅતોહો, જોવે પોરમેહેર ચ્યાઆરે નાંચ રોય તોવે ચ્યા ચમત્કાર કાદાં માઅહું નાંચ દેખાડી હોકે.”

3 ઈસુવે ચ્યાલ જાવાબ દેનો, “આંચ તુલ હાચ્યાં-હાચ્યાં આખતાહાવ, જોવે માઅહું પાછો જન્મો નાંચ લેય તે પોરમેહેરા રાજ્ય નાંચ એઇ હોકે.”

4 નિકોદેમુસે ચ્યાલ આખ્યાં, “માઅહું ડાઆયા ઓઈ ગીયા, પાછે કેહે કોઇન જન્મો લેય હોકે? તો પાછો ચ્યા આયહે બુકામાય ઉરાઈન પાછો જન્મો લેય હોકહે કા?”

5 ઈસુવે જવાબ દેનો, “આંચ તુલ હાચ્યાં-હાચ્યાં આખતાહાવ, જોવે માઅહું પાઅયા કોઇન એને પવિત્ર આત્માકોય જન્મો નાંચ લેય તોવે તો પોરમેહેરા રાજ્યામાય નાંચ પ્રવેશ કોઅઇ હોકે.

6 કાહાકા માઅહા પાઅને જન્મો શારીરિક જન્મો હેય, એને પવિત્ર આત્માપાઅને જન્મો તો નોવો જન્મો હેય.

7 તું નોવાય નાંચ પામા જોજે, માયે તુલ આખ્યાં કા, તુલ નોવો જન્મો લેઅના જરૂરી હેય.

૮ જું માઅહું પવિત્ર આત્માકોય જોન્મુલા હેય તો વારા હારખો હેય, વારો ગોમે તાં જાહાય, ચ્યા આવાજ તું વોનાતોહો, બાકી તો કેછને ચેહે એને કેછ જાહાય, તી તુલ ખોબાર નાંય પોડે.”

૯ નિકોદેમુસે ચ્યાલ પુછ્યાં, “ઈ કેહેકેન શક્ય હેય?”

૧૦ ઈસુવે જવાબ દેનો, “તું ઈસરાયેલ લોકહા ગુરુ હેય, તુલ ચો વાતો હોમજી જાં જોજે.”

૧૧ આંય તુલ હાર્યાં-હાર્યાં આખતાહાવ, આમા જું જાંઅજેહે તીંજ આખજેહે, એને આમહાય જું એઅયા ચ્યા સાક્ષી દેજહે, બાકી આમા જું આખજેહે ચ્યાવોય તુમા બોરહો નાંય કોઅેત.

૧૨ જોવે તુમહાન માયે દુનિયામાઅને વાત આખી તોવે ચ્યેવોય તુમા બોરહો નાંય કોઅેત, તો જોવે હોરગા બારામાય વાત આખું, તોવે ચ્યાવોય તુમા કેહેકે બોરહો કોઅહા?

૧૩ કાદાં માઅહું હોરગામાય નાંય ગીયહા બાકી કેવળ આંય, માઅહા પોહો હોરગામાઅને નિચે ઉતી ચેનહો.

૧૪ એને જેહેકેન મૂસાય જાડયેમાય પિતળા હાપડાલ ઉચે ચોડવ્યો, તેહે કોઅઈન માન, માઅહા પોહાલ બી ઉચે ચોડાવના જરુરી હેય.

૧૫ યાહાટી કા, જું માઅહું માયેવોય બોરહો કોઅહે ચ્યાલ અનંતજીવન મિળહે.

૧૬ “પોરમેહેરે દુનિયા લોકહાવોય ઓહડા મહાન પ્રેમ કોઅયા, યા લીદે ચ્યા ચોકને-ચોક પોહાલ બલિદાન કોઈ દેનો, યાહાટી કા જું કાદાં માઅહું ચ્યાવોય બોરહો કોઅહે, ચ્યા નાશ નાંય ઓઅય, બાકી ચ્યાલ અનંતજીવન મીળે.

૧૭ કાહાકા પોરમેહેરે ચ્યા પોહાલ દુનિયા લોકહાવોય ડોંડ દાં નાંય દોવાડયો, બાકી ચ્યાકોય દુનિયા લોકહા તારણ કોઅરાહાટી દોવાડયો.

૧૮ જું માઅહું પોરમેહેરા પોહાવોય બોરહો કોઅહે, ચ્યાલ ડોંડ નાંય દી, બાકી જું માઅહું પોરમેહેરા પોહાવોય બોરહો નાંય થોવે, તો ડોંડ બોગવી ચુકલો હેય, કાહાકા ચ્યે પોરમેહેરા ચોકને-ચોક પોહાવોય બોરહો નાંય કોઅયો.

૧૯ એને ડોંડ દેઅના કારણ ઈજ હેય કા, ઉજવાડો દુનિયામાય ચેનો,

બાકી લોકહાય ઉજવાડા કોઅતા આંદારાલ પોસાન કોઅયા, કાહાકા ચ્યાહા કામે ખારાબ આતે.

20 કાહાકા જીં માઅહું ખારાબ કામ કોઅહે, તી ઉજવાડા વિરુદ્ધ કોઅહે, એને ચ્યા ખારાબ કામહા ખોબાર નાંચ પોડા જોજે યાહાટી તી ઉજવાડામાય નાંચ ચેય.

21 બાકી જીં માઅહું હાચ્યાચેવોય ચાલહે, તી ઉજવાડા પાય ચેહે, કા ચ્યા કામહા ખોબાર પોડે જ્યે પોરમેહેરા ઇચ્છાકોય કોઅલે હેય.”

ઈસુવા બારામાય યોહાન સાક્ષી

22 ચ્યા પાછે ઈસુ એને ચ્યા શિષ્ય યહૂદીયા વિસ્તારામાય ચેના, એને તો તાં ચ્યાહાઆરે રોઇન બાપતિસ્મા દાં લાગ્યો.

23 તોવે યોહાનબી એનોન ગાવામાય જીં સામરિયા ભાગા સાલેમ ગાવા પાહાય હેય, તાં બાપતિસ્મા દેતો આતો. કાહાકા તાં બોજ પાઆઈ આતા એને લોક ચ્યાપાય ચેઇન બાપતિસ્મા લેતે આતે.

24 કાહાકા યોહાન ચે સમયે લોગુ જેલેમાય નાંચ કોડલો આતો.

25 તાં યોહાના શિષ્યહા કાદા યહૂદી માઅહા આરે યહૂદીયાહા ધાર્મિક નિયમા પરમાણે આથ દોવના રુડી બારામાય બોલાબોલી જાયી.

26 તોવે યોહાના શિષ્યહાય યોહાનાપાય જાયને આખ્યાં, “ઓ ગુરુ, જીં માઅહું યારદેન નોચે ચ્યેમેરે ચ્યાહા આરી આતો, જ્યા બારામાય તુચે આખ્યેલ, એએ, તો આમી બાપતિસ્મા દેહે, એને બોદે ચ્યાપાય જાતહે.”

27 યોહાને જાવાબ દેનો, “જાવ લોગુ માઅહાલ હોરગામાઅને નાંચ દેનલા જાય, તાંવ લોગુ માઅહું કાય નાંચ મેળવી હોકે.

28 તુમહાય પોતે માન આખતા વોનાયાહા, આંચ ખ્રિસ્ત નાંચ હેતાઉ, બાકી ચ્યા પેલ્લા દોવાડલો હેતાઉ.”

29 વોવડો વોવડી આરે વોરાડ કોઅઇ લેહે, બાકી વોવડા આચો જો ચ્યાપાય ઉબો રોઇન ચ્યા આવાજ વોનાઈન આનંદ કોઅહે, તેહેકેન મા લીદે બી આનંદકોય બોઆય ગીયા.

30 તો બોજ મહત્વપૂર્ણ ઓઈ જાં જોજે, એને આંચ વોછો મહત્વપૂર્ણ બોનુ.

31 “જો હોરગામાઅને ચેહે, તો બોદહા કોઅતો મહાન હેય, જો દોરત્યેવોયને ચેહે તો દોરત્યેવોયને હેય એને દોરતીજ વાતો કોઅહે, એને જો હોરગામાઅને ચેહે તો બોદહા ઉચે હેય.

32 જીં કાય ચ્યાય એઅયા, એને વોનાલો હેય, ચ્યાજ સાક્ષી દેહે, એને બોજ વોછા લોક ચ્યા સાક્ષીવોય બોરહો કોઅતાહા.

33 બાકી જીં માઅહું ચ્યા સાક્ષી માનહે તો સાબિત કોઅહે કા, પોરમેહેર હાચ્યો હેય.

34 કાહાકા, જ્યાલ પોરમેહેરે દોવાડયો તો પોરમેહેરા વાત આખહે, કાહાકા પોરમેહેર ચ્યાલ બો બોદા પવિત્ર આત્મા દેહે.

35 પોરમેહેર આબહો પોહાવોય પ્રેમ કોઅહે, એને બોધોજ વસ્તુ ચ્યા તાબામાંય દેય દેનહા.

36 જીં માઅહું પોરમેહેરા પોહાવોય બોરહો કોઅહે, અનંતજીવન ચ્યાજ હેય, બાકી જીં પોરમેહેરા પોહાવોય બોરહો નાંય કોએ, ચ્યાલ અનંતજીવન નાંય મીળે, બાકી પોરમેહેરા ડોંડ ચ્યાવોય બોની રોય.”

4

ઈસુ એને સમરૂની થેએ

1 ઈસુ યોહાના કોઅતા વોદારે શિષ્ય બોનાડીન ચ્યાહાન બાપતિસ્મા દેહે. ઈ પોરૂષી લોકહાન ખોબાર ઓઈ ગીયહી, એહેકેન જોવે પ્રભુ ઈસુલ ખોબાર પોડ્યા.

2 ઈસુ પોતે નાંય બાકી ચ્યા શિષ્ય બાપતિસ્મા દેતા આતા.

3 તોવે તો યહૂદીયા ભાગ છોડીન, પાછે પોતાના શિષ્યહાઆરે પાછો ગાલીલ ભાગા એછે જાતો રિયો.

4 એને ચ્યાલ સમરૂન ભાગામાય રોઇન જાઅના જરૂરી આતા.

5 યાહાટી તો સમરૂન ભાગામાઅને સુખાર ગાવામાય યેનો, જીં ચ્યા જાગા પાહે હેય જ્યાલ યાકૂબાય ચ્યા પોહો યોસેફાલ દેનલો આતો.

6 એને યાકૂબાય ખોદેલ તી વેઅેય બી તાંજ આતી, એને ઈસુ વાટે ચાલતા-ચાલતા થાકી ગીયેલ તોવે તો વેઅેયે વોય જાઅન બોઠો, એને ઈ વાત બોપાર સમયે જાચી.

7 ચે સમયે યોક સમરૂન ભાગામાય રોનારી યોક થેએ પાઆઈ બોઅરા યેની ઈસુવે ચ્યેલ આખ્યાં, “માન પાઆઈ પાજ.”

8 ચે સમાયે ચ્યા શિષ્ય ગાવામાય ખાઅના વેચાતાં લાં ગીઅલા આતા.

9 તોવે ચ્યે સમરૂની થેઅચે ચ્યાલ આખ્યાં, “તું ચોક યહૂદી હેય, એને આંચ સમરૂની થેઅ હેત્યાંવ, તે તું માપાયને પીયાંહાટી કાહા પાઆઈ માગતોહો?” કાહાકા યહૂદી લોક સમરૂની લોકહાઆરે કોઅહોજ વ્યવહાર નાંચ રાખેત.

10 ઈસુવે ચ્યેલ જાવાબ દેનો, “તું નાંચ જાંઅ કા પોરમેહેર તુલ કાય દાં માગહે, એને તું નાંચ જાંઅ કા કું તોવોય પાઆય માગહે. જોવે તું જાઅતી, તે તું માવોઅને ચ્યાલ માગતી એને આંચ તુલ પાઆય દેતો જું જીવન દેહે.”

11 ચ્યે થેઅચેય ચ્યાલ આખ્યાં, “ઓ માલિક, તોપાય પાઆઈ બોઅના હાટી કાય સાદાન નાંચ હેય, એને વેઅચેય બોજ ઉડી હેય, તે તુયેપાય પાઆઈ કેછને યેના જું જીવન દેહે?”

12 કાય તું આમહે વડીલ યાકૂબા કોઅતો મોઠો હેય, ચ્યેજ આમહાન ઈ વેઅચે દનહી, એને ચ્યે પોતે એને ચ્યા પાહાહાય એને ડોબહાય પિદાં?”

13 ઈસુવે ચ્યેલ જાવાબ દેયન આખ્યાં, “જું માઅહું યા પાંઅયામાંઅને પિયે, તો પાછો પિહો ઓરી.

14 બાકી આંચ જું પાઆય દિહી, તાંમાઅને જું માઅહું પીચી, તો કાદે દિહે પિહો નાંચ ઓરી, બાકી જું પાઆઈ આંચ દિહી, તો ચ્યામાય ચોક ઝરો બોની જાય, જું ચ્યાલ અનંતજીવન દેઅરી.”

15 ઈ વોનાયને ચ્યે થેઅચે ચ્યાલ આખ્યાં, “ઓ માલિક, માન પીહી નાંચ લાગે એને નાંચ પાઆઈ બોઅરાહાટી ઓલે દુઉ યા પોડે યાહાટી તી પાઆઈ માન દે.”

16 ઈસુવે ચ્યેલ આખ્યાં, “જો, તો માટડાલ હાદી લેય ચે.”

17 થેઅચે જવાબ દેનો, “આંચ વોગાર માટડા હેય” ઈસુય ચ્યેલ આખ્યાં, “તુયે હાચ્યાં આખ્યાં, ‘આંચ વોગાર માટડા હેય.’

18 કાહાકા તુયે પાય માટડાહાન રાખ્યા, એને આમી હેય, તોબી તો માટડો નાંચ, ઈ તુયે હાચ્યાં આખ્યાં.”

19 થેઅચેય ઈસુલ આખ્યાં, “ઓ માલિક, આંચ જાંઆઈ ગિઇ તું ભવિષ્યવક્તા હેતો.

20 આમહે આગલ્યા ડાયહાય યાજ ડોગાવોય ભક્તિ કોઅચી, એને

તુમા યહૂદી લોક આખતાહા કા, યેરૂસાલેમ શેહેરુજ તો જાગો હેય જાં ભક્તિ કોઅરા જોજે.”

21 ઈસુય એલ આખ્યાં, “ઓ બાઈ, તું મા વાતવોય બોરહો કોઓ કા એહેકેન સમય યેય રોયહો કા તુમા યા ડોગાવોય એને યેરૂસાલેમ શેહેરામાયબી પોરમેહેર આબહા ભક્તિ નાંય કોઈ હોકહા.

22 તુમા સમરૂની લોક જ્યાલ નાંય વોળખે ય્યા ભક્તિ કોઅતેહે, એને આમા યહૂદી લોક જ્યાલ જાંઅજેહે, ય્યા ભક્તિ કોઅતેહે, કાહાકા તારણ યહૂદીયાહા માઅને હેય.

23 બાકી તો સમય યેય રિયહો, બાકી યીજ ગીયહો, જોવે હાચ્યાં ભક્ત પોરમેહેર આબા ભક્તિ આત્માથી એને હાચ્યાયેથી કોઅરી, કાહાકા પિતા ય્યાહાટી ઓહોડાજ ભક્તિ કોઅનારાહાન હોદહે.

24 પોરમેહેર આત્મા હેય, યાહાટી જરૂરી હેય કા ય્યા ભક્તિ કોઅનારે આત્મા એને હાચ્યાયેથી ભક્તિ કોઅે.”

25 થેઅયેય ઈસુલ આખ્યાં, “આંય જાઅત્યાહાવ કા મસીહ જો ખ્રિસ્ત આખાયેહે, યેનારો હેય, જોવે તો યી, તો આમહાન બોદો વાતો આખી દી.”

26 ઈસુવે એલ આખ્યાં, “આંય જો તોઆરે બોલી રિયહો તોજ હેતાંવ.”

શિષ્યહા યેયના

27 ઓલહામાય ય્યા શિષ્ય યેય ગીયા, એને ય્યા નોવાય પામા લાગ્યા કા તો થેઅયે આરે બોલહે, બાકી કાદે નાંય પુછ્યાં, કા “તુલ કાય જોજે?” કા “કાયલા તું યે આરે બોલતો આતો?”

28 તોવે તી થેઅ વેડલા તાંજ છોડીન ગાવામાય ગિઇ, એને લોકહાન આખા લાગી.

29 “ઈહીં યા, માયે કોઅલા બોદા કાય આખી દેના, ય્યા માઅહાલ એઆ, કાય ઓજ તો ખ્રિસ્ત નાંય હેય?”

30 તોવે યે ગાવામાઅને નિંગીન ઈસુલ એઅરા ય્યાપાય યેતે લાગ્યે.

31 ઓલહામાય ઈસુ શિષ્ય ય્યાલ વિનાંતી કોઅરા લાગ્યા, “ઓ ગુરુજી, વાયજ ખાય લે.”

32 બાકી ઈસુય ય્યાહાન આખ્યાં, “માયેપાંય ઓહડા ખાઅના હેય, જ્યાલ તુમા નાંય જાંઅત.”

33 શિષ્ય ચ્યાહામાય આખતા લાગ્યા કા, “કાય કાદો ચ્યાહાટી ખાઅના લેય ચેનલો હેય?”

34 ઈસુવે ચ્યાહાન આખ્યાં, “મા ખાઅના પોરમેહેરા મોરજી પાલન કોઅના હેય જ્યે માન દોવાડયો, એને ચ્યા કામાલ પુરાં કોઅના હેય, જીં માન હોપલા હેય.

35 આજી ચાર મોયના બાકી હેય, પાછે વાડણી યી, એહેકોય તુમા આખતાહા નાંય કા? એઆ, આંય તુમહાન આખતાહાવ, તુમહે ડોળા ઉઠાવીન રાનહાન એઆ, કા ચ્યે વાડણીહાટી પાકી ગીઅલે હેય.

36 એને પેલ્લેથીજ વાડનારે કામ કોઈ રીઅલે હેય એને ચ્યાહા મજરી મેળવી રીઅલે હેય, એને ચ્યે યે હેય, ચ્યે ચ્યા લોકહાન બેગે કોઈ રીઅલે હેય જ્યે અનંતજીવન મેળવી.

37 કાહાકા ઈ વાત ઈહીં હાચ્ચી પોડહે કા, ‘ચોક વોઅહે એને વાડહે બિજો.’

38 જ્યામાય તુમહાય મેહનાત નાંય કોઅયાહાં તી રાન માયે વાડાહાટી તુમહાન દોવાડયા. બીજહાંય મેહનાત કોઅલી હેય બાકી તુમા ચ્યા પાક યોખઠા કોઅહા.”

સમરૂની લોકહા બોરહો

39 માયે કોઅલા બોદા ચ્યાય માન આખ્યાં એહેકેન આખનારી થેઅયે વોનાયને ચ્યા ગાવા બોજ સમરૂની લોકહાય ઈસુવોય બોરહો કોઅયો.

40 યાહાટી જોવે ચ્યા સમરૂનીયા ચ્યાપાય ચેય પોઅચ્યા, તોવે ચ્યાહાય ચ્યાલ રાવ્યાં કોઅયા કા, “આમહે આરે ઈહીં રોજે” એને તો બેન દિહી તાં રિયો.

41 એને આજી બો બોદા માઅહાય ઈસુ સંદેશના લેદે ચ્યાવોય બોરહો કોઅયો.

42 એને ચ્યાહાય થેઅયેલ આખ્યાં, “આમી આમા તો આખલ્યા કોય નાંય બોરહો કોઅજે, કાહાકા આમા પોતે વોનાયા એને જાંઆઈ ગીયા કા ઓ હાચ્ચોજ દુનિયા તારણારો હેય.”

43 પાછે તો બેન દિહી રોયન તાઅને આગલા ગાલીલ ભાગામાય ગીયો.

44 કાહાકા ઈસુવે પોતેજ સાક્ષી દેનેલ કા ભવિષ્યવક્તાલ પોતા વોતનામાય કાદો નાંય આદર કોઅે.

45 જોવે તો ગાલીલ ભાગામાય ચેય પોઅચ્ચો તોવે ગાલીલ વિસ્તારા માઅહાય ચ્યા સ્વાગત કોઅચા, કાહાકા જોલે કામે ચ્યાય ચેરૂસાલેમ શેહેરામાય પાસ્કા સણા દિહામાય કોઅલે તીં બોદા ચ્યાહાય એઅલા આતા, કાહાકા ચ્યાબી સણામાય ગીઅલા આતા.

રાજા ચાકારા પોહાલ હારાં કોઅના

46 ઈસુ પાછો ગાલીલ ભાગા કાના ગાવામાય ચેનો, જાં ચ્યે પાઅચાલ દારાખા રોહો બોનાવ્યેલ. કાપરનાહુમ ગાવામાય ચોક રાજા આતો ચ્યા ચાકારા પોહો બિમાર આતો.

47 જોવે તો ઈ વોનાયોકા ઈસુ ચહૂદા વિસ્તાર માઅને ગાલીલ ભાગામાય ચેય ગીયહો તોવે તો ચ્યાપાય ગીયો એને ચ્યાલ વિનાંતી કોઅચી કા, ચેયન મા પાહાલ હારો કોઓ, કાહાકા તો મોરાં તિયારી હેય.

48 ઈસુવે ચ્યાલ આખ્યાં, “જાવ લોગુ તુમા ચમત્કાર એને ચિન્હ નાંચ એઅહા તાંવ લોગુ તુમા બોરહો નાંચ કોઅહા.”

49 રાજા ચાકારે ચ્યાલ આખ્યાં, “ઓ પ્રભુ, મા પોહો મોઓઈ જાય, ચ્યા પેલ્લા ચાલ.”

50 ઈસુ ચ્યાલ આખહે, “જો, તો પોહો જીવતો રોય” તો માટડો ઈસુવા વાત માની ગીયો એને જાતો રિયો.

51 તો આજુ વાટેમાય આતો તાંઉ ચ્યા ચાકાર ચ્યાલ મિળ્યાં ચ્યાહાય ચ્યાલ ખોબાર દેની કા, “તો પોહો જીવતો હેય.”

52 ચ્યે ચ્યાહાન પુછ્યાં, “કોઅહે સમયે તો હારો ઓઅરા લાગ્યો?” ચ્યાહાય ચ્યાલ આખ્યાં, “કાલે બોપરેહે ચોક વાગે જોરાં ઉતી ગીયા.”

53 તોવે આબહો જાંઆઈ ગીયો કા ચ્યેજ સમાયે ઈસુવે ચ્યાલ આખલા, “તો પોહો જીવતો રોય” તોવે તો એને ચ્યા ગોઆવાળહાય બોદહાય ઈસુવોય બોરહો કોઅયો.

54 ઈસુવા ઈ બિજા ચિન્હ ચમત્કારા કામ આતા, જોવે તો ચહૂદા વિસ્તારામાઅને ગાલીલ ભાગામાય પાછો ચેનો.

5

આડાત્રી વોરહા બિમાર્યાલ હારાં કોઅના

1 આ પાછે યહૂદીયાહા સણ આતો, એને ઈસુ યેરૂસાલેમ શેહેરામાય ગીયો.

2 યેરૂસાલેમ શેહેરામાય ચોક મેંડા ફાટાકે પાય પાઅયા કુંડ આતો, હિબ્રુ ભાષામાય ચ્યાલ બેથસદા આખે, એને પાય વોટલ્યેવાળા કુંડા તાં હેય.

3 ચ્યામાય રોગી, આંદળે, લેંગડે એને લુળે યાહા બોજ મોઠો ટોળો પોડી રોતો આતો.

4 આ પાઆય આલના વાટ જોવતા આતા, કાહાકા કોવે-કોવે પોરમેહેરા હોરગ્યો દૂત કુંડામાય ઉતીન પાઆય આલવી દેતો આતો, પાઆય આલવ્યા પાછે જો કાદો પેલ્લો પાઅયામાય ઉતે ચ્યા કોઅહિબી બિમારી ઓઅરી બાકી તો હારો ઓઈ જાતો આતો.

5 તાં ચોક માઅહું આતા તો આડાત્રી વોરહાપાઅને બિમાર આતા.

6 જોવે ઈસુવે ચ્યાલ હુતલો એઇન એને બોજ વોરહાથી પોડલાં હેય એહેકેન માલુમ જાયા તોવે ચ્યાય ચ્યાલ આખ્યાં, “તુલ હારાં ઓઅના મોરજી હેય કા?”

7 બિમાર માઅહાય ઈસુલ જાવાબ દેનો “ઓ માલિક, માયેપાંચ કાદા માઅહું નાંચ હેય કા જોવે પાઆય આલવી દેહે તોવે માન કુંડામાય ઉતાડે, આંચ ઉતાં કોશિશ કોઅતાહાંવ બાકી મા કોઅતો બિજો પેલ્લો ઉતી પોડહે.

8 ઈસુવે ચ્યાલ આખ્યાં, ઉઠ, તો પાથારી ઉઠાવીન ગોઅો જો.”

9 તારાત તીં માઅહું હારાં ઓઈ ગીયા એને ચ્યા પાથારી લેઈને જાં લાગ્યો તો આરામા દિહી આતો.

10 જ્યે દિહી એહેકેન જાયા તો આરામા દિહી આતો, યાહાટી યહૂદી આગેવાન હારાં ઓઈ ગીઅલા માઅહાલ આખા લાગ્યા, “આજે આરામા દિહી હેય, એને મૂસા નિયમાનુસાર ઠીક નાંચ હેય.”

11 બાકી ચ્યે ચ્યાહાન જાવાબ દેનો, “જ્યે માન હારો કોઅયો ચ્યાય માન આખ્યાં, તો પાથારી લેઈને ચાલ.”

12 ચ્યાહાય ચ્યાલ પુછ્યાં, “તો કું હેય, જ્યાંચ તુલ આખ્યાં, તો પાથારી લેઈને ચાલ?”

13 બાકી જો હારો જાયલો માઅહું તો નાંચ જાંઆય કા તો કું હેય, કાહાકા બો બોદા લોક આતા ચ્યામાય ઈસુ આડવા ઓઈ ગીયેલ.

14 આ પાછે તી માઅહું ઈસુલ દેવાળા બાઆપુર મિબ્યો, તોવે ચ્યાલ આખ્યાં, “એએ, તું હારો ઓઈ ગીયો, આમીને પાપ કોઅના નાંચ, કોઅહે તે તોવોય પેલ્લા કોઅતા મોઠી આબદા તોવોય પોડી.”

15 આ માઅહાય જાયને યહૂદી આગેવાનાહાન આખી દેના કા, “ઈસુવે માન હારો કોઅયેલ.”

16 યાહાટી યહૂદીયાહા આગેવાન ઈસુવાલ સોતાવા લાગ્યા, કાહાકા તો આરામા દિહી ઓહડે કામ કોઅહે.

17 બાકી ઈસુવે ચ્યાહાન આખ્યાં, “મા આબો પોરમેહેર સાદા કામ કોઅહે, એને માન બી કામ કોઅરા જોજે.”

18 ઈસુય એહેકોય આખ્યાં ચ્યાહાટી યહૂદી આગેવાન ચ્યાલ માઆઇ ટાકાં કોશિશ કોઅરા લાગ્યા, કાહાકા તો આરામા દિહી નાંચ પાળે ઓલહાંજ નાંચ, બાકી પોરમેહેરાલ મા આબો આખીન, આંચ પોતે પોરમેહેરા રોકો હેતાંવ એહેકેન આખતો આતો.

પોહા ઓદિકાર

19 તોવે ઈસુવે ચ્યાહાન આખ્યાં, “આંચ તુમહાન હાચ્યાં-હાચ્યાં આખતાહાવ, પોહો પોતે કાય નાંચ કોઅય હોકે, તો કેવળ તીંજ કોઇ હોકહે, તો તીંજ કોઅહે, જું તો આબહાલ કોઅતો એએહે, કાહાકા જું કાય આબહો કોઅહે, તીંજ પોહોબી કોઅહે.

20 કાહાકા આબહો પાહાલ પ્રેમ કોઅહે એને પોતે જું કોઅહે તીં બોદા પોહાલ દેખાડેહે, એને તો યા કોઅતા આજુ મોઠા કામ પોહાલ દેખાડી, કા ચ્યાહાટી તુમહાન નોવાય લાગી.

21 કાહાકા જેહેકેન આબહો મોઅલા લોકહાન જીવતો કોઅહે, તેહેકેન પોહોબી ચ્યા મોરજી પરમાણે મોઅલા લોકહાન જીવતા કોઅહે.

22 એને આબહો કાદા ન્યાય નાંચ કોએ, બાકી ન્યાય કોઅના બોદા કામ પોહાલ હોઅપી દેનલા હેય.

23 યાહાટી બોદા લોકહાન જેહેકેન આબહા આદર કોઅતેહે, તેહેકેન પોહા બી આદર કોઅરા જોજે, જો પોહા આદર નાંચ કોએ, તો આબહા જ્યાંચ પોહાલ દોવાડયોહો, આદર નાંચ કોએત.

24 આંચ તુમહાન હાચ્યાં-હાચ્યાં આખતાહાવ, જું માઅહું મા વચન વોનાયેહે એને માન દોવાડયોહો ચ્યા પોરમેહેરાવોય બોરહો કોઅહે, અનંતજીવન ચ્યાલ મિળી ગીયહા, ચ્યાલ ડોડ નાંચ દી,

બાકી અનંતકાળના મોરણા માઅને બોચી ગીયહો એને પેલ્લો અનંતજીવનામાય જાય હોકહયો.”

25 “આંય તુમહાન હાચ્યાં-હાચ્યાં આખતાહાવ કા, ઓહડો સમય યી રોયહો, બાકી યેય ગીયહો, જોલે મોઅલે માઅહે પોરમેહેરા પોહા આવાજ વોનાઈ, એને જ્યે વોનાઈ ચ્યે જીવતે ઓઈ જાય.

26 કાહાકા જેહેકેન આબહો પોતાનામાય જીવન રાખહે, તેહેકેન ચ્યાય પોહાલ બી ઓદિકાર દેનહો કા પોતાનામાય જીવન રાખે.

27 બાકી પોહાલ બોદા લોકહાવોય ન્યાય કોઅના બી ઓદિકાર દેનલો હેય, યાહાટી કા તો માઅહા પોહો હેય.

28 ઈ વોનાયને તુમહાન નોવાય નાંય લાગા જોજે, કાહાકા ઓહડો સમય યી રોયહો, કા જોલે મોઅઇ ગીઅલે હેય, પોહા આવાજ વોનાયને જીવતે ઉઠી.

29 જ્યાહાય હારાં જીવન જીવ્યા ઓરી, ચ્યે અનંતજીવન મિળવાહાટી મોઅલા માઅને પાછા જીવી ઉઠી, એને જ્યાહાય ખારાબ જીવન જીવ્યા ઓરી ચ્યે શિક્ષા બોગવાહાટી પાછે જીવી ઉઠી.”

ઈસુવા બારામાય સાક્ષી

30 “આંય પોતે કાય નાંય કોઇ હોકતાહાવ, આંય લોકહા ન્યાય તેહેકેન કોઅતાહાંવ, જેહેકેન પોરમેહેર આબો માન ચ્યાહા ન્યાય કોઅરા આખહે, એને મા ન્યાય હાચ્યો હેય, કાહાકા આંય મા મોરજયેકોય નાંય ન્યાય કોઉ, બાકી મા દોવાડનારા મોરજયેકોય કોઅહુ.

31 જોવે આંય પોતા બારામાય સાક્ષી આખું, તોવે મા સાક્ષી હાચ્યી નાંય હેય.

32 બાકી ચોક બિજો હેય તો મા સાક્ષી દેહે, એને આંય જાઅતાહુ કા મા બારામાય તો જી સાક્ષી દેહે, તી હાચ્યી હેય.

33 તુમહાય યોહાન બાપતિસ્મા દેનારા પાય તુમહે લોકહાન પુછા દોવાડયા, એને ચ્યાય હાચ્યી સાક્ષી દેની.

34 બાકી માન કાદા માઅહા સાક્ષી ગોરાજ નાંય હેય, તેરુંબી માયે તુમહાન ચ્યા સાક્ષી બારામાય આખલા હેય, જી યોહાન બાપતિસ્મા દેનારાય આખલી આતી, યાહાટી કા તુમા તારણ મેળવી હોકા.

35 યોહાન બોળતો એને ચોમાકતા દિવા રોકો આતો, એને તુમહાન કોલહાક વાચા લોગુ ચ્યા ઉજવાડામાય આનંદ કોઅના હારાં ગોમ્યા.

36 બાકી માયેપાંચ યોહાના સાક્ષી કોઅતી મોઠી સાક્ષી હેય, જું કામ આબહે માન પુરાં કોઅરાહાટી દેનહા, તીંજ કામ જું આંચ કોઅહુ મા બારામાય સાક્ષી દેહે, કા આબહે માન દોવાડલો હેય.

37 એને આબહે જ્યાંચ માન દોવાડયોહો, ચ્યેજ આબહે મા સાક્ષી દેનહી, તુમા નાંચ કોઈ દિહી ચ્યા આવાજ વોનાયા, એને નાંચ ચ્યાલ હામ્મે-હામ્મે એઅયોહો.

38 એને તુમા ચ્યા વચન તુમહે મોનામાય વોહતી નાંચ કોઅરા દેત, કાહાકા તુમા માયેવોય બોરહો નાંચ કોઅેત, જ્યાલ ચ્યાય દોવાડયોહો.

39 પવિત્રશાસ્ત્રા અબ્યાસ કોઅતાહા, કાહાકા તુમા એહેકેન બોરહો કોઅતાહા કા ચ્યામાય તુમહાન અનંતજીવન મિળી, એને તીંજ પવિત્રશાસ્ત્ર મા બારામાય સાક્ષી દેહે.

40 તેરુંબી તુમા અનંતજીવન મિળવાહાટી માયેપાંચ યા નાંચ માગેત.

41 આંચ માઅહા પાયને વાહવા આશા નાંચ કોઉ.

42 બાકી કા આંચ તુમહાન જાંઅતાહાંવ તુમા મોનામાય પોરમેહેરાવોય પ્રેમ નાંચ કોઅેત.

43 આંચ મા આબહા ઓદિકારાહાતે યેનહો, એને તુમા માન નાંચ સ્વીકાર કોઅે, બાકી જોવે બિજો કાદો પોતા ઓદિકારાકોય યેય તોવે ચ્યાલ તુમા સ્વીકાર કોઈ લાહા.

44 તુમા માયેવોય બોરહો નાંચ કોઈ હોકે, કાહાકા તુમા ચોકબીજા પાયને માન હોદતાહા, એને તુમા ચોકુજ પોરમેહેરા પાયને માન મિળવા કોશિશ નાંચ કોઅેત.

45 તુમા એહેકેન મા હોમજાહા કા આંચ આબા હોમ્મે તુમહાવોય દોષ થોવહી, મૂસા નિયમશાસ્ત્ર, જ્યાવોય તુમહાય આશા રાખીહી, તુમહાવોય દોષ થોવી.

46 કાહાકા જો તુમા મૂસાવોય બોરહો કોઅતા તે માયેવોય બી બોરહો કોઅતા, કાહાકા ચ્યે મા બારામાય લોખ્યહાં.

47 બાકી જો તુમા મૂસા નિયમશાસ્ત્રાવોય બોરહો નાંચ કોઅે, તે તુમા નોકકી માયેવોય બોરહો કેહેકે કોઅહા?”

6

પાય ઓજાર લોકહાન ખાવાડના
(માથ્થી 14:13-21; માર્ક 6:30-44; લુક. 9:10-17)

1 યો વાતો જાયો પાછે ઈસુ ગાલીલ દોરિયા એટલે તીબીરીયાસ દોરિયા ચ્યેમેરે ગીયો.

2 ચોક મોઠી ગીરદી ચ્યા પાહલા ચાલી, કાહાકા જ્યા નોવાયે ચમત્કાર તો બિમાર્યાહાવોચ કોઅતો આતો, ચ્યે ચ્યાહાન એઅતે આતે.

3 તોવે ઈસુ ડોગાવોચ ચોડીન ચ્યા શિષ્યહાઆરે તાં બોઠો.

4 એને ચહૂદીયાહા પાસ્કા સણા વોછા દિહી બાકી આતા.

5 તોવે ઈસુવે નોજાર કોઅચી કા ચ્યાપાય બોજ માઅહા ટોળો ચેતો દેખ્યો, એને ચ્યે ફિલિપાલ પુછ્યાં, “ચે બોદે ખાય હોકે ચ્યાહાટી આપા કેછને બાખે વેચાત્યો લેચ યાહુ?”

6 ઈસુચ ચ્યા પરીક્ષા કોઅરાહાટી એહેકોચ આખ્યાં, કાહાકા તો પોતે જાંઅતો આતો કા તો કાય કોઅરી.

7 ફિલિપે જાવાબ દેનો, “ચ્યાહામાઅને બોદહાલ વોછા-વોછા દેચ તેરુંબી બોસો દીનારા (૨૦૦ દીનાર એટલે બેન હોવ દિહાહા કાંબારાં) બાખે ચ્યાહાન નાંચ કુગી.”

8 ચ્યા શિષ્યહા માઅને સિમોન પિત્તરા બાહા આંદ્રિયાસાય ઈસુલ આખ્યાં.

9 “ઈહીં ચોક પોહો હેચ, ચ્યાપાય પાય જુવાયે બાખે એને બેન માછલે હેચ બાકી ઓલા લોકહાન ઈ કેહેકે કુગી?”

10 તોવે ઈસુવે આખ્યાં, “માઅહાન બોહતા કોઆ” ચ્યા જાગામાય બોજ ગાહીયા આતા, તોવે માઅહે ગાહીયાવોચ બોહી ગીયે, ચ્યાહામાય માટડા આસરે પાય ઓજાર આતા.

11 તોવે ઈસુવે ચ્યો પાય બાખ્યો લેધો, એને આભાર માનીન ગાહીયાવોચ બોઠલા લોકહાન વાટી દેન્યો, તેહેકોઈન માછલે જોલા માગેત તોલા ચ્યાહાન વાટી દેના.

12 જોવે ચ્યે ખાયન દારાઈ ગીયે, પાછે ઈસુવે ચ્યા શિષ્યહાન આખ્યાં, “ઉગારલા કુટકા ચોખઠા કોઆ, કા કાય નોકામ્યા નાંચ ઓઈ જાય.”

13 યાહાટી ચ્યાહાય યોખઠા કોઅયા, તોવે પાય બાખહી માઅને ઉગારલા કુટકાહા બાર ટોપલ્યો બોઆયો.

14 લોકહાય ઓ ચમત્કાર એઇન આખ્યાં, “દુનિયામાય જો ભવિષ્યવક્તા યેનારો હેય તો નોક્કી ઓજ હેય.”

15 ઈસુ જાંઆઈ ગીયો કા ચ્યાલ રાજા બોનાવાહાટી ચ્યે માઅહે દોઅરાં કોઅેત, તોવે તો પાછો ડોગાવોય યોખલોજ જાતો રિયો.

ઈસુવા પાઅયાવોય ચાલના

(માથ્થી 14:22-27; માર્ક 6:45-52)

16 જોવે રુવાળા પોડી ગીયા, તોવે ચ્યા શિષ્ય દોરિયા મેરે ગીયા.

17 એને ઉડીમાય ચોડીન દોરિયા ચ્યેમેરે કાપરનાહુમ ગાવા એછે જાં લાગ્યા. ચ્યે સમયે આંદારાં પોડી ગીયા, એને ઈસુ આજુ લોગુ ચ્યાહાપાય નાંચ યેનલો આતો.

18 એને તોફાના લીદે દોરિયામાય લાફા ઉસળા લાગ્યા.

19 તોવે જોવે ચ્યા ત્રીન ચાર મીલ (૫ કિલોમીટર લગભગ) ગીયા ઓરી, તોવે ચ્યાહાય ઈસુવાલ દોરીયાવોય ચાલતો એને ઉડી એછે યેતો દેખ્યો, એને ચ્યા બિઇ ગીયા.

20 બાકી ઈસુવે ચ્યાહાન આખ્યાં, “આંચ ઈસુ હેતાઉ, બીયહા મા.”

21 ચ્યા ચ્યાલ ઉડીમાય લાં કોઅેત ઓલહામાય ઉડી તારાત મેરે યેય ગિઇ, જાં ચ્યા જાતા આતા.

લોકહા ઈસુવાલ હોદના

22 બીજે દિહે જ્યે માઅહે દોરિયા ચ્યેમેરે ઉબલે આતે ચ્યાહાય ઈ એઅયા, ઈહી ચોક ઉડી સિવાય બીજી ઉડી નાંચ આતી, એને ઈસુ ચ્યા શિષ્યહાઆરે ઉડીમાય નાંચ ચોડયેલ, બાકી સિવાય ચ્યા શિષ્યજ ગીઅલા આતા.

23 તોવે આજુ વાહને ઉડયે ત્રીબીરીયાસા ચ્યા જાગા પાહી યેને, જાં ચ્યાહાય પ્રભુ આભાર માન્યા પાછે બાખે ખાદેલ.

24 જોવે ગીરદે એઅયા, કા ઈહી ઈસુ બી નાંચ હેય, એને ચ્યા શિષ્યબી નાંચ હેય, તોવે ચ્યે માઅહેબી વાહની-વાહની ઉડયેહેમાય બોહીન, ઈસુવાલ હોદા કાપરનાહુમ ગાવામાય પોઅચ્યે.

ઈસુ જીવના બાપે

25 એને દોરિયા એમેરે તો મિલ્યો તોવે આહાય આલ પુછ્યાં, “ઓ ગુરુ, તું ઈહી કોવે યેનો?”

26 ઈસુવે આહાન જવાબ દેનો કા, “આંય તુમહાન હાચ્યાં-હાચ્યાં આખતાહાવ, તુમહાય ચમત્કાર એએયો આહાટી નાંય, બાકી બાપે ખાયન દારાઈ ગીયે આહાટી તુમા માન હોદતેહ્.

27 જું ખાઅના બોગડી જાહે આહાટી મેહનાત મા કોઅહા, બાકી જું ખાઅના અનંતજીવના લોગુ ટોકનારા હેય આહાટી મેહનાત કોઆ. તી તુમહાન માઅહા પોહો દી, કાહાકા પોરમેહેર આબહે આલ એહેકેન કોઅના ઓદિકાર દેનલો હેય.”

28 આહાય ઈસુલ પુછ્યાં, “પોરમેહેરા કામ કોઅરાહાટી આમહાય કાય કોઅરા જોજે?”

29 ઈસુવે આહાન જાવાબ દેનો, પોરમેહેરા મોરજી ઈ હેય, કા “પોરમેહેરાય જ્યાલ દોવાડયોહો, આવોય તુમહાય બોરહો કોઅરા જોજે.”

30 તોવે આહાય ઈસુલ પુછ્યાં, “તું કાય ચિન્હ દેખાડતોહો કા તી એઇન તોવોય આમા બોરહો કોઅજે? તું કોઅહા કામ દેખાડતોહો?

31 આપહે આગલ્યા ડાયહાય ઉજાડ જાગામાય બાપે (માન્ના) ખાદી, એહેકેન લોખલાં હેય કા મૂસાય આહાન હોરગામાઅને બાપે દેની.”

32 તોવે ઈસુવે આખ્યાં, “આંય તુમહાન હાચ્યાં-હાચ્યાં આખતાહાવ, મૂસાય તુમહાન હોરગામાઅને બાપે નાંય દેની, બાકી મા આબહો તુમહાન હાચ્યી હોરગામાઅને બાપે દેહે.

33 કાહાકા જું બાપે હોરગામાઅને યેહે એને દુનિયા લોકહાન જીવન દેહે, તીજ પોરમેહેરા બાપે હેય.”

34 તોવે આહાય આખ્યાં, “ઓ પ્રભુ, ઈ બાપે આમહાન કાયામ દેજે.”

35 ઈસુવે આહાન આખ્યાં, “જું બાપે જીવન દેહે તી આંય હેતાઉ, જો કાદો માયેપાંય યેહે તો કોદહીજ બુખો નાંય ઓઅઇ, એને જો કાદો માયેવોય બોરહો કોઅહે તો કોદહીજ પીત્તો નાંય ઓઅઇ.

36 બાકી માયે તુમહાન પેલ્લા આખલા આતા, તુમહાય માન એઅયા પાછે બી બોરહો નાંય કોએત.

37 આબહે માન જ્યા લોક દેનહા, આ બોદા માયેપાંય યી, એને જીં માઅહું માયેપાંય યી ચ્યાલ આંય નાંય કાડહીં.

38 કાહાકા આંય મા મોરજી પુરી કોઅરાહાટી નાંય, બાકી જ્યે માન દોવાડયોહો આ મોરજી પુરી કોઅરાહાટી હોરગામાઅને યેનહો.

39 એને માન દોવાડનારા મોરજી ઈ હેય કા, ચ્યે માન બોદા કાય દેનહા, આમાઅને કાયબી ટાકાય નાંય, બાકી છેલ્લે દિહી આંય જીવતો કોઉ.

40 કા ઈજ મા આબહા મોરજી હેય, કા જીં માઅહું પોહાલ એએ એને ચ્યાવોય બોરહો કોએ તો અનંતજીવન મિળવે, એને ચ્યાલ આંય છેલ્લે દિહે જીવતો ઉઠાડીહી.”

41 ઈસુવે એહેકેન આખ્યેલ કા, “આંય હોરગામાઅને ઉતી યેનલી બાખે હેતાઉ, ચ્યાહાટી યહૂદીયા ટુટારતા લાગ્યા.”

42 એને ચ્યાહાય આખ્યાં, “ઓ યોસેફા પોહો ઈસુ હેય કા નાંય, આ આયહે-આબહાલ આપા વોળાખજેહે? તોવે તો એહેકેન કાહા આખહે કા આંય હોરગામાઅને યેનહી?”

43 ઈસુવે જવાબ દેનો, “તુમા તુમહામાય કુરકુર મા કોઅહા.

44 કાદો માયેપાંય નાંય યેય હોકે, જાવ લોગુ આબહો, જ્યાંય માન દોવાડયો, ચ્યાલ મા એછે ખેચી નાંય લેય, એને આંય છેલ્લે દિહે પાછો જીવતો કોઅહી.

45 ભવિષ્યવક્તાહા લેખ માય એહેકેન લોખલાં હેય કા, ચ્યે બોદે પોરમેહેરાપાઅને હિકાડલે રોય. જીં કાદાં પોરમેહેર આબહા પાઅને વોનાલા એને હિકલાં હેય, તીજ માયેપાંય યેહે.

46 કાદાય પોરમેહેર આબહાલ નાંય દેખહયો, બાકી જો પોરમેહેરાપાઅને યેનહો, ચ્યાય પોરમેહેર આબહાલ દેખ્યહો.

47 આંય તુમહાન હાચ્યાં-હાચ્યાં આખતાહાવ કા જો કાદો બોરહો કોઅહે, ચ્યાલ અનંતજીવન મિળલા હેય.

48 જીં બાખે જીવન દેહે તી આંય હેતાઉ.

49 તુમહે આગલ્યા ડાયહાય ઉજાડ જાગામાય માન્ના ખાદાં એને મોઓઈ ગીયા.

50 બાકી હોરગામાઅને યેનલી બાખે ઓહડી હેય કા તી જોવે કાદો ખાય તે તો નાંય મોઅે.

51 જીવના બાખે જીં હોરગામાઅને ઉતી યેનલી હેય તી આંય હેય. યે બાખેમાઅને જોવે કાદો ખાય, તો સદાકાળ જીવી, એને જીં બાખે આંય દિહી તી દુનિયા લોકહા જીવનાહાટી મા શરીર હેય.”

52 તોવે યહૂદી આગેવાન, ચ્યાહા ચ્યાહામાય બોજ બોલાબોલી કોઅતા લાગ્યા, એને ચ્યાહાય આખ્યાં, “ઈ માઅહું કેહેકેન આમહાન ચ્યા શરીર ખાં દી હોકહે?”

53 તોવે ઈસુવે ચ્યાહાન આખ્યાં, “આંય તુમહાન હાચ્યાં-હાચ્યાં આખતાહાવ કા, જોવે તુમા માઅહા પોહા શરીર નાંય ખાહા એને ચ્યા લોય નાંય પીયહા તોવે તુમહેમાય જીવન નાંય રોય.

54 બાકી જીં માઅહું મા શરીર ખાહે, એને મા લોય પીઅરી, ચ્યાલ અનંતજીવન મિળી ગીયહા એને ચ્યાલ આંય છેલ્લે દિહે પાછો જીવતો કોઅહી.

55 કાહાકા મા શરીર હાચ્યાં ખાઅના હેય એને મા લોય હાચ્યાં પિઅના હેય.

56 જીં માઅહું મા શરીર ખાહાય એને મા લોય પીઅરી તો માંયેમાય રોહોય એને આંય ચ્યામાય રોહું.

57 જેહેકેન જીવતા આબહે માન દોવાડયોહો એને આંય આબહા લેદે જીવતો હેતાંવ, તેહેકેન તોબી જો મા શરીર ખાહે તો મા લેદે જીવતો રોય.

58 ઈ બાખે તીજ હેય, જીં હોરગામાઅને યેનલી હેય, જેહેકેન તુમહે આગલ્યા ડાયહાય ખાદી એને ચ્યા મોઅઈ ગીયા, તોહડી બાખે નાંય, ઈ બાખે જીં માઅહું ખાય, તો સાદા જીવતો રોય.”

59 ઈસુ કાપરનાહુમ ગાવામાય ચ્યાહાન ચોક સોબાયે ઠિકાણે હિકાડે તોવે ચ્યાહાન એહેકેન આખ્યાં.

અનંતજીવના વચન

60 તોવે ચ્યા શિષ્યહા માઅને બો બોદહાય ઈ વોનાયને આખ્યાં, “ઈ વાત કોઠાણ હેય, ઈ કું માની હોકહે?”

61 ઈસુય મોનામાય ઈ જાંઅયા કા ચ્યા શિષ્ય એહેકેન ટુટરીયા કોઅતાહા એને ચ્યે ચ્યાહાન આખ્યાં, “કાય ઈ તુમહાન માયેવોય બોરહો કોઅરા રોકહે?”

62 એને જોવે તુમા માઅહા પોહાલ જાં તો પેલ્લો આતો તાં ઉચે ચ્યાલ પાછો જાતો એઅહા, તોવે કાય ઓઅરી?

63 આત્મા જીવન દેહે, શરીરાકોય કાય ફાયદો નાંય. જ્યો વાતો માયે તુમહાન આખ્યો તી આત્મા હેય, એને જીવન બી હેય.

64 બાકી તુમહેમાઅને કોલાહાક એહેકેન હેય જ્યા ચ્યાવોય બોરહો નાંય કોઅેત,” કાહાકા ઈસુ ઈ જાંઅતો આતો કા જ્યે બોરહો નાંય કોઅેત, ચ્યે કું હેય, એને કું માન દોઅવાડી દી.

65 એને ચ્યે આખ્યાં, “યાહાટી માયે તુમહાન આખ્યેલ કા જાવ લોગુ કાદા માઅહાલ પોરમેહેરાપાઅને ઈ વરદાન નાંય દી હોકે, તાંવ લોગુ તી માયેપાંય નાંય ચી હોકે.”

પિત્તરા બોરહો

66 ચ્યા પાછે ઈસુ શિષ્યહા માઅને બોજ શિષ્ય પાછાડી ઓટી ગીયા, એને ચ્યાલ છોડીન જાતા રિયા.

67 તોવે ઈસુવે બાર શિષ્યહાન આખ્યાં, “તુમાબી છોડીન જાતા રા કોઅતા કા?”

68 સિમોન પિત્તરે ચ્યાલ જાવાબ દેનો, “ઓ પ્રભુ, આમા કા પાય જાજે? અનંતજીવના વાતો તોપાય હેય.

69 એને આમા બોરહો કોઅજેહે એને જાંઆઈ ગીયા કા પોરમેહેરા પવિત્ર માઅહું તુંજ હેય.”

70 ઈસુવે ચ્યાહાન જાવાબ દેનો, “માયે તુમહાન બાર જાંણાહાન નિવડી લેદા નાંય કા? તેરંબી તુમહામાઅને ચોક માઅહું સૈતાના તાબામાંય હેય.”

71 ઈ ચ્યાય તો સિમોના પોહો યહૂદા ઇસ્કારીયોતા બારામાય આખ્યાં, કાહાકા તો બાર શિષ્યહા માઅને ચોક આતો, તો ઈસુલ દોઅઈ દેનારો આતો.

7

ઈસુ એને ચ્યા બાહા

1 ચ્યા પાછે ઈસુ ગાલીલ ભાગામાય ફિરતો રિયો, કાહાકા યહૂદી આગેવાન ચ્યાલ માઆઇ ટાકાં હોદેત, યાહાટી ચ્યાય યહૂદા વિસ્તારમાય ફિરા વિચાર નાંય કોઅયો.

2 આમી યહૂદીયાહા માંડવા સણ પાહાય આતો,

3 યાહાટી ચ્યા બાહાહાય ચ્યાલ આખ્યાં, “ઇહિને યહૂદીયા વિસ્તારમાય જો, કા જું કામ તું કોઅતોહો, તી તો શિષ્યહાય બી એઅરા જોજે.

4 જોવે તો એહેકેન ઇચ્છા હેય કા લોક તો બારામાય જાંએ, તો તુલ બોદહા હામ્મે કામહાલ કોઅરા જોજે, જો તું ઈ કામ કોઅતોહો, તો પોતાલ દુનિયામાય પ્રગટ કોઇ દે.”

5 કાહાકા ચ્યા બાહા બી ચ્યાવોય બોરહો નાંય કોઅતા આતા.

6 ઈસુવે ચ્યાહાન આખ્યાં, “આજુ મા સમય નાંય યેનહો, બાકી તુમહેહાટી બોદો સમય યોગ્ય હેય.

7 દુનિયા લોક તુમહેઆરે આડાઇ નાંય કોઇ હોકે, બાકી મા આરે આડાઇ કોઅતેહે, કાહાકા આંય ચ્યાહા વિરુદ્ધ સાક્ષી દેતહાવ કા ચ્યાહા કામે ખારાબ હેય.

8 તુમા સણામાય જાયા, આંય આમી નાંય જાવ, કાહાકા આજુ મા સમય નાંય યેનહો.”

9 તો ચ્યાહાઆરે વાતો કોઇન ગાલીલ ભાગામાય રોય ગીયો.

માંડવા સણામાય ઈસુ

10 બાકી ચ્યા બાહા સણામાય ગીયા, તોવે તોબી ખુલ્લી રીતે નાંય, બાકી ગુપ્તમાય ગીયો.

11 યહૂદી આગેવાન સણા દિહામાય ચ્યાલ હોદેત એને ચ્યા આખે, “એલો કેઇ હેય?”

12 એને લોકહા ટોળામાય ચ્યા બારામાય દૂરે-દૂરે બોજ વાતો કોઅયો, કોલહાક લોક આખતા આતા, “તો હારો માઅહું હેય” એને કોલહાક આખતા આતા, “નાંય, તો લોકહાન છેતરેહે.”

13 તેરુંબી યહૂદી આગેવાનહા દાકે કાદાં માઅહું ચ્યા બારામાય ખુલ્લી રીતે નાંય બોલે.

સણામાય ઈસુવા હિકાડના

14 એને સણા આરદા દિહી પારવાઈ ગીયા તોવે ઈસુ દેવાળામાય જાયને હિકાડતો લાગ્યો.

15 તોવે યહૂદી આગેવાનહાય નોવાય પામીન આખ્યાં, “તો પવિત્રશાસ્ત્ર માઅને કોદહી નાંય હિક્યહો તે કેહેકેન આવડી ગીયા.”

16 તોવે ઈસુવે જાવાબ દેનો કા, “મા શિક્ષણ મા નાંય હેય, બાકી પોરમેહેરા હેય, જ્યાંય માન દોવાડયો.

17 જો કાદાં માઅહું ચ્યા ઇચ્છા પુરી કોઅરા માગહે તોવે ચ્યાલ ખોબાર પોડી કા મા શિક્ષણ પોરમેહેરા પાયને હેય કા પોતા કોઇન આખતાહાવ.

18 જું માઅહું પોતા કોઇન આખહે, તો પોતા વાહાવા કોઆડેહે, બાકી જું માઅહું ચ્યાલ દોવાડનારા વાહવા કોઅહે તોજ ઈમાનદાર હેય એને ચ્યામાય કાય લુચ્યાઈ નાંય હેય.

19 કાય મૂસાએ તુમહાન નિયમશાસ્ત્ર નાંય દેનહો કા? તેરુંબી તુમહામાઅને કાદો નિયમ નાંય પાળે, તો તુમા માન કાહા માઆઇ ટાકાં હોદતાહા?”

20 લોકહાય ચ્યાલ જાવાબ દેનો, “તુલ બુત વોળાગલો હેય, તુલ કું માઆઇ ટાકાં હોદહે?”

21 ઈસુવે ચ્યાહાન જાવાબ દેનો, “માયે યોક ચમત્કાર કોઅયા, એને તુમહાન બોદહાન ચ્યા નોવાય લાગી.

22 મૂસાએ તુમહાન સુન્નત કોઅના આગના દેનલી હેય, એને તુમા આરામા દિહી માઅહા સુન્નત કોઅતાહા. તી આગના મૂસા નાંય હેય, બાકી આગલ્યા ડાયહા પાઅને ચાલતી ચેનલી હેય.

23 જોવે મૂસા નિયમશાસ્ત્ર નાંય તોડાં હાટી તુમા આરામા દિહે માઅહા સુન્નત કોઅતાહા, તે માયે આરામા દિહે યોક માઅહાલ હારો કોઅયો, યાહાટી તુમા કાહા ખિજવાઈ ગીયા?

24 મું એઇન ન્યાય નાંય કોઅતા, બાકી યોગ્ય ન્યાય કોઆ.”

કાય ઈસુ ખ્રિસ્ત હેય?

25 કોલાહાક યેરૂસાલેમ શેહેરાવાળા આખે, “કાય ઓ તો નાંચ હેય યહૂદી આગેવાન માઆઇ ટાકાં કોશિશ કોઅતાહા?

26 બાકી એઆ, તો તે બોદહા હોમ્મે વાતો કોઇ રિઅલો હેય, એને કાદો ચ્યાલ કાય નાંચ આખે, એને આગેવાન લોકહાન ખાત્રી જાયી કા ઓજ ખ્રિસ્ત હેય?

27 ચાલ તે આમા વોળાખજેહે, ઓ કેઇને હેય, બાકી ખ્રિસ્ત જોવે ચી, તો કાદો નાંચ જાઅરી કા તો કેઇને હેય?”

28 તોવે ઈસુવે દેવાળામાય હિકાડતા મોઠેરે બોબલીન આખ્યાં, “તુમા માન વોળાખતાહા એને ઈ બી જાંઅતાહા કા આંચ કેઇને હેતાઉ. બાકી આંચ પોતા કોઓઇ નાંચ યેનહો, બાકી જ્યે માન દોવાડયોહો તો હાચ્યો હેય ચ્યાલ તુમા નાંચ વોળખે.

29 બાકી આંચ ચ્યાલ વોળાખતાહાવ, કાહાકા આંચ ચ્યાપાઅને યેનહો એને ચ્યે માન દોવાડયોહો.”

30 ચાહાટી યહૂદી આગેવાન ચ્યાલ દોઅરાં કોઅેત, બાકી તેરુંબી કાદે ચ્યાલ આથ નાંચ લાવ્યો, કાહાકા આજુ લોગુ ચ્યા સમય નાંચ યેનેલ.

31 એને લોકહા ગીરદોમાઅને બોજ જાઅહાય ચ્યાવોય બોરહો કોઅયો, એને આખા લાગ્યા, “ખ્રિસ્ત જોવે યી તોવે ચા કોઅતા વોદારી ચમત્કાર કોઇ દેખાડી કા જ્યે ચાય દેખાડયે?”

ઈસુવાલ દોઅના

32 પોરૂષીયાહાય લોકહાન ચ્યા બારામાય યો વાતો દૂરે-દૂરે કોઅતા વોનાયા, એને મુખ્ય ચાજક એને પોરૂષીયાહાય દોઅરાંહાટી દેવાળા રાખવાળ્યા દોવાડ્યા.

33 તોવે ઈસુવે આખ્યાં, “આંચ થોડીવાઆ લોગુ તુમહેઆરે હેતાઉ, ચ્યા પાછે જ્યાંય માન દોવાડયો ચ્યાપાય ફિરી જાહી.

34 તુમા માન હોદાહા બાકી આંચ તુમહાન નાંચ મીળહી એને આંચ જાં રોહુ તાં તુમહાન નાંચ યેવાયી.”

35 તોવે યહૂદી આગેવાન ચોક બીજહાન આખા લાગ્યા, “તો કેઇ જાય કા પોતે આપહાલ તો નાંચ મિળી? કાય તો ગેર યહૂદી લોકહાપાંચ જાય જ્યે યુનાની લોકહામાય રોતેહે, એને યુનાની લોકહાનબી હિકાડી કા?

36 તો કાય આખા માગહે કા, ‘તુમા માન હોદહા, બાકી આંય તુમહાન નાંય મીળહી, એને જાં આંય હેય, તાં તુમા નાંય ચી હોકે?’ ”

જીવના પાઅયા નોયો

37 પાછે સણા છેલ્લે દિહે, મતલબ મુખ્ય દિહી આતો, ઈસુ ઉબો રોયન મોઠેરે બોંબલીન આખ્યાં, “જીં કાદા માઅહું પીહાં હેય તી માયેપાંય ચેય, એને પિયે.

38 જેહેકેન પવિત્રશાસ્ત્રમાય લોખલાં હેય, કા જો માયેવોય બોરહો કોઅહે, આ હદયા માઅને જીવના પાઅયા નોયો વોવત્યો લાગી.”

39 જોવે આય “જીવના પાઅાય” આખ્યાં, તો તી પવિત્ર આત્મા બારામાય આખી રિઅલો આતો, જ્યાલ આવોય બોરહો કોઅનારાહાન મિળનારા આતા, કાહાકા પવિત્ર આત્મા આજુ લોગુ નાંય ઉતલાં આતા, કાહાકા પોરમેહેરાય આજુ લોગુ ઈસુવા મહિમા નાંય ખુલ્લી કોઅલી આતી.

40 બાકી લોકહામાઅને કોલાહાક ઈ વાત વોનાઈન આખતા લાગ્યા, “હાઅયો ઓ તો ભવિષ્યવક્તા હેય જ્યા ચેયના વાટ જોવજે.”

41 બીજહાંય આખ્યાં, “તો ખ્રિસ્ત હેય,” બાકી કાદાય આખ્યાં, “કાહા? કાય ખ્રિસ્ત ગાલીલ ભાગામાઅને ચી?

42 પવિત્રશાસ્ત્રમાય લોખલાં હેય કા, ખ્રિસ્ત દાઉદ કુળામાઅને એને બેથલેહેમ ગાવામાઅને ચી, જાં દાઉદ રાજા રોતો આતો,”

43 એહેકોયન ઈસુ લીદે લોકહામાય કુટ પોડી ગિઇ.

44 યાહાટી કોલહાક લોક આલ દોઅરાં કોઅેત, બાકી તેરુંબી કાદે આલ આથ નાંય લાવ્યો.

45 તોવે દેવાળા રાખવાળ્યા મુખ્ય યાજક એને પોરૂષીયાહા પાય ચેના, એને યહૂદી આગેવાનહાય આખ્યાં, “તુમા આલ કાહા નાંય લેય ચેના?”

યહૂદી આગેવાના બોરહો

46 દેવાળા રાખવાળ્યાહાય જાવાબ દેનો, “કાદા માઅહાય કોવેજ ઓહડયો વાતો નાંય કોઅલ્યો.”

47 તોવે પોરૂષીયાહાય જાવાબ દેનો, “કાય તુમાબી છેતારાય ગીયહા?

48 રાજા કા પોરૂષીયાહા માઅને કાદોબી આવોય બોરહો કોઅલો હેય?

49 બાકી ચ્ચે માઅહે જ્યે મૂસા નિયમશાસ્ત્ર નાંચ જાંએત, ચ્ચા પોરમેહેરાથી સ્થાપિત હેય.”

50 નિકોદેમુસે, જો પેલ્લા રાતી ઈસુપાય ચેનલો આતો, પોરૂષી લોકહામાઅને તો આતો, ચ્ચે ચ્ચાહાન આખ્યાં.

51 કાય મા નિયમશાસ્ત્ર કાદા માઅહાલ જાવ લોગુ ચ્ચા વોનાયને જાઈ નાંચ લેય કા તો કાય કોઅહે, દોષ થોવહે કા?

52 ચ્ચાહાય ચ્ચાલ જાવાબ દેનો, “કાય તુંબી ગાલીલ ભાગા હેય કા? પવિત્રશાસ્ત્રમાય હોદ એને તુલ હોમજાથી કા ગાલીલ ભાગામાઅને કાદો ભવિષ્યવક્તા નાંચ ચેનારો હેય.”

53 તોવે બોદે જાંએ જ્જાહા ચ્ચાહા ગોઓ જાતે રિયે.

8

વ્યબિચારીલ માફી

1 એને ઈસુ ચ્ચા શિષ્યહાઆરે જૈતુન ડોગાવોચ ગીયો.

2 એને બીજે દિહે હાકાળેહે પાછો દેવાળા બાઆપુર ગીયો, એને બોજ માઅહે ચ્ચાપાય ચેને તોવે તો બોહી ગીયો એને ચ્ચાહાન હિકાડતો લાગ્યો.

3 જોવે તો બોલીજ રિઅલો તોવે મૂસા નિયમ હિકાડનારા ગુરુ એને પોરૂષીયાહાય ચોક થેએ વ્યબિચાર કોઅતી સાપડાઈ ગીઈલી ચ્ચેલ ચ્ચાપાય લેય ચેના, એને ચ્ચેલ ચ્ચા હોમ્મે ઉબી રાખીન, ઈસુલ આખ્યાં.

4 “ઓ ગુરુ, ઈ થેએ વ્યબિચાર કોઅતીજ સાપડાય ગીયલી હેય.

5 મૂસા નિયમશાસ્ત્ર માય મૂસાય આમહાન ઓહડી આગના દેનલી હેય કા ઓહડી થેએયેહેન દોગડાટીન માઆઇ ટાકાં જોજે, બાકી તું કાય આખતોહો કા આમહાય કાય કોઅરા જોજે?”

6 ચ્ચાહાય ઈસુ પરીક્ષા કોઅરાહાટી ચ્ચાલ એહેકોચ પુછ્યાં, કા ચ્ચાવોચ દોષ થોવા કાય વાત મીળે, બાકી ઈસુ ડોંગો પોડીન આંગળીયે કોઅઈન દોરતીવોચ લોખતો લાગ્યો.

7 જોવે ચ્ચા પુછતા રોયા, તોવે ઈસુવે ઉબા રોઇન ચ્ચાહાન આખ્યાં, “તુમહેમાય જ્યાંચ કોદહી પાપ નાંચ કોઅયાહાં તોજ પેલ્લો દોગાડ ઠોકે.”

8 એને પાછો ડોંગો પોડીન દોરતીવોચ લોખતો લાગ્યો.

9 બાકી ય્યા ઈ વોનાઈન ડાયહા સે લેઈને વાહના પોહહા લોગુ ચોકા પાઠી ચોક આમા પાપી હેય એહેકેન હોમજીન જાતા રિયા, તોવે ઈસુ ચોખલો રોય ગીયો, ચ્યે થેચ્યે આરે જીં આજુબી તાંજ ઉબલી આતી.

10 તોવે ઈસુવે ઉબા રોયન ચ્યેલ આખ્યાં, “ઓ બાઈ, ય્યા કેછ ગીયા? તુલ કાદે ડોંડ નાંય દેનો?”

11 ચ્યે આખ્યાં, “કાદે નાંય પ્રભુ,” ઈસુવે ચ્યેલ આખ્યાં, “આંયબી તુલ ડોંડ નાંય દાવ, આમી ગોઓ જો, એને આમીને પાપમાય જીવન મા જીવહે.”

ઈસુ દુનિયા ઉજવાડો

12 તોવે ઈસુવે પાછા લોકહાન આખ્યાં, “આંય દુનિયા ઉજવાડો હેતાઉ, જીં માઅહું મા શિષ્ય બોની તો કાદે દિહી આંદારામાય નાંય ચાલી, બાકી ય્યાલ તો ઉજવાડો મિળી જો અનંતજીવન દેહે.”

13 તોવે પોરૂષીયાહાય ચ્યાલ આખ્યાં, “તું પોતા બારામાય પોતેજ સાક્ષી દેતહો, તો સાક્ષી હાચ્ચી નાંય હેય.”

14 ઈસુવે ચ્યાહાન જાવાબ દેયન આખ્યાં, “જો આંય પોતે મા બારામાય સાક્ષી દાહાંવ, તેરુંબી મા સાક્ષી હાચ્ચી હેય, કાહાકા આંય જાંઅતાહાંવ, કા આંય કેછને ચેતહાવ એને કેછ જાતહાવ? બાકી તુમહાન ખોબાર નાંય હેય, કા આંય કેછને ચેનહો એને કેછ જાતહાવ.

15 તુમા માઅહા વિચારાકોય ન્યાય કોઅતાહા, આંય કાદા ન્યાય નાંય કોઉ.

16 એને જોવે આંય ન્યાય કોઉ બી, તે મા ન્યાય હાચ્ચો હેય, કાહાકા આંય ચોખલો નાંય હેતાઉ, બાકી આંય પોરમેહેર આબહા આરે હેતાંવ, જ્યે માન દોવાડયોહો.

17 એને મૂસા નિયમશાસ્ત્રામાય બી લોખલાં હેય કા, બેન જાંઅહા સાક્ષી હાચ્ચી ગોણહાય.

18 ચોકતે આંય પોતે મા બારામાય સાક્ષી દેતહાવ, એને બિજો જ્યે માન દોવાડલો હેય, તો આબો મા બારામાય સાક્ષી દેહે.”

19 ચ્યાહાય ચ્યાલ પુછ્યાં, “તો આબહો કેછ હેય?” ઈસુવે જાવાબ દેનો, “નાંય તુમા માન વોળખે એને નાંય મા આબહાલ, જો તુમા માન વોળખે તોવે મા આબહાલ બી વોળખતા.”

20 યો વાતો તો દેવાળા બારામાય હિકાડે જાં દાનપેટી આતી તાં આખી, એને ચ્યાલ કાદ દોઅયો નાંય, કાહાકા આજુ લોગુ ચ્યા સમય નાંય યેનેલ.

ઈસુ પોતાનાજ બારામાય આખના

21 ઈસુવે ચ્યાહાન પાછા આખ્યાં, “આંય જાય રિઅલો હેતાંવ, એને તુમા માન હોદહા એને તુમા તુમહે પાપહા માફ ઓઅયા વોગાર મોઅઇ જાહા, એને આંય જાં જાય રિઅલો હેતાંવ, તાં તુમા નાંય ચી હોકહા.”

22 તોવે ચહૂદી આગેવાનહાય આખ્યાં, “કાય તો પોતાલ માઆઇ ટાકી, ચ્યાહાટી તો એહેકેન આખહે, જાં આંય જાય રોયહો, તાં તુમહાન નાંય યેવાય?”

23 ઈસુવે ચ્યાહાન આખ્યાં, “તુમા યા દુનિયામાય પૈદા ઓઅયાહા, બાકી આંય હોરગામાઅને યેનહો, તુમા દુનિયા હેતા, આંય દુનિયા નાંય હેય.

24 ચાહાટી માયે તુમહાન આખ્યાં, કા તુમા તુમહે પાપહા માફ ઓઅયા વોગાર મોઅઇ જાહા, કાહાકા જોવે તુમા માયેવોય બોરહો નાંય કોઅહા કા તો આંયજ હેતાઉ, તોવે તુમા તુમહે પાપહા માફ ઓઅયા વોગાર મોઅઇ જાહા.”

25 ચહૂદી આગેવાનહાય ઈસુલ પુછ્યાં, “તું કું હેતો?” ઈસુવે ચ્યાહાન આખ્યાં, “જોવેને માયે હિકાડના સુર કોઅયાહાં, તોવેને આંય તુમહાન આખતો યેનહો કા આંય કું હેતાંવ.

26 તુમહે બારામાય માન બોજ કાય આખના એને ન્યાય કોઅના હેય બાકી માન જ્યે દોવાડયો, તો હાચ્યો હેય, એને જીં આંય ચ્યાથી વોનાયોહો, તીજ આંય દુનિયા લોકહાન આખતાહાવ.”

27 ચ્યા નાંય હોમજ્યા કા તો પોરમેહેર આબહા બારામાય આખી રિઅલો આતો.

28 તોવે ઈસુવે ચ્યાહાન આખ્યાં, “જોવે તુમા માન માઅહા પોહાલ હુળીખાંબાવોય ચોડવાહા, તોવે તુમા માયેવોય બોરહો કોઅહા કા આંય તોજ હેતાઉ, એને પોતે આંય કાય નાંય કોઉ, બાકી જેહેકેન પોરમેહેર આબહે માન હિકાડલા હેય, તેહેકેન આંય યો વાતો આખતાહાવ.

29 એને મા દોવાડનારો મા આરે હેય, એ માન યોખલો નાંય છોડયો, કાહાકા આંય કાયમ તીજ કામ કોઅતાહાંવ, જ્યાથી તો ખુશ ઓઅહે.”

30 બોજ લોકહાય જ્યાહાય ઈસુલ યો વાતો કોઅતા વોનાયા, આવોય બોરહો કોઅયો.

હાચ્યાં તુમહાન છુટકો કોઅરી

31 તોવે ઈસુવે આ યહૂદીયા જ્યાહાય ઈસુવે બોરહો કોઅયો, આખ્યાં, “જોવે તુમા મા વચનામાય બોની રાહા, તોવે હાચ્યાં તુમા મા શિષ્ય ગોણાયાહા.

32 એને તુમા હાચ્યાં જાંઅહા, એને હાચ્યાં તુમહાન છુટકો કોઅરી.”

33 આહાય જાવાબ દેનો, “આમા આબ્રાહામા કુળામાઅને હેજે, એને કાદે દિહી કાદા ચાકાર નાંય બોન્યા, તું કેહેકેન આખતોહો કા તુમહે છુટકો ઓઅઈ જાય?”

34 ઈસુવે આહાન જાવાબ દેનો, “આંય તુમહાન હાચ્યાં-હાચ્યાં આખતાહાવ, જું માઅહું પાપ કોઅહે તી પાપા તાબામાંય હેય.

35 એને ચાકાર કાયમ ગોઆમાય નાંય રોય, પોહો કાયમ રોહે.

36 યાહાટી જોવે પોરમેહેરા પોહો તુમહે છુટકો કોઅહે, તો હાચ્યાં તુમહે છુટકો ઓઅઈ જાય.

37 માન ખોબાર હેય કા તુમા આબ્રાહામા કુળામાઅને હેતા, તેરુંબી તુમા મા હિકાડના નાંય પાવ્યાં, યાહાટી તુમા માન માઆઈ ટાકાં કોઅતાહા.

38 આંય તીજ તુમહાન આખતાહાવ જું માયે એઅયા, જોવે આંય પોતાના આબહા આરે આતો. એને તુમા તીજ કોઅતા રોતહા જું તુમહાય તુમહે આબહાથી વોનાલા હેય.”

39 આહાય આલ જાવાબ દેયન આખ્યાં, “આમહે આગલ્યો ડાયો આબ્રાહામ હેય.” ઈસુવે આહાન આખ્યાં, “જોવે તુમા આબ્રાહામા પીડી રોતા, તોવે તુમા જું આબ્રાહામ કોઅતો આતો તી કામ કોઅતા.

40 બાકી આમી તુમા માન માઆઈ ટાકાં હોદતા આતા, કાહાકા માયે તુમહાન હાચ્યાં આખી દેનહા, જું માયે પોરમેહેરા આબહા પાઅને વોનાયો, એહેકેન તે આબ્રાહામાય નાંય કોઅયા.

41 તુમા તુમહે આબહા હારકે કામ કોઅતાહા.” ચ્યાહાય ચ્યાલ આખ્યાં, “આમે વ્યબિચારાથી નાંચ જન્મો જાયહો, આમે તે યોકુજ આબહો હેય એને તો પોરમેહેર હેય.

42 ઈસુય ચ્યાહાન આખ્યાં, જો પોરમેહેર તુમહે આબહો રોતો, તોવે તુમા માયેવોય પ્રેમ કોઅતા, કાહાકા આંચ પોરમેહેરાપાઅને યેનહો, આંચ પોતા કોઇન નાંચ યેનહો, બાકી પોરમેહેરાય માન દોવાડયોહો.

43 આંચ જું આખતાહાવ તી તુમહાન કાહાનાય હોમાજ પોડે? કાહાકા તુમા મા વચન પાળા નાંચ માગેત.

44 તુમા તુમહે આબહો સૈતાનાપાઅને હેતા, એને તુમા તુમહે આબહા ઉસ પુરી કોઅરા માગતાહા, તો તે પેલ્લેથી ખૂની હેય, એને હાચ્યાયેવોય મજબુત નાંચ રોય કાહાકા ચ્યામાય હાચ્યાં હેયેજ નાંચ. જોવે તો ઠોગીન વાત કોઅહે, તોવે તો પોતા મોના વિચાર કોઇન આખહે, કાહાકા તો ઠોગ હેય, એને ઠોગનારાહા આબહો હેય.

45 આંચ હાચ્યાં આખતાહાવ, યાહાટી તુમા માયેવોય બોરહો નાંચ કોઅેત.

46 તુમહેમાઅને કું માન પાપ કોઅના દોષ થોવહે? જોવે આંચ તુમહાન હાચ્યાં આખતાહાવ તોવે તુમા કાહાનાય બોરહો કોઅેત?

47 જો કાદો પોરમેહેરાપાઅને હેય, તો પોરમેહેરા વાતો વોનાયેહે, એને તુમા યાહાટી નાંચ વોનાયે કાહાકા તુમા પોરમેહેરાપાઅને નાંચ હેતા.”

ઈસુ એને આબ્રાહામ

48 યહૂદી આગેવાનહાય ઈ વોનાયને ચ્યાલ જાવાબ દેનો કા, “આમા હાચ્યાં આખજે કા તું સમરૂની હેતો એને તોમાય બુત હેય.”

49 ઈસુવે જાવાબ દેનો, “માંયેમાય બુત નાંચ હેય, બાકી આંચ મા આબહા કદર કોઅતાહાંવ, એને તુમા મા કદર નાંચ કોઅે.

50 આંચ મા કદર નાંચ હોદુ, બાકી યોક હેય જો હોદહે કા મા કદર કોઅલો જાય, એને ઓ તોજ હેય જો ન્યાય બી કોઅહે.

51 આંચ તુમહાન હાચ્યાં-હાચ્યાં આખતાહાવ, જો કાદો માઅહું મા વચન પાળી, તોવે તો અનંતકાળ લોગુ નાંચ મોઅરી.”

52 ઈ વોનાયને યહૂદી લોકહાય આખ્યાં, “આમી આમહાન ખાત્રી ઓઈ ગિઈ કા તોમાય બુત હેય, આબ્રાહામ મોઓઈ ગીયો, એને ભવિષ્યવક્તા બી મોઓઈ ગીઅલા હેય, એને તું આખતોહો કા જીં માઅહું મા વચન પાળી તી કોઈ દિહી નાંય મોઅરી.

53 આમે આબહો આબ્રાહામ તો મોઅઈ ગીયો, કાય તું ચ્યા કોઅતો મોઠો હેય? એને ભવિષ્યવક્તા બી મોઅઈ ગીયા, તોવે તું પોતાલ કાય હોમાજતોહો?”

54 ઈસુવે જાવાબ દેનો, “જો આંય પોતા કોઈન માન હોદુ તોવે મા મહિમા કાયજ નાંય; બાકી મા મહિમા કોઅનારો મા આબહો હેય, એને તુમા આખતાહા, કા તો આમહે પોરમેહેર હેય,

55 તેરુંબી તુમા ચ્યાલ નાંય જાંઅત બાકી ચ્યાલ આંય જાંઅતાહાંવ, એને જો આંય આખું કા ચ્યાલ આંય નાંય જાઅઉ, તોવે આંય તુમહે રોકો ઠોગ બોનહી, આંય ચ્યાલ જાઅતાહુ એને ચ્યા આગના પાળહુ.

56 તુમહે આગલ્યો ડાયો આબ્રાહામ મા યેઅના દિહી એઅરા મિળી યે આશેકોય બોજ મગન આતો, એને મા યેઅના દિહી એઈન તો ખુશ ઓઈ ગીયો.”

57 તોવે યહૂદી આગેવાનહાય ચ્યાલ આખ્યાં, “તું આજુ પોચાહા વોરહા નાંય જાયહો, તો કેહેકેન તુયે આબ્રાહામાલ દેખ્યહો?”

58 ઈસુવે ચ્યાહાન આખ્યાં, “આંય તુમહાન હાચ્યાં-હાચ્યાં આખતાહાવ, આબ્રાહામા જન્મો જાયો ચ્યા પેલ્લા આંય હેતાઉ.”

59 તોવે ચ્યાહાય ઈસુલ ઠોકાંહાટી દોગડા ઈશ્યા, બાકી ઈસુ દેવાળામાઅને ઠાવકોજ જાતો રિયો.

9

જોન્માથી આંદળા દેખતા ઓઅના

1 યોક દિહી જોવે ઈસુ શિષ્યહાઆરે વાટે જાતો આતો, તોવે યોકા જોન્માથી આંદળા માઅહાલ દેખ્યા.

2 એને ચ્યા શિષ્યહાય ચ્યાલ પુછ્યાં કા, “ઓ ગુરુ, કુંયે પાપ કોઅયા ઓરી કા ઓ આંદળો જોનમ્યો, યા માઅહાય કા ચ્યા આયહે આબહાય?”

3 ઈસુવે જાવાબ દેનો, “નાંચ તે ચ્યાય પાપ કોઅલા આતા, નાંચ તે ચ્યા આંચહે આબહાય બાકી યાહાટી આંદળો જોનમ્યો કા પોરમેહેરા સામથ્યાં કામ ચ્યામાય દેખાયાં જોજો.

4 જ્યે માન દોવાડયોહો, ચ્યા હોપલા કામ આમહાન જલદી પુરે કોઅના હેય, કાહાકા રાત યેહે, ચ્યેમાય કાદો કામ નાંચ કોઇ હોકે.

5 જાવ લોગુ આંચ દુનિયામાય હેતાઉ, તાંવ લોગુ આંચ દુનિયા ઉજવાડો હેતાઉ.”

6 ઈઆખીન તો દોરતીવોય થુપ્યો એને થુપે કોઇન કાદુ મોગલ્યો, એને તો કાદુ ચ્યા ડોળાહાવોય ચોપડયો,

7 એને આખ્યાં, “જો, તો મું શિલોહ કુંડામાય દોવી લે,” તો ગીયો એને દોવ્યા એને દેખતો ઓઇન ફિરી યેનો.

8 તોવે ચ્યા પડોસી લોકહાય એને જ્યા પેલ્લા તો માગે તોવે ચ્યાલ એઅતા આતા, ચ્યા ચોકા બિજાલ આખા લાગ્યા, “કાય ઓ તો નાંચ હેય, જો બોહીન બિખ માગતો આતો?”

9 તોવે કોલાહાક લોક આખે, “ઓ તોજ હેય,” બિજા આખે “નાંચ, બાકી ચ્યા રોકો હેય” બાકી ચ્યે આખ્યાં, “આંચ તોજ હેતાઉ.”

10 તોવે ચ્યા ચ્યાલ પુછા લાગ્યા, “તુલ તો નોજાર કેહેકેન મિળી ગીયી?”

11 ચ્યાય જાવાબ દેનો, “ઈસુ નાંવા ચોક માઅહે કાદુ મોગલ્યો એને મા ડોળાહાવોય ચોપડયો, એને ચ્યે માન આખ્યાં, શિલોહ કુંડ માય જાયન મું દોવી લે, તોવે આંચ ગીયો એને દોવ્યા પાછે એઅતો લાગ્યો.”

12 ચ્યાહાય ચ્યાલ પુછ્યાં, “તો કેઇ હેય?” ચ્યે આખ્યાં, “માન ખોબાર નાંચ.”

પોરૂષીયાહાથી હારો જાયો ચ્યાલ પૂછના

13-14 જ્યે દિહે ઈસુય કાદુ મોગલીન ચ્યા માઅહાલ એઅતો કોઅયો, તો આરામા દિહી આતો. યાહાટી લોક જો પેલ્લા આંદળો આતો ચ્યાલ પોરૂષીયા પાય લેય ગીયા.

15 તોવે પોરૂષીયાહાય બી ચ્યાલ પુછ્યાં, “તુલ તો નોજાર કેહેકેન મિળી ગીયી? ચ્યાય ચ્યાહાન આખ્યાં ચ્યાય ડોળાહાવોય કાદુ લાવ્યો, એને માયે દોવી લેદા, એને આંચ આમી એઅતાહાવ.”

16 તોવે કોલાહાક પોરૂષી આખા લાગ્યા, “ઈ માઅહું પોરમેહેરા એછને નાંય હેય, કાહાકા તો આરામા દિહી નાંય પાળે,” બાકી બીજહાંય આખ્યાં, “પાપી માઅહું ઓહડા ચમત્કાર કેહેકેન કોઇ હોકહે?” એને ચ્યાહામાય કુટ પોડી ગીયી.

17 ચ્યાહાય ચ્યા આંદળાલ પાછા આખ્યાં, “જ્યે તુલ દેખતો કોઅયો, ચ્યા બારામાય તું કાય આખતોહો” તોવે ચ્યે જાવાબ દેનો, “તો ભવિષ્યવક્તા હેય?”

18 બાકી યહૂદી આગેવાનહાય બોરહો નાંય કોઅયો કા તો આંદળો આતો એને દેખતો ઓઅઇ ગીયો, જાવ લોગુ ચ્યાહાય ચ્યા આંદળા આયહે આબહાલ હાદિન નાંય પુછ્યાં.

19 કા, “કાય ઓ તુમહે પોહો હેય, જ્યાલ તુમા આખતેહે કા આંદળો જોનમ્યો? તોવે આમી કેહેકેન એઅઇ હોકહે?”

20 ચ્યા આયહે આબહે જાવાબ દેનો કા, “આમા જાંઅજેહે કા ઓ આમહે પોહો હેય, એને આંદળો જોનમ્યો.

21 બાકી આમી કેહેકેન દેખતો જાયો, તીં આમા નાંય જાંઆજે, એને નાંય ઈ જાંઆજે, કા કુંચે ચ્યા ડોળા ઉગડાવ્યા, ચ્યાલુજ પુછી લા, તો પોતા બારામાય પોતેજ આખી દેઅરી.”

22 ચો વાતો ચ્યા આયહે આબહાય યાહાટી આખ્યો, કાહાકા ચ્યાહાન યહૂદી આગેવાનહા દાક આતી, કાહાકા યહૂદી આગેવાનહાય નોક્કી કોઅયેલ કા, જું માઅહું ઈસુવોય બોરહો કોઅે કા તો ખ્રિસ્ત હેય, ચ્યાલ સોબાયે ઠિકાણા માઅને કાડી દેવામાય યેય.

23 ચ્યાહાટી ચ્યા આયહે આબહાય આખ્યાં કા, “તો આખી હોકહે ઓલો મોઠો હેય, ચ્યાલુજ પુછી લા.”

24 તોવે યહૂદી આગેવાનહાય જો આંદળો આતો ચ્યાલ બીજેદા હાદિન પુછ્યાં, “હાચ્યાં આખીન પોરમેહેરા સ્તુતિ કોઅો, આમહાન ખોબાર હેય કા તો માઅહું પાપી હેય.”

25 ચ્યે જાવાબ દેનો, “તો પાપી હેય કા નાંય, તીં આંય નાંય જાઅઉ ઓલહાંજ જાંઅહું કા, આંય આંદળો આતો, એને આમી આંય દેખતો જાયહો.”

26 તોવે ચ્યાહાય ચ્યાલ પાછા પુછ્યાં, “તુલ ચ્યે કાય કોઅયા? તુલ કેહેકેન દેખતો કોઅયો?”

27 ચ્યે ચ્યાહાન જાવાબ દેનો, આંય તુમહાન આખી ચુક્યો, એને તુમા નાંય વોનાયા, આમી બીજેદા કાહા વોનાયા માગતાહા? તુમાબી ચ્યા શિષ્ય બોના કા?”

28 તોવે ચ્યાહાય ચ્યા નિંદા કોઇન આખ્યાં, “તુંજ ચ્યા શિષ્ય હેય, આમા મૂસા શિષ્ય હેજે.

29 આમા જાંઅજેહે કા પોરમેહેરે મૂસાઆરે વાતો કોઅયો બાકી ઓ કેછને હેય તીં આમહાન ખોબાર નાંય.”

30 ચ્યે માઅહે ચ્યાહાન આખ્યાં, “એરે ઈ તે, નોવાયે વાત હેય કા એલે માન દેખતો કોઅયો તેરુંબી તુમા નાંય જાંઅતાહા કા તો કેછને હેય.

31 આમા જાંઅજેહે કા, પોરમેહેર પાપી લોકહા નાંય વોનાયે, બાકી જું માઅહું પોરમેહેરા ભક્ત હેય એને પોરમેહેરા મોરજયેકોય જીવહે, તો ચ્યા વોનાયેહે.

32 જોવેને દુનિયા બોની તોયાં આજેલોગુ આપા ઈ નાંય વોનાયા, કા કાદેબી જન્માથી આંદળાલ દેખતો કોઅયો ઓરી.

33 જોવે તો પોરમેહેરા એછને નાંય રોતો, તોવે તો કાયબી નાંય કોઇ હોકતો.”

34 ચ્યાહાય ચ્યાલ જાવાબ દેનો, “તું તો પેલ્લેથી પાપામાંય જોનમ્યોહો, તું આમહાન કાય હિકાડતોહો?” તોવે ચ્યાહાય ચ્યાલ સોબાયે ઠિકાણા માઅને બાઆ કાડી દેનો.

આત્મિક આંદળા

35 ઈસુ વોનાયો, કા યહૂદી આગેવાનહાય ચ્યાલ બાઆ કાડી દેનહો, એને જોવે તો મિળ્યો, તોવે ચ્યે આખ્યાં, “તું માઅહા પોહાવોય બોરહો કોઅતોહો કા?”

36 ચ્યાય જાવાબ દેનો, “ઓ સાયબ, માન આખ કા ઓ પોરમેહેરા પોહો કું હેય, કા આંય ચ્યાવોય બોરહો કોઇ હોકુ?”

37 ઈસુવે ચ્યાલ આખ્યાં, “આંય પોરમેહેરા પોહો હેય, તું પેલ્લા માન એઇ ચુક્યોહો, આંય તોજ હેય જો આમી તોઆરે વાતો કોઇ રિઅલો હેય.”

38 એ આખ્યાં, “ઓ પ્રભુ, આંય તોવોય બોરહો કોઅતાહાંવ” એને તો ઈસુ પાગે પોડયો.

39 એને ઈસુવે આખ્યાં, “આંય દુનિયામાય ન્યાય કોઅરાહાટી યેનો, યાહાટી કા જ્યે એઅઇ નાંય હોકેત એ એએ, એને જ્યા એઅતાહા ય્યા આંદળા બોની જાય.”

40 પોરૂષીયાહા માઅને કોલહાક તાં ય્યાઆરે આતા ય્યા યો વાતો વોનાયને, એને ય્યાહાય ય્યાલ આખ્યાં, “કાય તું આખી રિયહો કા આમા બી આંદળા હેજે?”

41 ઈસુવે ય્યાહાન આખ્યાં, “જોવે તુમા આંદળા રોતા તોવે તુમહે પાપ નાંય ગોણાતાં, બાકી આમી આખતાહા કા આમા એઅજેહે, યાહાટી તુમહે પાપ માફ નાંય કોઅલા જાય.”

10

ગેર્ટે એને ગેટાહા ગોવાળા દાખલો

1 “આંય તુમહાન હાચ્યાં-હાચ્યાં આખતાહાવ, જો કાદો ગોઠામાય બાઆણામાય રોઇન નાંય બાકી બીજે કાને રોઇન ઉરાઇ જાય, તો બાંડ એને લુટારો હેય.

2 બાકી ગેટાહા ગોવાળ બાઆણામાય રોઇન જાહે.

3 ય્યાહાહાટી મેંડવાળ્યો બાઆણા ઉગાડેહે, એને ગેર્ટે ય્યા આવાજ વોળાખતેહે, એને તો ય્યા ગેટાહાન નાંવે કોઇન હાત કોઅહે એને ય્યાહાન બાઆ લેય જાહે.

4 એને જોવે બોદા ગેટહાન બાઆ કાડહે, તોવે તો ય્યાહા આગલા ચાલહે એને ગેર્ટે ય્યા પાહલા ચાલતેહે કાહાકા એ ય્યા આવાજ વોળાખતેહે.

5 એ ઓજાણ્યા પાહલા નાંય ચાલી, બાકી ય્યાપાઅને નાહાતેહે, કાહાકા ઓજાણ્યા આવાજ એ નાંય વોળખેત.”

6 ઈસુવે ય્યાહાન ઓ દાખલો આખ્યો, બાકી ય્યા નાંય હોમજ્યા કા ય્યા આખના કાય મતલબ આતો.

ઈસુ હાચ્યો ગોવાળ

7 તોવે ઈસુવે ય્યાહાન પાછા આખ્યાં, “આંય તુમહાન હાચ્યાં-હાચ્યાં આખતાહાવ, ગેટહા બાઆણા આંય હેતાઉ.

8 મા આગલા જોલા યેના ચ્યા બોદા બાંડ એને લુટાર હેય, બાકી મા ગેટ્ટે ચ્યાહા નાંય વોનાયે.

9 બાઅણા આંય હેતાઉ, માયેમાઅને રોઇન માજે યેહે ચ્યા પોરમેહેર તારણ કોઅરી, એને માજે એને બાઆ યે-જાં કોઅરી એને ચ્યાલ ખાંહાટી ચારો મિળી.

10 બાંડ ખાલી ચોરી કોઅરા, માઆઇ ટાકાં એને નાશ કોઅરા હાટીજ યેહે, આંય ચાહાટી યેનહો કા ચ્યા પુરી રીતેકોય જીવતા રોય.

11 હારો ગોવાળ આંય હેતાઉ. હારો ગોવાળ ચ્યા ગેટહા હાટી જીવ દેહે.

12 બાડાવોય રાખલો નોકાર જોવે આસાલ્યેલ યેતો એએ, તોવે ગેટહાન છોડીન નાહી પોડહે, કાહાકા ગેટ્ટે ચ્યા નાંય હેય, એને તો ચ્યાહા ગોવાળ નાંય હેય, ચ્યાહાટી વરુ ચ્યાહાવોય હમલો કોઅહે, એને ટોળાલ આલાગ-આલાગ કોઇ દેતહે.

13 તો ચાહાટી નાહી પોડહે કાહાકા તો નોકાર હેય, એને ચ્યાલ ગેટહા ચિંતા નાંય હેય.

14 હારો ગોવાળ આંય હેતાઉ, એને આંય મા ગેટહાન જાંઅતાહાંવ, એને મા ગેટ્ટે માન જાંઅતેહે.

15 જેહેકેન આબહો માન જાંઅહે એને આંય આબહાલ જાંઅતાહાંવ, એને મા ગેટહા હાટી આંય મા જીવ દેતહાવ.

16 એને મા આજુ બીજે ગેટ્ટે હેતે, ચ્યે યા ગોઠામાઅને નાંય હેતે, મા ચ્યાહાનબી લેય યેયના જરુરી હેય, ચ્યે મા આવાજ વોળખી, તોવે યોકુજ ટોળો એને યોકુજ ગોવાળ રોય.

17 આબહો માયેવોય ચાહાટી પ્રેમ કોઅહે, કાહાકા આંય મા જીવ દેતહાવ, કા ચ્યાલ પાછા લેય લાવ.

18 મા જીવ માયેપાઅને કાદો પેચકી નાંય લેય, બાકી આંય મા મોરજી કોઇન દેતહાવ, માન ચ્યાલ દેઅના બી ઓદિકાર હેય, એને પાછા લેઅના બી ઓદિકાર હેય, ઈ આગના મા આબહે માન દેનહી.”

19 યે વાતહે લેદે યહૂદી આગેવાનહામાય પાછી કુટ પોડી ગીચી.

20 ચ્યાહામાઅને બોજ જાંએ આખે કા, “ચ્યામાય બુત હેય, એને તો ગાંડવાઈ ગીયહો, ચ્યા નાંય વોનાના?”

21 બીજહાંય આખ્યાં, “યો વાતો ઓહડા માઅહા નાંય જ્યામાય બુત રોય, યોક બુત કોય દિહે આંદળાલ નોજાર નાંય દી હોકે.”

યહૂદીયાહા બોરહો નાંચ કોઅના

22 તોવે યેરૂસાલેમ શેહેરામાય દેવાળા ઉદઘાટનાલ યાદ કોઅના સણ આતો એને હિયાળા મોસમ આતો.

23 એને ઈસુ દેવાળામાય સુલેમાના પારસાળી માય ફિરતો આતો.

24 તોવે યહૂદી આગેવાનહાય ઈસુપાય ટોળો વોળીન પુછ્યાં, “તો બારામાય આમે મોનામાય કોવે લોગુ શંકામાય રોજે? જો તું ખ્રિસ્ત હેતો, તે આમહાન ખુલ્લી રીતે આખી દે.”

25 ઈસુવે ચ્યાહાન જાવાબ દેનો, “માયે તુમહાન આખી દેના, એને તેરુંબી તુમા બોરહો નાંચ કોઅેત, જું કામ આંચ મા પોરમેહેર આબહા ઓદિકારા કોઇ કોઅતાહાંવ તીજ મા સાક્ષી હેય.

26 બાકી તુમા યાહાટી બોરહો નાંચ કોઅેત, કાહાકા તુમા મા ગેટહામાઅને નાંચ હેતા.

27 જેહેકેન મા ગેટે આસલી ગોવાળા આવાજ વોળાખતેહે, તેહેકેનુજ મા લોક મા વાતે વોય ધ્યાન દેતહા, આંચ ચ્યાહાન વોળાખતાહુ, એને ચ્યા મા શિષ્ય બોની ગીઅલા હેય.

28 એને આંચ ચ્યાહાન અનંતજીવન દેતહાવ એને ચ્યે કોય દિહે નાશ નાંચ ઓઅરી, એને ચ્યાહાન કાદો માયે વોઅને પેચકી નાંચ લેય.

29 મા આબહે, જ્યાંચ ચ્યાહાન માન દેનહે, બોદહા કોઅતો તો મોઠો હેય, એને ચ્યાહાલ આબહા વોયને કાદો પેચકી નાંચ હોકે.

30 આંચ એને આબહો ચોક હેજે.”

31 તોવે પાછા ચોકદા યહૂદી આગેવાનહાય ચ્યાલ ઠોકાંહાટી દોગાડ ઈશ્યા.

32 તોવે ઈસુવે ચ્યાહાન આખ્યાં, “માયે તુમહાન મા આબહા ઇહિને બોજ હારે કામે દેખાડયેહે, ચ્યાહામાઅને કોઅહા કામાહાટી તુમા માન દોગાડાટા કોઅતાહા?”

33 યહૂદી આગેવાનહાય ચ્યાલ જાવાબ દેનો, “હારાં કામાહાટી તુલ નાંચ દોગાડાટી દેજે બાકી પોરમેહેરા નિંદાયે હાટી કાહાકા તું માઅહું છતા, પોરમેહેર હેતાઉ એહેકેન આખતોહો.”

34 ઈસુવે ચ્યાહાન જાવાબ દેનો, “કાય તુમહે નિયમશાસ્ત્ર માય એહેકેન નાંચ લોખલાં હેય, માયે આખ્યાં, ‘તું ઈશ્વર હેય’?”

35 જ્યાહાન પોરમેહેરા વચન મિળ્યાં, જોવે ચ્યાહાન પવિત્રશાસ્ત્ર ઈશ્વર આપે, તો પવિત્રશાસ્ત્રા નિંદા નાંચ ઓએ?

36 જોવે આંચ આખડુ, આંચ પોરમેહેરા પોહો હેય, તોવે તુમા માન કાહા આખતાહા, કા તું નિંદા કોઅતોહો, આંચ તોજ હેય, જ્યાલ આબહે આલાગ કોઅયો એને દુનિયામાય દોવાડયો.

37 જોવે આંચ મા આબહા કામ નાંચ કોઉ, તોવે માયેવોય બોરહો મા કોઅહા.

38 બાકી જોવે આંચ કોઅતાહાંવ, તે માયેવોય બોરહો નાંચ બી કોઅહા, બાકી ચ્યા કામહાવોય બોરહો રાખા, કા તુમા જાંઆય એને હુમજે કા આબહો માયે માય હેય એને આંચ આબહામાય હેય.”

39 તોવે ચ્યા પાછા ચ્યાલ દોઅરાં કોઅેત, બાકી તો ચ્યાહાપાઅને દુઉ જાતો રિયો.

40 પાછે ઈસુ ચારદેન નોયે એમેરે જાતો રિયો, જાં પેલ્લા યોહાન બાપતિસ્મા દેતો આતો એને તાં રિયો.

41 બોજ જાંએ ચ્યાપાય યેયન આખા આર્તે, “યોહાને તે કાય ચમત્કારા કામ નાંચ દેખાડયા, બાકી યા માઅહા બારામાય યોહાને જીં કાય આખ્યાં તીં બોદા હાચ્યાં આતા.”

42 એને તાઅને બો બોદા લોકહાય ચ્યાવોય બોરહો કોઅયો.

11

લાજરસા મોઅઇ જાયના

1 મરિયમ એને ચ્યે બોઅહીં માર્થાયે ગાંવ બેથાનીયામાય લાજરસ નાંવા ચોક માઅહું બિમાર આતો.

2 ઈ તીજ મરિયમ આતી, જ્યેય પાછે પ્રભુ પાગહાવોય મોઅગાંં સુગંદી અત્તાર ચોપડીન ચ્યા પાગ પોતે કિહહા કોઇન નુંહયા, ચ્યે બાહા લાજરસ બિમાર આતો.

3 તોવે ચ્યા બોઅયેહે ઈસુવાઇહી આખી દોવાડયા, “ઓ પ્રભુ, એએ, જ્યાવોય તું પ્રેમ કોઅતોહો તો બિમાર હેય.”

4 ઈ વોનાઈન ઈસુવે આખ્યાં, “ઈ બિમારી મોઅરાંહાટી નાંચ હેય, બાકી પોરમેહેરા મહિમાહાટી હેય, કા ચ્યાકોય પોરમેહેરા પોહા મહિમા ઓએ.”

5 ઈસુ માર્થા એને ચ્યે બોઅહી મરિયમ એને લાજરસાવોય પ્રેમ કોઅતો આતો.

6 બાકી ઈસુ વોનાયો, કા લાજરસ બિમાર હેય, એને જાં તો આતો, તાંજ બેન દિહી રોય ગીયો.

7 બેન દિહહયા પાછે ઈસુચ ચ્યા શિષ્યહાન આખ્યાં, “ચા, આપા પાછા યહૂદીયા વિસ્તારમાય જાતા.”

8 શિષ્યહાય ચ્યાલ આખ્યાં, “ઓ ગુરુ, આમીજ યહૂદી આગેવાન તુલ દોગડાટીન માઆઇ ટાકાં કોઅેત એને તું તાં પાછો જાં કા?”

9 ઈસુવે જવાબ દેનો, “કાય દિહા બાર કોલાક નાંચ રોય? જોવે કાદો દિહા ચાલે, તો ઠોકાતો નાંચ જાય, કાહાકા દિહા ઉજવાડા કોય ચ્યાલ દેખાયેહે.

10 બાકી જોવે કાદો રાતી ચાલે, તો ઠોકાતો જાય, કાહાકા ચ્યાપાય ઉજવાડો નાંચ હેય.”

11 ચ્યાય યો વાતો આખ્યો, એને પાછે તો ચ્યાહાન આખા લાગ્યો, “આપહે દોસ્તાર લાજરસ હૂવી ગીયહો, બાકી આંચ ચ્યાલ ઉઠાડાંહાટી જાતહાવ.”

12 તોવે શિષ્યહાય ચ્યાલ આખ્યાં, “ઓ પ્રભુ, તો હૂવી ગીયહો, તોવે પાછો હારો ઓઅઇન બોચાવલો જાય.”

13 ઈસુવે ચ્યા મોતા બારામાય આખલા આતા, બાકી ચ્યા હોમજ્યા તે નિંદેમાય હૂવી જાઅના બારામાય હોમજ્યા.

14 તોવે ઈસુવે ખુલ્લાં આખ્યાં, “લાજરસ મોઅોઈ ગીયહો.

15 એને આંચ તાં નાંચ આતો, ચ્યાહાટી તુમહે ફાયદાહાટી ખુશ હેતાઉ કા આંચ તાં નાંચ આતો, જેથી તુમા બોરહો કોઆ. બાકી આમી યા, આપા ચ્યાપાય જાતા.”

16 તોવે થોમાય જ્યાલ દિદુમુસ આખે, ચ્યાઆરે શિષ્યહાન આખ્યાં, “ચાલા, આપાબી ચ્યાઆરે મોઅરા જાતા.”

ઈસુ મોઅલામાયને જીવતા ઓઅના

17 જોવે ઈસુ બેથાનીયામાય યેય પોઅચ્યો તોવે ચ્યાલ માલુમ જાયા કા લાજરસાલ માહણામાય થોવિન ચાર દિહી ઓઈ ગીયહા.

18 બેથાનીયા ગાવા ચેરસાલેમ શેહેરા પાહાય લગભગ ત્રીન કિલોમીટર દુર આતા.

19 એને બોજ યહૂદી લોક માર્થા એને મરિયમ પાય ચેહે બાહા લાજરસા બારામાય દિલાસો દાં યેનલે.

20 માર્થા ઈસુ યેયના ખોબાર વોનાઈન તી ચ્યાલ મિળાં ગીયી, બાકી મરિયમ ગોઅજ રિયી.

21 તોવે માર્થાયે ઈસુવાલ આખ્યાં, “પ્રભુ તુલ ઈહીં રા જોજતાં, તોવે મા બાહા નાંય મોઅતો.

22 એને આમીબી આંય જાંઅહુ કા તું પોરમેહેરાપાઅને જીં કાય માગહે તી પોરમેહેર તુલ દેઅરી.”

23 ઈસુય ચેલ આખ્યાં, “તો બાહા પાછો જીવી ઉઠી.”

24 માર્થા ચ્યાલ આખ્યાં, “માન ખોબાર હેય, ન્યાય કોઅના દિહે જોવે બોદે મોઅલા માઅને પાછા જીવી ઉઠી તોવે તો પાછો જીવતો ઉઠી.”

25 ઈસુવે ચેલ આખ્યાં, “આંય તો હેતાંવ જો મોઅલા માઅને પાછો જીવતો ઉઠયહો, જો કાદો માયેવોય બોરહો કોઅહે તો મોઅઇબી જાય, તેરુંબી જીવી.

26 જો માંયેમાય જીવહે એને માયેવોય બોરહો કોઅહે તો કોય દિહે નાંય મોઅરી. કાય તું યે વાતવોય બોરહો કોઅતીહી કા?”

27 ચે આખ્યાં, “હાં, પ્રભુ, આંય બોરહો કોઅત્યાહાંવ કા તું પોરમેહેરા પોહો ખ્રિસ્ત હેતો જો દુનિયામાય યેનારો આતો, તો તુંજ હેય.”

લાજરસાલ જીવતો કોઅના

28 ઈ વાત આખીન તી જાતી રોયી એને ચે બોઅહી મરિયમેલ ઠાવકાજ હાદિન આખ્યાં, “ગુરુ ઈહીંજ હેય, એને તુલ હાદહે.”

29 તી વોનાતાજ તારાત ઉઠી એને ચ્યાલ મિળાં ગીયી.

30 ઈસુ આજુ ગાવા બાઆ આતો, જાં માર્થા મિળ્યેલ તાંજ આતો.

31 તોવે જ્યા યહૂદી લોક મરિયમે આરે ગોઅમે આર્તે, એને ચેલ દિલાસો દી રીઅલે આર્તે, ચ્યાહાય મરિયમેલ તારાત ઉઠીન બાઆ જાતી દેખી, તોવે ચ્યા ચે પાહલા-પાહલા ગીયે કાહકા ચ્યા એહેકોય હોમજ્યા કા તી માહણામાય રોડાં હાટી જાહાય.

32 જોવે મરિયમ જાં ઈસુ આતો તાં જાય પોઅચી તોવે ચ્યાલ દેખતાજ તી ચ્યાલ પાગે પોડી એને ચ્યે આખ્યાં, “પ્રભુ તું ઈહીં રોતો તોવે મા બાહા નાંચ મોઅતો.”

33 જોવે ઈસુવે ચ્યેલ એને ચ્યે આરે યેનલા ચહૂદી લોકહાનબી રોડતા દેખ્યા તોવે ચ્યે હુંઅકા ટાક્યા, બોજ નિરાશ ઓઈ ગીયો.

34 ઈસુવે આખ્યાં, “તુમહાય ચ્યાલ કેછ થોવહ્યો?” ચ્યાહાય આખ્યાં, “પ્રભુ, ચાલીન એય લે.”

35 ઈસુ રોડયો.

36 તોવે ચહૂદી લોકહાય આખ્યાં, “એઆ, તો ચ્યાવોય કેહેકે પ્રેમ કોઅતો આતો.”

37 બાકી ચ્યાહામાઅને કોલહેક જાંએ આખા, “લાગ્યે, કા જ્યે આંદળાલ દેખતો કોઅયેલ તો લાજરસાલ મોઅનાથી બોચાવી હોકતો?”

38 ઈસુ બોજ નિરાશ ઓઇન માહાણા પાય યેનો, તાં ચોક ગોડદો આતો એને મોઠો દોગાડ ચ્યા બોગારા આલુડ કોઅલો આતો.

39 ઈસુય આખ્યાં, “દોગાડ ફેડી ટાકાં” મોઅલા માઅહા બોઅહી માર્થા ચ્યાલ આખા લાગી, “પ્રભુ, આમી ગાંદાતા ઓરી, કાહાકા ચ્યાલ મોઈન ચાર દિહી ઓઈ ગીઅલા હેય.”

40 ઈસુય ચ્યેલ આખ્યાં, “કાય માયે તુલ નાંચ આખ્યેલ કા, જોવે તું બોરહો કોઅહે, તોવે તું પોરમેહેરા મહિમા એએહે?”

41 તોવે ચ્યાહાય દોગાડાલ ફેડી લેદો, પાછે ઈસુવે ઉચે નોજાર કોઇન આખ્યાં, “ઓ આબા આંચ તો આભાર માનતાહુ કાહાકા તુયે મા વોનાય લેદા.

42 એને આંચ જાંઅતાહાંવ કા સાદા મા વોનાતોહો, બાકી જું ગીરદી આજુ-બાજુ ઉબલી હેય, ચ્યાહા લીદે માયે મોઠેરે બોંબલીન આખ્યાં, જ્યાથી ચ્યા બોરહો કોએ, કા તુયે માન દોવાડયોહો.”

43 એહેકેન આખીન બોંબલ્યો, “ઓ લાજરસ બાઆ નિંગી યે.”

44 જો મોઓઈ ગીઅલો આતો, તો માઅહું બાઆ નિંગી યેનો, ચ્યા આથ પાગ ફાડકા કોઇન વેટાળલા આતા, એને ચ્યા મુંવોય ચોક રંબાળ વેટાળી દેનલો આતો, તોવે ઈસુવે આખ્યાં, “ચ્યા વોયને ફાડકે છોડી દિયા,

એને ચ્યાલ જાં દા.”

ઈસુ વિરુદ્ધ કાવત્રા

(માથ્થી 26:1-5; માર્ક 14:1-2; લુક. 22:1-2)

45 જ્યા યહૂદી લોક મરિયમ આરે યેનલા આતા, એને ઈસુવે કાય ચમત્કાર કોઅયા તી દેખ્યાં, તોવે ચ્યાહામાઅને બો બોદા માઅહાય ચ્યાવોય બોરહો કોઅયો.

46 બાકી ચ્યાહામાઅને કોલાહાક જાંઆ પોરૂષીયાહા પાય ગીયા એને ઈસુ ચમત્કારા કામહા બોબાર દેની.

47 તોવે મુખ્ય યાજક એને પોરૂષીયાહાય મોઠી સોબા લોકહાન હાદિન પુછ્યાં, “આપા કાય કોઅજેહે? ઈ માઅહું તે બોજ ચમત્કાર કોઅહે.

48 જો આપા ચ્યાલ નાંચ રોકજે, તોવે બોદે માઅહે ચ્યાલ ખ્રિસ્તા રુપામાય બોરહો કોઅરી એને રોમી ઓદિકારી યેઇન યા દેવાળાલ એને યા લોકહા નાશ કોઅરી.”

49 તોવે ચ્યાહામાઅને કાયફા નાંવા સોબા સભ્ય આતો તો ચ્યા વોરહા મહાયાજક આતો, એ ચ્યાહાન આખ્યાં, “તુમા કાયજ નાંચ જાંએત.

50 લોકહાહાટી યોકા માઅહાય મોઅરા જોજે એને બોદા દેશહા નાશ નાંચ ઓઅરા જોજે, ઈ તુમહેહાટી ફાયદા હેય, ઈ બી તુમહાન નાંચ હોમજાય.”

51 એ પોતા કોઇન એહેકોય નાંચ આખ્યાં, બાકી એ વોરહે મહાયાજક રોઇન ચ્યા મુંચેકોઇન પોરમેહેરે વાત કોઅયી, કા ઈસુ ઈસરાયેલ લોકહાહાટી મોઅઇ જાનારો આતો.

52 ઈસુ ઈસરાયેલ લોકહાહાટી ઓલાહાંજ નાંચ, બાકી પોરમેહેરા બિજા લોક જ્યા બોદે દોરતીવોય વિખરાઈ ગીઅલે હેય, ચ્યાહાહાટી બી મોઅરી, કા ચ્યા બેનહ્યાન યોકઠે કોય હોકે.

53 તોવે ચ્યા દિહાપાઅને યહૂદી આગેવાન ઈસુલ માઆઇ ટાકાં યુક્તિ કોઅરા લાગ્યા.

54 એ વાતે લીદે ઈસુ પાછે ખુલ્લી રીતે યહૂદી લોકહામાય નાંચ ફિર્યો, બાકી તાઅને નિંગીન ઉજાડ જાગા પાહીને વિસ્તાર, એફરાઈમ ગાવામાય જાતો રિયો એને ચ્યા શિષ્યહાઆરે તાંજ રા લાગ્યો.

55 આમી યહૂદીયાહા પાસ્કા સણ પાહાય આતો એને બો બોદા લોક પાસ્કા સણા પેલ્લા, દેવાળામાય પોતાલ ચોખ્ખાં કોઅરાહાટી ગાવામાઅને યેરૂસાલેમ શેહેરામાય યેનલા આતા.

56 એ ઈસુવાલ હોદતે લાગ્યે એને દેવાળામાય ઉબા રોઇન ચોકબિજાલ આખતે લાગ્યે, “તુમહાન કાય લાગે? કાય તો સણામાય નાંય યી?”

57 એને મુખ્ય યાજક એને પોરૂષીયાહાય આગના કોઅલી આતી, જ્યા કાદાલ ખોબાર હેય કા ઈસુ કેછ હેય તો ચ્યાહાન આખે, કા ઈસુલ દોઅઇ હોકે.

12

બેથાનીયામાય ઈસુ આવકાર

(માથ્થી 26:6-13; માર્ક 14:3-9)

1 પાછો ઈસુ પાસ્કા સણા આજુ છ દિહા પેલ્લા બેથાનીયા ગાવામાય યેનો, જાં ચ્યાય લાજરસાલ મોઅલા માઅને જીવતો કોઅલો આતો.

2 તાં ચ્યાહાય ચ્યાહાટી ખાઅના બોનાવલા આતા, એને માર્થા ખાઅના વાટતી આતી, એને લાજરસ ઈસુવાઆરે ખાનારાહા માઅને ચોક બોઠલો આતો.

3 તોવે મરિયમ ચોક હેર (ચોક હેર એટલે આરદો કિલો) બો મોઅગાં સુગંદી અત્તાર લેય યેની એને ઈસુવા પાગહાલ ચોપડી દેના એને તી ટોલપી કીહીંયે કોઇન નુહી ટાક્યા એને બોદા ગુઉ ચ્યા તેલા કોઇન સુગન્દિત ઓઈ ગીયા.

4 બાકી ચ્યા શિષ્યહા માઅને યહૂદા ઇસ્કારીયોત નાંવા ચોક શિષ્ય જો ચ્યાલ દોઆડી દેનારો આતો, આખા લાગ્યો.

5 “ઈ અત્તાર તીન હોવ દીનારાહામાય (ચોક દીનાર એટલે ચોક દિહા કાંબારાં) વેચિન ચ્યા પોયહા ગોરીબાહાન કાહાનાય દેના?”

6 ચ્યાય ઈ ચાહાટી નાંય આખ્યાં, કા ચ્યાલ ગોરીબાહા ચિંતા આતી, બાકી ચાહાટી આખ્યાં તો બાંડ આતો એને પોયહા ઠેલી ચ્યાપાય રોય એને ચ્યેમાઅને તો દુબીન કાડી લેતો આતો.

7 તોવે ઈસુવે આખ્યાં, “તી સોમાયા પેલ્લા માન ડાટના તિયારી હાટી ઈ કોઇ રિઅલી હેય.

8 કાહાકા ગોરીબ લોક તો તુમહેપાય કાયામુંજ રોતેહે બાકી આંય તુમહેપાય કાયામ નાંય રોહી.”

લાજરસાલ માઆઇ ટાકાંહાટી કાવત્રા

9 જોવે ચહૂદી લોક વોનાયા કા ઈસુ તાં હેય, તોવે લોકહા ચોક મોઠી ગીરદી તાં યેની, એ ઈસુવાલુજ નાંય, બાકી લાજરસાલ એઅરા હાટીબી યેનલે આર્તે, જ્યાલ એ મોઅલા માઅને જીવતો કોઅયેલ.

10 બાકી મુખ્ય યાજકાહાય લાજરસાલ બી માઆઇ ટાકના કાવત્રા કોઅયા.

11 કાહાકા આ લીદે ચહૂદીયાહા માઅને બો બોદે માઅહે ચહૂદી આગેવાનહાન છોડીન જાતા રોયા, એને ઈસુવોય બોરહો કોઅયો.

ઈસુવા યેરૂસાલેમ શેહેરામાય વિજય

(માથ્થી 21:1-11; માર્ક 11:1-11; લુક. 19:28-40)

12 બીજે દિહે બો બોદા લોક જ્યા સણામાય યેનલા આતા, ઈ વોનાયને કા, ઈસુ યેરૂસાલેમ શેહેરામાય યી રિયહો.

13 તોવે આહાય ખુજરિયે ફીફર્યે આથામાય લેઈને આલ મિળાહાટી નિંગી યેને, એને મોઠેરે બોબલા લાગ્યે, “હોસાન્ના, ધન્ય ઈસરાયેલા રાજા, જો પ્રભુ નાંવા કોય યેહે.”

14 જેહેકોય ઈસુ યેરૂસાલેમ શેહેરામાય યેનો આલ ચોક કુરક્યા ગોદડા વાછડાં મિળ્યાં, તોવે તો આવોય બોહી ગીયો, જેહેકેન પવિત્રશાસ્ત્રમાય લોખલાં હેય.

15 “ઓ યેરૂસાલેમ શેહેરા લોકહાય, બીયહા મા, એઆ, તુમહે રાજા તુમહેપાય કુરક્યા ગોદડા વાછડા ઉપે બોહીન યેહે.

16 ઈસુ શિષ્ય, ઈ વાત પેલ્લા નાંય હોમજ્યા, બાકી પાછે જોવે ઈસુવાલ મહિમા મિળી, તોવે આહાન યાદ યેના કા જી કાય ઈસુઆરે જાયા તી ઠીક એહેકેનુજ આતા જેહેકેન પવિત્રશાસ્ત્રમાય લોખલાં.

17 તોવે ગીરદેમાઅને લોક જ્યા એ સમયે આઆરે આર્તે, એ બીજહાન આખા લાગ્યે કા આય લાજરસાલ માહણામાઅને હાત કોઈન, મોઅલાહામાઅને જીવતો ઉઠાડયેલ.

18 ચ્યાહાટી માઅહે ચ્યાલ મિળાહાટી યેનલે આર્તે, કાહાકા ચ્યાહાન ખોબાર પોડયેલ, ચ્યે ઓહડો ચમત્કાર દેખાડલો આતો.

19 તોવે પોરૂષીયા ચોકબીજાહાન આખા લાગ્યા, વિચાર કોઆ, આપા કાય નાંચ કોય હોકજે, બોદી દુનિયા ઈસુવા પાહલા ઓઅય રીઅલા હેય.”

ઈસુ એને યુનાની લોક

20 કોલહાક યુનાની લોક તાં આતા, જ્યા સણા સમયે યેરૂસાલેમ શેહેરામાય ભક્તિ કોઅરા યેનલા આતા.

21 ચ્યાહાય ગાલીલ ભાગા બેતસાદા ગાવામાઅને ફિલિપાપાય જાયન ચ્યાહાય ચ્યાલ વિનાંતી કોઅયી, “સાયબ, આમહાન ઈસુવાલ મિળના હેય.”

22 ફિલિપે યેયન આંદ્રિયાસાલ આખ્યાં એને તોવે આંદ્રિયાસ એને ફિલિપે ઈસુવાપાય જાયને આખ્યાં.

23 તોવે ઈસુવે ચ્યાહાન આખ્યાં, તો સમય યેય ગીઅલો હેય, કા માન માઅહા પોહા મહિમા ઓઅે.

24 આંચ તુમહાન હાચ્યાં-હાચ્યાં આખતાહાવ, જાવ લોગુ ગોવાં દાણો જમીનીમાય પોડીન મોઅોઈ નાંચ જાય, તાંવ લોગુ તો યોખલો રોહે, બાકી મોઅોઈ જાહે તોવે બોજ દાણા પાકતાહા, મા આરેબી એહેકેજ બોની.

25 જો પોતાના જીવાલ બોચાવાં માગહે, તો ગુમાવી દેહે, એને જો યા દુનિયામાય પોતાના જીવાલ ગુમાવી દાં માગહે, તો અનંતજીવનાહાટી ચ્યાલ બોચાવી રાખી.

26 જું માઅહું મા સેવા કોઅહે તો મા શિષ્ય બોને, તોવે જાં આંચ હેય, તાં મા સેવક બી ઓરી, જો કાદો મા સેવા કોઅે, તો પોરમેહેર આબો ચ્યા કદર કોઅરી.

પોતાના મોઅઇ જાયના ભવિષ્યવાણી

27 આમી મા મોન દુઃખી ઓઅઇ ગીયા એને આંચ કાય આખું? કા, “ઓ આબા, માન યે પીડા સોમયામાઅને બોચાવ?” એહેકેન નાંચ, બાકી આંચ યા દુનિયામાય ચ્યા હાટીજ યેનહો કા દુઃખ બોગવું.

28 ઓ મા આબા, દેખાડ કા તું કોલહો મહિમામાય હેય તોવે હોરગામાઅને ઓહડો આવાજ ઓઅયો, “માયે દેખાડી દેના કા આંય કોલહો મહિમામાય હેતાંવ, એને આંય ચાલ પાછો દેખાડીહી.”

29 તોવે જ્યા લોક ઉબા રોયન વોનાય રીઅલા આતા, આહાય આખ્યાં ઈ તો વાદળામાય ગાજ્યા, બીજહાંય આખ્યાં, “કાદો હોરગા દૂત આઆરે બોલ્યો.”

30 ઈસુવે જાવાબ દેયન આખ્યાં, “ઓ આવાજ મા હાટી નાંય, બાકી તુમહે ફાયદાહાટી હેય.

31 આમી યા દુનિયા લોકહા ન્યાય કોઅરાહાટી પોરમેહેરા સમય હેય, એને ઈસુકોય યા દુનિયા શાસક સૈતાના શક્તિ નાશ કોઇ દી.

32 એને જોવે આંય દોરતીવોઅને ઉચે ચોડાવલો જાહીં, તોવે બોદહાન માયેપાંય લેય લિહીં.”

33 એહેકેન આખીન એ ઈ વાત પ્રગટ કોઇ દેની, કા તો કેહેકે મોઅનારો આતો.

34 તોવે લોકહાય આલ આખ્યાં, “નિયમશાસ્ત્ર માય આમા એહેકેન વોનાયાહા, કા ખ્રિસ્ત કાયામુંજ જીવતો રોય, તોવે તું કેહેકેન આખતોહો કા માઅહા પોહાલ ઉચે ચોડાવના જરૂરી હેય? ઓ માઅહા પોહો કું હેય?”

35 તોવે ઈસુવે આહાન આખ્યાં, “થોડીવાઆ તુમહે વોચમાય ઉજવાડો હેય, જાવ લોગુ ઉજવાડો તુમહેઆરે હેય તાંવ લોગુ ચાલ્યાજ કોઆ, એહેકેન નાંય બોને કા આંદારાં ઓઈ જાય, જું માઅહું આંદારામાય ચાલહે, આલ ખોબાર નાંય કા તો કેઇ જાય રિયહો.

36 જાવ લોગુ ઉજવાડો તુમહેઆરે હેય, તાંવ લોગુ ઉજવાડાવોય બોરહો કોઆ કા તુમા ઉજવાડા પોહું બોના” યો વાતો આખીન ઈસુ તાઅને જાતો રિયો એને આહા પાયને ગુપ્તમાય રિયો.

ભવિષ્યવાણ્યો પુરાં ઓઅના

37 એને ઈસુવે આહા દેખતા બોજ ચમત્કાર કોઅયા, તેરુંબી આહાય આવોય બોરહો નાંય કોઅયો.

38 ઈયાહાટી જાયા કા યશાયા ભવિષ્યવક્તાય જીં વચન આખ્યેલ તી હાચ્યાં ઓઈ જાય, “ઓ પ્રભુ, આમહે સંદેશ વોય કુંયે બોરહો કોઅયો, એને પોરમેહેરા સામર્થ્ય કુંયે હોમજી પાડ્યા?”

39 ચ્યાહાટી ચ્યા બોરહો નાંચ કોઈ હોક્યા, કાહાકા યશાયા ભવિષ્યવક્તાય પાછા આખ્યેલ,

40 “ચ્યાય ચ્યાહા ડોળા આંદળા કોઈ દેના કા ચ્યા એઈ નાંચ હોકે, એને ચ્યાહા દિમાક બંદ કોઈ દેના કા ચ્યા હોમજી નાંચ હોકે, ને તો ચ્યા મા એછે ફિરી યેતે એને આંચ ચ્યાહાન હારાં કોઈ દેતો.”

41 યશાયાય યો વાતો યાહાટી આખ્યેલ, કાહાકા ચ્યાય સોમાયા પેલ્લા ઈસુ મહિમા દેખ્યેલ એને ચ્યાય ચ્યા બારામાય વાતો કોઅયો.

42 તેરુંબી આગેવાનહા માઅને બો બોદહાય ચ્યાવોય બોરહો કોઅયો, બાકી પોરૂષીયાહા લીદે ખુલ્લી રીતે નાંચ બોરહો કોઅતા આતા, યા દાકે કા ચ્યાહાન સોબાયે ઠિકાણા માઅને બાઆ નાંચ કાડી દેય.

43 કાહાકા માઅહા વાહવા ચ્યાહાન પોરમેહેરા વાહવા કોઅતા વોદારી પ્રિય ગોમહે.

ઉજવાડામાય ચાલના

44 ઈસુવે ગીરદીલ મોઠેરે બોંબલીન આખ્યાં, “જીં માઅહું માયેવોય બોરહો કોઅહે, તી માયેવોય નાંચ, બાકી માન દોવાડનારાવોય બોરહો કોઅહે.

45 એને જીં માઅહું માન એઅહે, તો જ્યો માન દોવાડયોહો ચ્યાલ એઅહે.

46 આંચ યા દુનિયામાય ઉજવાડો બોનીન યેનહો, કા જો કાદો માયેવોય બોરહો કોઅે, તો આંદારામાય નાંચ રોય.

47 એને જીં માઅહું મા વાત વોનાય તેરુંબી નાંચ પાળે, તો આંચ ચ્યાલ ડોંડ નાંચ દાવ, કાહાકા આંચ દુનિયા લોકહાન ડોંડ દાં નાંચ, બાકી દુનિયા લોકહાન બોચાવાં હાટી યેનહો.

48 જીં માઅહું મા નાકાર કોઅહે એને મા વાત સ્વીકાર નાંચ કોઅે, ચ્યાલ ડોંડ દેનારો તો યોક હેય, મતલબ જીં વાત માયે આખલી હેય, તી ન્યાયા દિહે ચ્યાલ ડોંડ દેઅરી.

49 કાહાકા માયે મા પોતા ઓદિકારા કોઇન વાત નાંય કોઅયી, બાકી પોરમેહેર આબહે જ્યે માન દોવાડયોહો ચ્યાય માન આગના દેનહી, કા આંય કાય આખું એને કેહેકેન આખું?

50 એને આંય જાંઅતાહાંવ, કા ચ્યા આગના પાળના અનંતજીવના એછે લેય જાહે, યાહાટી આંય જીં આખહુ જેહેકેન પોરમેહેર આબહે માન આખ્યાહા, તેહેકેન આંય આખતાહાવ.”

13

પ્રભુભોજ

1 પાસ્કા સણા પેલ્લા જોવે ઈસુ જાંઆય ગીયો, કા મા સમય યેય ગીયહો, કા દુનિયા છોડીન પોરમેહેર આબહાહી પાછો ફિરી જાવ, તોવે ચ્યાવોય બોરહો કોઅનારા લોકહાવોય, જ્યે દુનિયામાય આર્તે, જેહેકેન તો પ્રેમ કોઅતો આતો, સેલે લોગુ તેહેકેન પ્રેમ કોઅતો રિયો.

2 ઈસુ એને ચ્યા શિષ્ય રાતી ખાઅના ખાં બોઠલા આતા, સૈતાને પેલ્લાજ સિમોના પોહો યહૂદા ઇસ્કારીયોતા મોનામાય ઈસુવાલ દોગો દેઅના વિચાર થોવ્યેલ.

3 ઈસુ ઈ જાંઅતો આતો, કા પોરમેહેર આબહે બોદા કાય ચ્યા ઓદિકારામાય હોઅપી દેનહા એને તો પોરમેહેરાપાઅને યેનહો એને પોરમેહેરાપાય પાછો જાય રિઅલો હેય.

4 ઈસુ ખાઅના ખાય તાઅને ઉઠયો, એને ચ્યા બાઅાને ડોગલાં કાડયા, એને રુંબાળ લેઈને કોંબરા આરે બાંધો.

ઈસુવા શિષ્યહા પાગ દોવના

5 ચ્યા પાછે ઈસુય વાહાણામાય પાઆય બોઇન શિષ્યહા પાગ દોવાં એને જો રુંબાળ ચ્યા કોંબરા આરે બાંદલો આતો ચ્યાકોય નુંહરા લાગ્યો.

6 જોવે તો સિમોના પિત્તરા પાય યેનો, તોવે પિત્તરે ચ્યાલ આખ્યાં, “ઓ પ્રભુ, કાય તું મા પાગ દોવતોહો?”

7 ઈસુવે જાવાબ દેનો કા, “જીં આંય કોઅતાહાંવ તીં તુલ આમી હોમાજ નાંય પોડે, બાકી પાછે હોમાજ પોડી.”

8 પિત્તરે આખ્યાં, “તું મા પાગ કોવેજ દોવી નાંય હોકહે,” ઈ વોનાયને ઈસુવે આખ્યાં, “જોવે આંય નાંય દોવું તોવે તું મા શિષ્ય નાંય.”

9 સિમોન પિત્તરે આખ્યાં, તારાત બોલ્યો, “તોવે પ્રભુ, મા પાગ ઓલહાંજ નાંય, બાકી મા આથ એને ટોલપી હોગી.”

10 ઈસુવે ચ્યાલ આખ્યાં, “જો આંગળી ચુક્યોહો, ચ્યાલ ખાલી પાગ દોવના ગોરાજ હેય, ચ્યા બોદા શરીર ચોખ્ખાં હેય, તુમા ચોકાલ છોડીન બોદા ચોખ્ખાં હેય.”

11 ઈસુ તે ચ્યાલ દોગો દેનારાલ જાંઅતો આતો, ચ્યાહાટી ચ્યે આખ્યાં, કા “તુમા ચોકાલ છોડીન બોદા ચોખ્ખાં હેય.”

પાગ દોવના મતલબ

12 જોવે ઈસુ ચ્યાહા પાગ દોવી ચુક્યો એને ચ્યા બાઆને ડોગલાં પોવીન બોહી ગીયો પાછે તો શિષ્યહાન આખા લાગ્યો, “કાય તુમા હોમજ્યા કા માયે તુમહેઆરે કાય કોઅયા?

13 તુમા માન ગુરુ, એને પ્રભુ, આખતાહા, તી હાચ્યાં આખતાહા, કાહાકા આંય તુમહે ગુરુ એને પ્રભુ બી હેતાઉ.

14 જોવે આંય પ્રભુ એને ગુરુ હેતાંવ તેરું તુમહે પાગ દોવ્યા, તોવે તુમહાય બી ચોક બીજહા પાગ દોવીન માયે હારકા કોઅરા જોજે.

15 કાહાકા માયે તુમહાન નમુનો દેખાડયો, તોવે કા જેહેકેન માયે તુમહેઆરે કોઅયા, તુમાબી તેહેકેન કોઅયા કોઅરા.

16 આંય તુમહાન હાચ્યાં-હાચ્યાં આખતાહાવ, સેવક ચ્યા માલિકા કોઅતો મોઠો નાંય હેય, એને દોવાડલો ચ્યાલ દોવાડનારા કોઅતો મોઠો નાંય હેય.

17 આમી તુમા ચો વાતો જાંઅતાહા, તો ચ્યાહાન કોઆ કા તુમા ધન્ય ઓઈ જાય.

18 આંય તુમા બોદહા બારામાય નાંય આખું, કાહાકા માયે જ્યાહાન નિવડી લેદલા હેય, આંય ચ્યાહાન જાંઅતાહાંવ, બાકી એહેકેન ચાહાટી ઓઈ રીઅલા હેય કા પવિત્રશાસ્ત્રમાય લોખલાં હેય તી પુરાં ઓરા જોજે, કા જ્યાંય મા આરે ખાઅના ખાદાં, ચ્યાય માન દોગો દેનો.

19 આમી ઈ બોને ચ્યા પેલ્લા, આંય તુમહાન આખતાહાવ કા ઈ બોની જાય તોદહી તુમા બોરહો કોઅહા કા આંય તોજ હેતાઉ.

20 આંય તુમહાન હાચ્યાં-હાચ્યાં આખતાહાવ, જ્યાલ માયે દોવાડયોહો ચ્યાલ જો માની લેહે, તો હાચ્યાંજ મા માની લેહે, જો કાદો મા માની લેહે, તો હાચ્યાંજ પોરમેહેરાબી માની લેહે જ્યાંય માન દોવાડયોહો.”

બોરહો નાંય થોવના

21 યો વાતો આખ્યો પાછે ઈસુ મોનામાય દુઃખી ઓઅય ગીયો, એને શિષ્યહાન આખ્યાં, આંય તુમહાન હાચ્યાં-હાચ્યાં આખતાહાવ, તુમહેમાઅને યોક જાંઆ માન દોઅય દી.

22 તોવે ચ્યા શિષ્ય એહેકેન શંકા કોઅતા આતા, કા તો કા બારામાય આખહે, યોકા બિજા એછે એઅતા લાગ્યા.

23 ચ્યા શિષ્યહા માઅને યોક જ્યાવોય ઈસુ પ્રેમ કોઅતો આતો, ઈસુ બાજુ માય બોઠલો આતો.

24 સિમોન પિત્તરે ચ્યાએછે ઈશારો કોઇન પુછ્યાં, “પુછ તે, તો કા બારામાય આખહે?”

25 તોવે ચ્યાય ઈસુવા એછે વોળીન ચ્યાલ પુછ્યાં, “પ્રભુ, તો કું હેય?”

26 ઈસુવે જવાબ દેનો, “જ્યાલ ઈ આંય બાખ્યે કુટકો થાળીમાય બુડવીન દેતહાવ તોજ હેય.” તોવે ઈસુય કુટકો થાળીમાય બુડવીન સિમોના પોહો યહૂદા ઈસ્કારિયોતાલ દેનો.

27 જેહેકેન યહૂદાય બાખી કુટકો ખાદો પાછે, ઈસુવે જવાબ દેનો, “જ્યાલ ઈ આંય બાખ્યે કુટકો થાળીમાય બુડવીન દેતહાવ તોજ હેય.” ઈસુય આખ્યાં, “તું જું કોઅરા જાય રિઅલો હેય, ચ્યાલ તારાત કોઓ, એને સૈતાન ચ્યામાય ઉરાય ગીયો.”

28 બાકી ખાં બોઠલાહામાઅને કાદે નાંય જાંઅયા, યો વાતો કાહાટી ઈસુય આખ્યો.

29 યહૂદાપાય પોયહા ઠેલી રોય ચ્યાહાટી કાદે-કાદે એહેકેન હોમજ્યા, કા ઈસુ ચ્યાલ આખહે, કા જું કાય આપહાન સણાહાટી જોજહે તી વેયાતાં લેય, કા ઈ કા ગોરીબાહાન કાય દેય.

30 બાખ્યે કુટકો ખાદો પાછે યહૂદા તારાત બાઆ નિંગી ગીયો, તોવે રાત આતી.

નોવી આગના

(માથ્થી 26:31-35; માર્ક 14:27-31; લુક. 22:31-34)

31 જોવે તો બાઆ નિંગી ગીયો તોવે ઈસુવે આખ્યાં, “આમી માઅહા પોહા મહિમા જાયી એને પોરમેહેરા મહિમા આમાય જાયી.

32 એને પોરમેહેર બી પોતામાંય આ પોહા મહિમા કોઅરી, એને તો તારાત કોઅરી.

33 ઓ પોહલાય, આંય આજુ વાયજ વાઆ તુમહેઆરે હેતાઉ પાછા તુમા માન હોદહા બાકી જેહેકેન યહૂદી લોકહાન માયે આખ્યાં, જાં આંય જાય રિયહો, તાં તુમા નાંય યી હોકે, એને આમીબી તુમહાન તેહેકેનુજ આખતાહાવ.

34 આંય તુમહાન ચોક નોવી આગના દેતહાવ, કા તુમા ચોક બીજહાવોય પ્રેમ કોઆ જેહેકેન માયે તુમહાવોય પ્રેમ કોઅયા, તેહેકેન તુમા ચોક બીજહાન પ્રેમ કોઆ.

35 જોવે તુમા ચોક બિજાવોય પ્રેમ કોઅહા, તોવે બોદે તુમહાન જાંઆય લી કા મા શિષ્ય હેતા.”

ઈસુથી પિતરા નાકાર કોઅના ભવિષ્યવાણી

36 સિમોન પિતરે આલ આખ્યાં, “ઓ પ્રભુ, તું કેછ જાય રિયહો?” ઈસુવે આલ જાવાબ દેનો, “જાં આંય જાય રિયહો, તાં તું આમી મા પાહલા નાંય યી હોકા, બાકી આ પાછે તું મા પાહલા યેહે.”

37 પિતરે ઈસુવાલ આખ્યાં, “ઓ પ્રભુ, આમી આંય તો પાહલા કાહાનાય યી હોકુ? આંય તે તોહાટી મોઅરા બી તિયાર હેય.”

38 ઈસુવે જાવાબ દેનો, “કાય તું માંહાટી મોઅહે? આંય તુલ હાઆં-હાઆં આખતાહાવ, કુકાડ વાહાય આ પેલ્લા તું તીનદા આખહે આંય નાંય વોળખું.”

14

ઈસુ પોતાના શિષ્યાહાન દિલાસો દેહે

1 “તુમા મોનામાય દુઃખી નાંય ઓઅતા, તુમા પોરમેહેરાવોય બોરહો કોઅતાહા માયેવોય બી બોરહો કોઆ.

2 મા પોરમેહેર આબહા ગોઆમાય રોઅના બોજ જાગો હેય, જોવે નાંય રોતા તોવે તુમહાન આંય આખતો કાહાકા આંય તુમહેહાટી જાગો તિયારી કોઅરા જાય રિયહો.

3 આંય તાં જાયને જાગો તિયાર કોઈન પાછે આંય પાછો યેયન, તોવે તુમહાન મા આરે રા લેય યીહીં, યાહાટી કા જાં આંય હેતાઉ તાં તુમાબી રોહા.

વાટ, હાચ્યાં એને જીવન

4 એને જાં આંય જાય રિયહો તાંઆની વાટ તુમહાન ખોબાર હેય.”

5 થોમાય ચ્યાલ આખ્યાં, “ઓ પ્રભુ, આમહાન નાંય ખોબાર કા તું કેછ જાય રિયહો, તોવે આમા વાટ કેહેકેન જાંઆય હોકજે?”

6 ઈસુવે ચ્યાલ આખ્યાં, “વાટ એને હાચ્યાં એને અનંતજીવન આંયજ હેતાંવ, માયે વોગાર કાદો પોરમેહેર આબહાપાય નાંય જાય હોકે.

7 જોવે તુમા માન જાઅતા, તોવે મા આબહાલ બી જાઅતા, એને આમી ચ્યાલ જાંઅતાહા, એને ચ્યાલ દેખ્યહો બી.”

8 ફિલિપે ચ્યાલ આખ્યાં, “ઓ પ્રભુ, આબહાલ આમહાન દેખાડી દે, ઈ આમહેહાટી બો ઓઅઇ ગીયા.”

9 ઈસુવે ચ્યાલ આખ્યાં, “ઓ ફિલિપ, આંય ઓલા દિહી તુમહેઆરે હેતાંવ, એને કાય તું માન નાંય જાંઅતોહો? જ્યાંય માન દેખ્યો, ચ્યાય પોરમેહેર આબહાલ દેખ્યહો, તું કાહા આખતોહો કા આબહાલ આમહાન દેખાડ?

10 આંય આબહામાય હેતાઉ એને માંયેમાય આબહો હેય, કાય તું યે વાતવોય બોરહો નાંય કોઆ? જું વાત આંય તુમહાન આખતાહાવ, મા પોતા ઓદિકારા કોઈન નાંય આખતાહાવ, બાકી આબહો માંયેમાય રોયન તીંજ કામ કોઅહે જું તો કોઅરા માગહે.

11 માયેવોય બોરહો કોઆ, આંય આબહામાય હેતાઉ એને આબહો માંયેમાય હેય, નાંય તો જ્યા માયે ચમત્કાર કોઅલા હેય ચ્યાહા લેદે માયેવોય બોરહો કોઆ.”

ઈસુ નાવામાય પ્રાર્થના

12 “આંય તુમહાન હાચ્યાં-હાચ્યાં આખતાહાવ, જો કાદો માયેવોય બોરહો કોઅહે, યે કામે જ્યે આંય કોઅતાહાંવ તોબી કોઅરી, બાકી

ચ્યાકોઅતે બી મોઠે કામ કોઅરી, કાહાકા આંય આબહાપાય જાય રિયહો.

13 એને જીં કાય તુમા મા નાવાકોય માગહા તીંજ આંય કોઅહી કા પોહાકોય આબહા મહિમા ઓએ.

14 જોવે તુમા માપાયને મા નાંવે કોય કાયબી માગહા, તો તી આંય કોઅહી.”

પવિત્ર આત્માલ વાટ જોવના

15 જોવે તુમા માયેવોય પ્રેમ કોઅતાહા, તોવે મા આગના પાળહા.

16 એને આંય આબહાલ પ્રાર્થના કોઅહી, એને તો તુમહાન આજી યોક મોદાત્યો દી, કા તો કાયામ તુમહેઆરે રોય.

17 તો તી આત્મા હેય, જીં પોરમેહેરાબારામાય હાચ્યાં પ્રગટ કોઅહે, જ્યાલ દુનિયા લોક સ્વીકાર નાંય કોઅય હોકે, કાહાકા દુનિયા લોક નાંય ચ્યાલ એઇ હોકે નાંય ચ્યાલ જાંઅતેહે, બાકી તુમા ચ્યાલ જાંઅતેહે, કાહાકા તી તુમહેઆરે રોહે, એને તો તુમહેમાય રોય.

18 “આંય તુમહાન અનાથ નાંય છોડહી, આંય તુમહેપાય પાછો યેતહાવ.

19 માહારીજ દુનિયા માન નાંય એઅરી, બાકી તુમા માન એઅહા, કાહાકા આંય પાછો જીવી જાહીં, એને યાહાટી તુમાબી જીવતા રોહા.

20 જોવે આંય જીવતો પાછો યીહીં, તોવે તુમા જાંઆય લાહા, કા આંય મા આબહામાય હેતાઉ, એને તુમા માંયેમાય હેતા, એને આંય તુમહેમાય હેતાઉ.

21 જો મા આગના જાંઅહે એને પાળહે તોજ માયેવોય પ્રેમ કોઅહે, એને જો માયેવોય પ્રેમ કોઅહે, ચ્યાવોય મા આબહો પ્રેમ કોઅરી, એને આંય ચ્યાવોય પ્રેમ કોઅહી, એને આંય પોતાલ ચ્યાવોય પ્રગટ કોઅહી.”

22 ચ્યા યહૂદાય જો ઇસ્કારીયોત નાંય આતો, ચ્યાલ આખ્યાં, “ઓ પ્રભુ, કાય જો કા તું પોતાલ આમહાવોય પ્રગટ કોઅરા માગતોહો, એને દુનિયા લોકહાવોય નાંય?”

23 ઈસુવે ચ્યાલ જાવાબ દેનો, “આંય પોતાલ ઓહડા લોકહાન દેખાડતાહાવ, જ્યે માયેવોય પ્રેમ કોઅતેહે, એને મા આગના પાળતેહે,

એને મા આબહો ચ્યાવોય પ્રેમ કોઅરી, એને આપા ચ્યા પાહે યાહાવ, એને ચ્યાઆરે રાહાવ.

24 જો કાદો માયેવોય પ્રેમ નાંચ કોઅરે, તો મા આગના નાંચ પાળે, એને જીં વચન તુમા વોનાતેહે, તી મા નાંચ હેય, બાકી જ્યે માન દોવાડયોહો ચ્યા આબહા હેય.”

25 “યો વાતો માયે તુમહેઆરે રોઇન તુમહાન આખ્યો.

26 બાકી મોદાત્યો એટલે પવિત્ર આત્મા જ્યાલ આબહે મા ઓદિકાર હાતે દોવાડી, પવિત્ર આત્મા તુમહાન બોદા હિકાડી, એને જી કાય માયે આખલા હેય, પવિત્ર આત્મા તુમહાન યાદ કોઆડી.”

ઈસુ શાંતી દેયના

27 આંચ તુમહાન શાંતી દેતહાવ એટલે તી શાંતી જીં માયેપાંચ હેય, ઈ તી શાંતી નાંચ જીં દુનિયા દી હોકહે, તોહડી આંચ નાંચ દાંઉ, તુમા મોનામાય દુઃખી નાંચ ઓઅતા એને બીયહા મા.

28 તુમા વોનાયા કા માયે તુમહાન કાય આખ્યાં, આંચ જાય રિયહો એને પાછો તુમહેપાય ચેતહાવ જોવે તુમા માન પ્રેમ કોઅતા, તોવે તુમા ચે વાતોકોય ખુશ ઓઅતા, કા આંચ આબહાપાય જાતહાવ કાહાકા આબહો મા કોઅતા મોઠો હેય.

29 એને આમીજ યો વાતો બોને ચ્યા પેલ્લા તુમહાન માયે આખી દેના, યાહાટી કા જોવે ઈ બોને તોવે તુમા માયેવોય બોરહો કોઆ.

30 આમી માયેપાંચ તુમહેઆરે વાત કોઅરા બોજ સમય નાંચ હેય, કાહાકા યા દુનિયા શાસક સૈતાન ચેય રોયહો, એને માયેવોય ચ્યા કાય ઓદિકાર નાંચ.

31 આંચ તેહેકેજ કોઅતાહાંવ જેહેકેન આબહે માન આગના દેનહી, યાહાટી કા દુનિયા લોકહાન ખોબાર પોડે કા આંચ આબહાવોય પ્રેમ કોઅતાહાંવ, ઉઠા, આપા ઇહિને જાતા.

15

હાચ્યો દારાખાવેલો

1 “હાચ્યો દારાખાવેલો આંચ હેતાઉ, એને મા આબહો દારાખા વાડીવાળો હેય.

2 જીં ડાહગી માંયેમાય લાગલી હેય, એને ફળ નાંય લાગે, ચ્ચેલ તો ખાંડી ટાકહે, એને જ્યેલ ફળ લાગતેહે, ચ્ચેલ તો ડાળી ટાકહે તોવે કા તી આજુ ફળ દેય.

3 જીં વચન માયે તુમહાન આખ્યાં ચ્ચા લીદે, તુમા ચોખ્યાં ઓઈ ગીયહા.

4 તુમા માયે માય રોજા, એને આંય તુમહેમાય રોહીં. જેહેકેન ડાહગી વેલામાય નાંય બોની રોય, તો પોતે નાંય ફળ દી હોકે, તેહેકેન તુમાબી હારાં કામ નાંય કોઈ હોકે જોવે તુમા માંયેમાય નાંય બોની રોય.

5 આંય દારાખાવેલો હેતાઉ, તુમા ડાહગ્યો હેય, જો માયે માય બોની રોહોય, એને આંય ચ્ચામાય, તી બોજ હારાં કામ કોઅહા, કાહાકા માયે વોગાર તુમા કાય નાંય કોઈ હોકતાહા.

6 જો કાદાં માઅહું માંયેમાય નાંય રોય તોવે ડાહગી હારકા કાપી ટાકી દેનલા જાહે તોવે તી ડાહગી ઉખાય જાહે એને લોક ચ્ચાલ બેગા કોઈન આગડામાય ટાકી દેતહું, એને તી બોળી જાહે.

7 જોવે તુમા માંયેમાય બોની રાહા, એને મા શિક્ષણ તુમહેમાય રોહોય, તોવે તુમા જીં કાય માગહા તીં તુમહાન મિળી.

8 મા આબહા મહિમા યાકોયજ ઓઅહે, કા તુમા બોજ ફળ દેય, તોવે તુમા મા શિષ્ય ઠોરહા.

9 જેહેકેન પોરમેહેર આબહે માયેવોય પ્રેમ કોઅયા, તેહેકેન માયે તુમહાવોય પ્રેમ કોઅયા, મા પ્રેમમાય બોની રોજા.

10 જોવે તુમા મા આગના પાળહા, તોવે તુમા મા પ્રેમમાય બોની રાહા જેહેકેન આંય પોતાના આબહા આગના પાળતાહાવ એને આંય ચ્ચા પ્રેમમાય બોની રોહું જેહેકોય માયે આબહા આગના પાળહી.

11 માયે યો વાતો તુમહાન યાહાટી આખ્યો, કા તુમહેમાય બી તોજ આનંદ રોય, એને તુમહે આનંદ ભરપુર ઓઈ જાય.”

શિષ્યહા યોકબીજાઆરે પ્રેમ

12 મા આગના ઈ હેય કા જેહેકોય માયે તુમહાવોય પ્રેમ કોઅયાહાં, ચ્ચે રીતે તુમાબી યોક બિજાવોય પ્રેમ કોઆ.

13 યોકા માઅહાહાટી ચ્ચા હાંગાત્યાહાન દેખાડાં હાટી કા તો ચ્ચાવોય પ્રેમ કોઅહે, બોદહા કોઅતો હારો તરીકો ઓ હેય, કા તો મોઅઈ જાય.

14 જીં આગના આંય તુમહાન દેતહાવ, જોવે તુમા પાળે, તો તુમા મા દોસ્તાર હેય.

15 આમીને તુમહાન ચાકાર નાંય આખું, કાહાકા ચાકાર નાંય જાંએ, કા માલિક કાય કોઅહે, બાકી તુમહાન માયે દોસ્તાર આખ્યાં, કાહાકા માયે જ્યો વાતો આબહા પાઅને વોનાયો, ચ્યો બોદો તુમહાન આખી દેન્યો.

16 તુમહાય માન નાંય નિવડયો, બાકી માયે તુમહાન નિવડયા, એને તુમહાન નેમદ્યા કા તુમા જાયન ફળ લીયા, એને તુમહે ફળ ટોકી રોય, કા તુમા મા શિષ્ય હેય યાહાટી આબહાવોય માગા, એને તો તુમહાન દી.

17 યે વાતહે આગના આંય તુમહાન યાહાટી દેતહાવ, કા તુમા યોક બીજહાન પ્રેમ કોઆ.

દુનિયા સોતાવ

18 જોવે દુનિયા લોક તુમહેઆરે આડાઇ કોએ, તોવે યાદ કોઆ કા ચ્યાહાય તુમહેઆરે આડાઇ કોઅરા પેલ્લા ચ્યાહાય મા આરેબી આડાઇ કોઅયીહી.

19 જોવે તુમા દુનિયા લોકહા રોકે રોતે, તોવે દુનિયા લોક પોતે માઅહાલ પ્રેમ કોઅતા, બાકી તુમા દુનિયા લોક નાંય હેતા, બાકી માયે તુમહાન દુનિયામાઅને નિવડી લેદહા, ચ્યાહાટી દુનિયા લોક તુમહેઆરે આડાઇ કોઅતાહા.

20 જીં માયે તુમહાન આખ્યેલ કા, “માલિકા કોઅતો ચાકાર મોઠો નાંય,” તી વાત યાદ કોઆ ચ્યાહાય માન સોતાવ્યા, તો ચ્યા તુમહાનબી સોતાવી,, જોવે ચ્યે મા વાત પાળી, તોવે તુમહે બી વાત પાળી.

21 બાકી ઈ બોદા ચ્યા લોક તુમા મા શિષ્ય હેય યા લેદે તુમહેઆરે કોઅરી, કાહાકા ચ્યા માન દોવાડનારા પોરમેહેરાલ નાંય વોળખે.

22 જોવે આંય નાંય ચેતો એને ચ્યાહાઆરે વાત નાંય કોઅતો, તોવે ચ્યે પાપી નાંય ગોણાતે, બાકી આમી ચ્યાહાન પાપા બારામાય આખના કાયજ બહાનો નાંય હેય.

23 જો કાદો મા આરે આડાઇ કોઅહે, તો મા આબહા આરેબી આડાઇ કોઅહે.

24 જોવે આંય ચ્યાહામાય ચમત્કાર નાંય કોઅતો, જો બિજા કાદે નાંય કોઅયા, તોવે ચે પાપી નાંય ગોણાતે, બાકી આમી ચ્યાહાય માન એને મા આબહાય જું કાય કોઅયા તી દેખ્યા બી, તેરુંબી ચ્યાહાય આમહે આરે આડાઈ કોઅયી.

25 ઈ યાહાટી જાયા કા નિયમશાસ્ત્ર માય લોખલાં હેય તી હાચ્યાં બોને, કા “ચ્યાહાય વોગાર કારણે મા આરે આડાઈ કોઅયી.”

26 આંય આબાઈહીને તુમહેહાટી યોક મોદાત્યો દોવાડીહી, તો આત્મા હેય, જું આબહા પાઅને ચેહે, એને જું હાચ્યાં હેય તી પ્રગટ કોઅહે, જોવે તો યી, તોવે તો તુમહાન મા બારામાય આખરી.

27 એને તુમા મા બારામાય દુનિયા લોકહાન આખહા, કાહાકા સુરવાતપાઅને તુમા મા આરે રીયહા.

16

1 “ઈ વાત તુમહાન માયે યાહાટી આખી, કા તુમહે બોરહો ટુટી નાંય જાય.

2 ચ્યા તુમહાન ચ્યાહા સોબાયે ઠિકાણા માઅને કાડી દી, બાકી ઓહડો સમય યી રોયહો, કા જો કાદો તુમહાન માઆઈ ટાકી, તો એહેકોય હોમજી કા આંય પોરમેહેરા સેવા કોઅતાહાંવ.

3 એને ઈ ચ્યા યાહાટી કોઅરી, કાહાકા ચ્યાહાય આબહાલ નાંય જાંઅયા એને માન બી નાંય જાંઅયા.

4 બાકી યો વાતો માયે યાહાટી તુમહાન આખી દેન્યો, કા જોવે તો સમય ચેય, તોવે તુમહાન યાદ ચેય, કા માયે તુમહાન પેલ્લા આખી દેનલા આતા. જોવે તુમા શુરવાતમાય મા શિષ્ય બોન્યા, તોવે તુમહાન યાહાટી નાંય આખ્યાં કાહાકા આંય તુમહેઆરે આતો.”

પવિત્ર આત્મા કામ

5 આમી આંય માન દોવાડયો ચ્યાપાય જાય રિયહો એને તુમહેમાઅને કાદો માન નાંય પુછે, “તું કેછ જાય રિયહો?”

6 બાકી માયે જો યો વાતો તુમહાન આખ્યો, યાહાટી તુમા મોનામાય બોજ દુઃખી ઓઈ ગીયા.

7 બાકી તેરુંબી આંય તુમહાન હાચ્યાં આખતાહાવ, કા મા જાઅના તુમહેહાટી હારાં હેય, કાહાકા જો આંય નાંય જાંઉ, તોવે મોદાત્યો

તુમહેપાય નાંય ચી, બાકી જોવે આંય જાહીં, તોવે ચ્યાલ તુમહેપાય આંય દોવાડીહી.

8 એને જોવે તો ચી, તોવે તો દુનિયા લોકહા પાપ એને ન્યાયપણા એને ન્યાયા બારામાય સાબિતી દી.

9 પાપા બારામાય ચાહાટી સાબિતી કોઅરી કાહાકા એ માયેવોય બોરહો નાંય કોએ.

10 ન્યાયપણા બારામાય ચાહાટી સાબિતી કોઅરી, કાહાકા આંય આબાપાય પાછો જાય રિયહો એને તુમા પાછે માન નાંય એઅહા.

11 ન્યાયા બારામાય ચાહાટી સાબિતી કોઅરી, કાહાકા પોરમેહેરાય પેલ્લાથી યા દુનિયા શાસક એટલે સૈતાનાલ દોષી ઠોરાવલો હેય.

12 “આજુ બોજ વાતો આંય તુમહાન આખા માગહુ, બાકી આમી તુમા ચ્યાહાન નાંય સહન કોઇ હોકે.

13 બાકી જોવે તો હાચ્યાં આત્મા ચી, તોવે તો તુમહાન પોરમેહેરાબારામાય જું હાચ્યાં હેય તી હોમજાડી, કાહાકા તો પોતા ઓદિકારા કોઇન નાંય આખી, બાકી જું પોરમેહેરાપાઅને વોનાચી, તીંજ આખી, એને આગલા ઓઅનાચો વાતો તુમહાન આખી.

14 તો મા મહિમા કોઅરી, કાહાકા મા પાઅને ચ્યાલ જું મિળલા હેય, તો તુમહાન તીંજ આખી.

15 જું કાય પોરમેહેર આબા હેય, તી બોદા મા હેય, ચ્યાહાટી માયે તુમહાન આખ્યાં, કા તો મા પાઅને જું મિળલા હેય, તો તુમહાન તીંજ આખી.”

શોક આનંદામાય બદલાય જાઅના

16 “વાયજ વાઆમાય તુમા માન નાંય એઅહા, એને વાયજ વાઆ પાછે તુમા માન એઅહા.”

17 તોવે ચ્યા કોલહાક શિષ્યહાય ચ્યાહામાયજ આખ્યાં, “ઈ કાય હેય? જું તો આમહાન આખહે કા, ‘વાયજ વાઆ પાછે તુમા માન નાંય એઅહા, એને વાયજ વાઆ પાછે તુમા માન પાછા એઅહા’ એને ઈ ‘ચાહાટી કા આંય આબહાપાય જાય રિયહો?’ ”

18 તોવે ચ્યા ચોકાબીજાલ પુછા લાગ્યા, “ઈ ‘વાયજ વાઆ’ એહેકેન તો આખહે, કાય મતલબ હેય? આમહાન હોમાજ નાંય પોડે તો કાય આખી રિયહો.”

19 ઈસુવે ઈ જાઇન કા ચ્યા માયેપાઅને યે વાતહે મોતલાબ પુછા કોઅતાહા, એને ચ્યે ચ્યાહાન આખ્યાં, “માયે તુમહાન આખ્યાં કા ‘વાયજ વાઆ પાછે તુમા માન નાંચ એઅહા, એને વાયજ વાઆ પાછે માન પાછા એઅહા યા મોતલાબ તુમા ચોકબિજાલ પૂછતાહા કા”?

20 આંચ તુમહાન હાચ્યાં-હાચ્યાં આખતાહાવ, તુમા મા મોઅના પાછે રોડહા એને દુઃખી ઓઅહા, બાકી દુનિયા લોક આનંદ કોઅરી, તુમહાન દુઃખ ઓઅરી, બાકી જોવે તુમા માન પાછા એઅહા, તોવે તુમહે દુઃખ આનંદમાય બોદલાય જાય.

21 જોવે થેએ પોહાલ જન્મો દેઅના સમય યેહે, તોવે તી બોજ પીડામાય રોહે, કાહાકા ચ્યે દુઃખા સમય યી ગીઅલો હેય, બાકી જોવે તી પોહાલ જન્મો દેય પાડે તો દુનિયામાય ચોક માઅહું પૈદા જાયા યા ખુશીકોય તી ચ્યે પીડા વિહીરાય જાહે.

22 યેજપરમાણે તુમાબી આમી દુઃખામાય હેય, બાકી આંચ તુમહાન પાછો મીળહી એને તુમા આનંદિત ઓઈ જાહા એને તુમહે આનંદ કાદો તુમહે વોયને પેચકી નાંચ લી.

23 ચ્યે સમય તુમા માન કાય નાંચ પુછહા, આંચ તુમહાન હાચ્યાં-હાચ્યાં આખતાહાવ, જો તુમા આબહાવોય જું કાય માગહા, તુમા મા શિષ્ય હેય, યાહાટી તો તુમહાન દી.

24 આમી લોગુ તુમહાય મા શિષ્ય ઓઅવાથી આબહાવોય કાયજ નાંચ માગ્યાં, માગા એને તુમહાન મિળી જાય, કા તુમહે આનંદ વોદતો જાય.

દુનિયાલ જીકના

25 માયે યો વાતો તુમહાન દાખલા કોઇન આખલ્યો હેય, બાકી તો સમય યી રિઅલો હેય, તોવે આંચ તુમહાન દાખલા કોઇન નાંચ આખું બાકી ખુલ્લી રીતે આબહા બારામાય આખી દિહી.

26 ચ્યે સમયે તુમા મા શિષ્ય હેય યાહાટી માગહા એને આંચ તુમહેહાટી આબાલ પ્રાર્થના કોઅચીહી, આંચ એહેકેન નાંચ આખતાહાવ.

27 કાહાકા આબો પોતે તુમહાવોય પ્રેમ કોઅહે, કાહાકા તુમહાય માયેવોય પ્રેમ કોઅયાહાં, એને તુમા બોરહો કોઅતાહા કા આંય આબાઇહીને યેનહો.

28 આંય આબાઇહીને દુનિયામાય યેનહો, પાછો દુનિયાલ છોડીન આબાપાય જાય રિયહો.”

29 આ શિષ્યહાય આખ્યાં, “એએ, આમીતે તું ખુલ્લાં આખતોહો એને દાખલો નાંય આખે.

30 આમી આમહાન ખોબાર પોડી ગિઇ, કા તું બોદા જાંઅતોહો, એને તુલ કાદા ગોરાજુજ નાંય કા કાદાં તુલ સાવાલ પુછે, યાકોય આમા બોરહો કોઅજેહે કા તું પોરમેહેરા ઇહિને યેનહો.”

31 ઈ વોનાયને ઈસુવે આખ્યાં, “આમી તુમહે બોરહો ઓઅહે.

32 એઆ, આમી તો સમય યી રિયહો, બાકી યેય ગીયો, અે સમયે તુમા વેરગાઈ જાહા જ્યાહા-અ્યાહા વાટે લાગહા, એને માન યોખલો છોડી દાહા, તેરુંબી આંય યોખલો નાંય હેતાઉ, કાહાકા આબહો મા આરે હેય.

33 માયે તુમહાન યો વાતો યાહાટી આખ્યાં, યાહાટી કા તુમહાન મા લીદે શાંતી મીળે, દુનિયામાય તુમહાન આબદા પોડી, બાકી ઈમાત રાખા, માયે યા દુનિયા શાસક એટલે સૈતાનાલ આરવી દેનલો હેય.”

17

ઈસુ પોતાનાહાટી પ્રાર્થના

1 ઈસુવે ઈ આખ્યાં પાછે આકાશા એછે એઇન આખ્યાં, “ઓ આબા, તો સમય યેય ગીયહો, કા તું પોહા મહિમા કોઓ, કા પોહોબી તો મહિમા કોએ.

2 કાહાકા તુયે અ્યાલ બોદા માઅહાવોય પુરો ઓદિકાર દેનહો, તોવે તો જ્યાહાલ તુયે અ્યાલ દેનહા, અ્યા બોદહાન તો અનંતજીવન દેય.

3 એને અનંતજીવન ઈ હેય, કા અ્યા તુલ યોકુજ હાઅ્યો પોરમેહેરાલ, એને ઈસુ ખ્રિસ્તાલ જ્યાલ તુયે દોવાડ્યોહો, જાંએ.

4 જીં કામ તુયે માન કોઅરાહાટી દેનેલ, તી માયે પુરાં કોઇન દોરતીવોય તો મહિમા કોઅલી હેય.

5 એને આમી, ઓ મા આબા, તોઆરે મા મહિમા કોઓ, તીજ મહિમા જું મા તો હાતે દુનિયા બોનાવના પેલ્લી આતી.”

ઈસુ પોતાના શિષ્યા હાટી પ્રાર્થના

6 “માયે તો બારામાય ચ્યા લોકહાન આખ્યાં, જ્યાહાન તુયે દુનિયામાઅને માન દેનહા, કા તું કું હેય, ચ્યે તો આર્તે એને તુયે ચ્યાહાન માન દેને, એને ચ્યાહાય તો આગના પાળી.

7 આમી ચ્યા જાંઅતાહા, કા તુયે માન જું કાય દેના, તી બોદા તોપાઅને હેય.

8 કાહાકા જો સંદેશ તુયે માન દેનો, માયે ચ્યાહાન પોઅચાડી દેનો એને ચ્યા સંદેશાલ ચ્યાહાય બોરહો કોઅયો, એને હાચ્યાં જાંઅતાહા કા આંય તોપાઅને યેનહો, એને ચ્યાહાય ઓ બોરહો કોઅયો કા તુયેજ માન દોવાડયોહો.

9 ચ્યાહાહાટી આંય પ્રાર્થના કોઅતાહાંવ, દુનિયા લોકહાહાટી પ્રાર્થના નાંય કોઉ, બાકી ચ્યાહાહાટી જ્યાહાન તુયે માન દેનહે, કાહાકા ચ્યે તો હેય.

10 મા જું કાય હેય, તી બોદા તો હેય, એને જું તો હેય, તી મા હેય, એને ચ્યાહાકોય મા મહિમા પ્રગટ જાયલી હેય.

11 આમી આંય દુનિયામાય નાંય રોઉ, બાકી મા શિષ્ય દુનિયામાય હેય, એને આંય તોપાય યેય રિયહો, ઓ પવિત્ર આબા, તો સામથ્યાં નાવાકોય ચ્યાહાન હાયવી રાખ, ચાહાટી કા ચ્યે આપહે રોકે ચોક રોય.

12 જોવે આંય ચ્યાહા આરે આતો, તો માયે તો સામથ્યાં નાવાકોય, જું નાંવ તુયે માન દેનલા હેય, ચ્યાહાન હાયવી રાખ્યાં, એને માયે ચ્યાહાન હાયવ્યા એને જ્યા ટાકાય જાયના નક્કી આતા, ચ્યાલ છોડીન ચ્યામાઅને કાદોજ નાંય ખોવાયો, તોવે પવિત્રશાસ્ત્રામાય જું લોખલાં આતા તી પુરાં ઓએ.

13 બાકી આમી આંય તોપાય યેય રિયહો, એને યો વાતો આંય દુનિયામાય રોયન આખતાહાવ, કા ચ્યા મા આનંદાકોય પુરીરીતે બોઆય જાય.

14 માયે તો સંદેશ ચ્યાહા લોગુ પોચચાડી દેનહો, એને દુનિયા લોકહાય ચ્યાલ આડાઇ કોઅઇ, કાહાકા જેહેકોય આંચ દુનિયા નાંચ, તેહેકેન ચ્યે બી દુનિયા નાંચ હેય.

15 આંચ ઈ પ્રાર્થના નાંચ કોઅઉ, કા તું ચ્યાહાન દુનિયામાઅને લીલે, બાકી ઈ કા તું ચ્યાહાન ચ્યા દુષ્ટ એટલે સૈતાન પાઅને બોચાવી રાખ.

16 જેહેકોય આંચ દુનિયા નાંચ, તેહેકેન ચ્યે બી દુનિયા નાંચ હેય.

17 તો વચન હાચ્યાં હેય, ચાહાટી તું ચ્યાહાન હાચ્યાયેકોય પવિત્ર કોઓ.

18 જેહેકેન તુયે માન દુનિયામાય દોવાડયો, તેહેકેન માયે બી ચ્યાહાન દુનિયામાય દોવાડયાહા.

19 ચ્યાહા ફાયદાહાટી આંચ પોતાલ પવિત્ર કોઅતાહાંવ કા ચ્યાબી હાચ્યાયેકોય પવિત્ર ઓઈ જાય.

ઈસુ પોતાના વિસ્વાસ્યાહાહાટી પ્રાર્થના

20 આંચ કેવળ ચા શિષ્યહા હાટી પ્રાર્થના નાંચ કોઉ, બાકી ચ્યાહાહાટી બી જ્યે ચા શિષ્યહા સંદેશ વોનાયને માયેવોય બોરહો કોઅરી.

21 કા ચ્યે બોદે ચોક ઓઅ, ઓ આબા, જેહેકેન તું માંચેમાય હેય, એને આંચ તોમાય હેતાંવ, તેહેકેન ચ્યે બી આપહામાય રોય, ચાહાટી કા દુનિયા લોક બોરહો કોઅ, કા તુયેજ માન દોવાડયોહો.

22 એને તી મહિમા જું તુયે માન દેનલી હેય, તી માયે ચ્યાહાન દેનહી, ચાહાટી કા ચ્યા તેહેકેન ચોક ઓઈ જાય, જેહેકેન આપા હેજે.

23 આંચ ચ્યાહામાય એને તું માંચેમાય, ચાહાટી કા ચ્યા પુરેરીતે કોઇન ચોક ઓઈ જાય એને દુનિયા લોકહાન ખોબાર પોડે કા તુયે માન દોવાડયો, એને જેહેકેન તુયે માયેવોય પ્રેમ કોઅચા, તેહેકેન ચ્યાહાવોય પ્રેમ કોઅલા હેય.

24 ઓ આબા, મા ઇચ્છા હેય કા જ્યાહાન તુયે માન દેનહા, જાં આંચ રોઉ, તાં ચ્યાબી મા આરે રોય, કા ચ્યા મા તી મહિમા અએ જું તુયે માન દેનહી, કાહાકા દુનિયા બોનાવા પેલ્લા તુયે માયેવોય પ્રેમ કોઅચા.

25 ઓ ધાર્મિક આબા, દુનિયા લોકહાય તુલ નાંચ જાંઆયો, બાકી માયે તુલ જાંઆયો, એને મા શિષ્યહાય બી જાંઆયો કા તુયેજ માન દોવાડયોહો.

26 એને માયે ચ્યાહાન તો બારામાય આખ્યાં એને આજુ આખતો રોહીં, યાંહાટી કા જીં પ્રેમ તુયે માયેવોય કોઅયા તી પ્રેમ ચ્યાહામાય રોય, એને આંચ ચ્યાહામાય રોઉં.”

18

બાગમાય ઈસુલ દોઅય લેદો

(માથ્થી 26:47-56; માર્ક 14:43-50; લુક. 22:47-53)

1 જોવે ઈસુ પ્રાર્થના કોઇ પાડી, તોવે ચ્યા શિષ્યહાઆરે કેદરોન નાંવા વોઅળા ચ્યેમેરે ગીયો, તાં ચોક વાડી આતી, ચ્યે વાડયેમાય ઈસુ એને ચ્યા શિષ્ય ગીયા.

2 એને ઈસુલ દોગો દેનારો ચહૂદા બી તો જાગો જાંઅતો આતો, કાહાકા ઈસુ એને ચ્યા શિષ્ય તાં જાયા કોઅતા આતા.

3 તોવે ચહૂદા સિપાડાહા ટોળી એને મુખ્ય યાજક એને પોરૂષીયાહા પાઅને સિપાડાહાન લેયને, દિવા, ચુડા એને આથીયાર લેઈને, તાં યેનો.

4 તોવે ઈસુ ચ્યે બોદે વાતહેબારામાય જ્યો ચ્યાઆરે ઓઅનાર્યો આત્યો, તી બોદા જાંઆઈન, આગલા યેનો એને ચ્યાહાન પુછ્યાં, “તુમા કાલ હોદી રીઅલા હેય?”

5 ચ્યાહાય ચ્યાલ આખ્યાં, “નાજરેત ગાવામાઅને ઈસુલ” ઈસુવે ચ્યાહાન આખ્યાં, “આંચ હેતાઉ.” એને ચ્યાલ દોગો દેનારો ચહૂદા ચ્યાહાઆરે ઉબો આતો.

6 જોવે ઈસુવે આખ્યાં, “આંચ હેતાઉ” તોવે ચ્યા બોદા પાહલા હોરક્યા જમીનીવોય પોડ્યા.

7 તોવે ઈસુવે પાછા ઈ પુછ્યાં, “તુમા કાલ હોદી રીઅલા હેય?” ચ્યાહાય આખ્યાં, “નાજરેત ગાવામાઅને ઈસુલ.”

8 ઈસુવે આખ્યાં, “આંચ તે તુમહાન આખી ચુક્યો કા આંચ હેતાંવ, જોવે તુમા માન હોદી રીઅલા હેય, તોવે યા લોકહાન જાં દિયા.”

9 એહેકેન યાહાટી જાયા, કા ઈસુવે જું પેલ્લા આખલા આતા તી હાર્યાં ઓએ, “જ્યાહાન તુયે માન દેના, ચ્યાહામાઅને કાદા યોકાલબી નાંય ટાક્યો.”

10 તોવે સિમોન પિત્તરે તારવાયે કોઇન મહાયાજકા ચાકારાલ ઠોક્યો એને ચ્યા જમણો કાન કાપી ટાક્યો, ચ્યા ચાકારા નાંવ માલખુસ આતા.

11 તોવે ઈસુવે પિત્તરાલ આખ્યાં, “તો તારવાય દુઉ કોઓ, જું દુઃખ બોગવાં પોરમેહેર આબહે માન દોવાડયો કાય આંય તી નાંય બોગવું?”

હન્ના હામ્મે ઈસુ

12 તોવે સીપાડા એને જોમાદાર એને ચહૂદી આગેવાનહા દેવાળા રાખવાળ્યાહાય ઈસુવાલ દોઇન બાંધો.

13 એને પેલ્લા હન્ના પાય લેય ગીયા, કાહાકા તો ચ્યા વોરહા મહાયાજક આતો, કાયફા મહાયાજકા હાઅરોહો આતો.

14 ઓ તોજ કાયફા આતો, જ્યેય ચહૂદી આગેવાનહાન સલહો દેનેલ કા આમહે લોકહાહાટી યોક માટડા મોઅઇ જાયના હારાં હેય.

પિત્તરા ઈસુવાલ નાકારના

(માથ્થી 26:69-70; માર્ક 14:66-68; લુક. 22:55-57)

15 સિમોન પિત્તર એને યોક બિજો શિષ્યબી, ઈસુવા પાહલા ગીયા, ઓ બિજો શિષ્ય મહાયાજકા વોળખાત્યો આતો, એને તો ઈસુવાઆરે મહાયાજકા ગોઆ બાઆપુર ગીયો.

16 બાકી પિત્તર બાઆ બાઆણા ઈહીં ઉબો રોય ગીયો, તોવે તો બિજો શિષ્ય જો મહાયાજકા વોળખાત્યો આતો, બાઆ જાયને, બાઆઉ ઉપે રાખવાળીલ આખીન, પિત્તરાલ માજે લેય ચેનો.

17 તોવે ચ્યે ચાકરાણ્યે જું ફાટકા રાખવાળી આતી, પિત્તરાલ આખ્યાં, “કાય તું યા માઅહા શિષ્યહા માઅનો હેતો?” પિત્તરે આખ્યાં, “આંય નાંય હેય.”

18 ચાકાર એને રાખવાળ્યા હિયાળા લીદે કોળસે બાળીન ઉબા રોયન તાપાયા કોઅેત; એને પિત્તર બી ચ્યાહાઆરે ઉબો રોયન તાપાયા કોઅે.

મુખ્ય ચાજકા હામ્મે ઈસુ

(માથ્થી 26:59-66; માર્ક 14:55-64; લુક. 22:66-71)

19 તોવે મહાયાજકાય ઈસુવાલ આ હિકાડના એને આ શિષ્યહા બારામાય પુછ્યાં.

20 ઈસુવે આલ જાવાબ દેનો: “માયે બોદહાન જાહેરમાય આખ્યાં, માયે સોબાયે ઠિકાણામાય એને દેવાળામાય જાં બોદા ચહૂદી બેગે ઓઅતેહે, માયે કાયામ હિકાડયાં એને ગુપ્તમાય કાય નાંચ આખ્યાં.

21 તું ઓ સાવાલ માન કાહા પૂછતોહો? માન જ્યા વોનાયા આહાન પુછ, કા માયે કાય હિકાડયાં, એએ એ જાંઅતેહે, કા માયે કાય-કાય આખ્યાં.”

22 જોવે ઈસુય એહેકેન આખ્યાં, તોવે આ પાહાય ઉબા રીઅલા માઅને યોક રાખવાળ્યાય ઈસુવાલ યોક થાપાડ ઠોકી એને આખ્યાં, “તું મહાયાજકાલ એહેકેન જવાબ દેતહો કા?”

23 ઈસુવે આલ આખ્યાં, “માયે કાય જુઠા આખ્યાં ઓરી તોવે તી જુઠા માન દેખાડ, બાકી જો હાચ્યાં આખ્યાં, તોવે તું માન કાહા ઠોકતોહો?”

24 પાછે હન્નાયે ઈસુવાલ બાંદલોજ કાયફા મહાયાજકાપાય દોવાડયો.

પિત્તરા ઈસુવાલ વોળાખના પાછો નાકાર

(માથી 26:71-75; માર્ક 14:69-72; લુક. 22:58-62)

25 તોવે સિમોન પિત્તર આગડા પાય ઉબો રોયન તાપાય રિઅલો આતો, તોવે આહાય આલ આખ્યાં, “કાય તુબી આ શિષ્યહામાયનો હેતો કા?” પિત્તરે નાકાર કોઇ દેના, એને આખ્યાં, “આંચ નાંચ હેતાઉ.”

26 મહાયાજકા ચાકારા માઅને યોક જો આ હોગવાડયો આતો, જ્યા પિત્તરે કાન તોડી ટાકલો, એ આખ્યાં, “કાય માયે તુલ ઈસુઆરે વાડીમાય નાંચ દેખ્યેલ?”

27 પિત્તરે પાછા નાકાર કોઅય દેના એને તારાત કુકાડ વાહાયો.

ઈસુલ પિલાતા હામ્મે લેય ચેયના

(માથી 27:1-2,11-31; માર્ક 15:1-20; લુક. 23:1-25)

28 એને આ ઈસુવાલ કાયફા મહાયાજકા ઇહિને પિલાત રાજા મેહેલામાય લેય ગીયા, એને હાકાળ્યો સમય આતો, બાકી ચહૂદી આગેવાન મેહેલા માજે નાંચ ગીયા કા બાટાય નાંચ જાય બાકી પાસ્કા ખાઅના ખાય હોકે.

29 તોવે પિલાત રાજા ચ્યાહાપાય બાઆ ચેનો એને પુછ્યાં, “તુમા યા માટડાવોય કાય ફિરાદી કોઅતાહા?”

30 ચ્યાહાય આખ્યાં, “જોવે ઓ ગુનેગાર નાંય રોતો તોવે આમા યાલ તોપાય નાંય લી ચેતા.”

31 પિલાત રાજાય આખ્યાં, “તુમાંજ ચ્યાલ લેય જાયને તુમહે નિયમશાસ્ત્રા પરમાણે ચ્યા ન્યાય કોઆ” યહૂદી આગેવાનહાય આખ્યાં, “આમહાન કાદા માઅહાલ માઆઇ ટાકના ઓદિકાર નાંય હેય.”

32 ઈ યાહાટી જાયા, કા ઈ વાત પુરી ઓઅય, જો ઈસુય ઈ દોર્શાવીન આખલી આતી, કા તો કેહેકેન મોઅરી.

33 પિલાત રાજા મેહેલામાય પાછો ગીયો એને ઈસુવાલ મેહેલામાય હાદિન પૂછ્યાં: “કાય તું યહૂદી લોકહા રાજા હેતો કા?”

34 ઈસુવે જવાબ દેનો, કાય તું ઈ વાત પોતાકોય આખતોહો કા બીજહાંય મા બારામાય તુલ આખ્યાં?”

35 પિલાત રાજાય જાવાબ દેનો, “તું જાંઅતોહો કા આંય યહૂદી નાંય હેતાંવ, તોજ જાતી વાળહાય એને મુખ્ય યાજકાહાય તુલ માન હોઅપી દેનહો, તુયે કાય ગુનો કોઅયોહો?”

36 ઈસુવે જવાબ દેનો, “મા રાજય યાં દુનિયા નાંય હેય, જોવે મા રાજય યા દુનિયા રોતાં, તોવે મા શિષ્ય લોડતા, કા આંય યહૂદી આગેવાનહાકોય દોઆય નાંય જાતો, બાકી આમી મા રાજય ઇહિને નાંય હેય.”

37 પિલાત રાજાય આખ્યાં, “તોવે તું રાજા હેતો કા?” ઈસુવે જવાબ દેનો, “આંય રાજા હેતાઉ, એહેકેન તું આખતોહો, મા જન્મો લેયના એને દુનિયામાય ચેયના કારણ હેય, કા હાચ્યાયે બારામાય હિકાડી હોફુ, જ્યે હાચ્યાં પાળતેહે ચ્યે મા વાત વોનાતેહે.”

38 પિલાત રાજાય ઈસુલ પુછ્યાં, “હાચ્યાં કાય હેય?” એહેકેન આખીન તો પાછો બાઆ યહૂદી આગેવાનહાપાય ગીયો, એને ચ્યાહાન આખ્યાં, “મા તે યામાય કાયબી દોષ નાંય મીળે.

ઈસુ નેતે બરબ્બા

39 આમી તુમહે રીવાજ હેય કા આંય પાસ્કા સાણા દિહે આંય તુમહેહાટી ચોક માઅહાલ છોડી દાવ તોવે તુમહે ઇચ્છા કાય હેય, કા આંય તુમહેહાટી ચહૂદીયા રાજાલ છોડી દાવ?”

40 તોવે ચ્યાહાય પાછા બોંબલીન આખ્યાં, “ચાલ નાંય, બાકી આમહેહાટી બારાબ્બાસાલ છોડી દે” બારાબ્બાસ ચોક ડાકુ આતો.

19

યોપકા ઠોકાડના એને મશ્કરી કોઅઇ

1 તોવે પિલાત રાજાય સીપાડાહાલ હુકુમ કોઅયો, કા ઈસુવાલ લેય જાય એને ચ્યાલ ચાપકા માર ઠોકે.

2 એને સીપાડાહાય કાટાહા ટોપી વીંઈન ચ્યા ટોલખે થોવી, એને ચ્યાલ જાંબળ્યા ડોગલાં પોવાડયા.

3 એને ચ્યા ઈહીં ચેયન આખતા લાગ્યા; “ઓ ચહૂદીયાહા રાજા, સલામ” એને ચ્યાલ થાપાડ ઠોક્યાં.

4 તોવે પિલાત રાજાય પાછો બાઆ નિંગીન લોકહાન આખ્યાં, “એઆ, આંય ચ્યાલ તુમહેપાય પાછો બાઆ લી ચેતહાવ, કા તુમા જાઈ લેય કા માન કાયબી દોષ ચ્યામાય નાંય દેખાય.”

હુળીખાંબાવોય ચોડવા દેય દેયના

5 તોવે ઈસુલ કાટહા ટોપી એને જાંબળ્યા ફાડકે પોવાડલે બાઆ લી ચેના એને પિલાત રાજાય આખ્યાં, “ચા માટડાલ એઆ.”

6 મુખ્ય ચાજક એને દેવાળા રાખવાળ્યાહાય ચ્યાલ દેખ્યો, તોવે બોંબલીન આખતા લાગ્યા. “ચ્યાલ હુળીખાંબાવોય ચોડવા, હુળીખાંબાવોય,” પિલાત રાજાય આખ્યાં, તુમાંજ ચ્યાલ લી જાયને હુળીખાંબાવોય ચોડવા, કાહાકા માન ચ્યામાય કાયજ દોષ નાંય દેખાય.

7 ચહૂદી આગેવાનહાય પિલાત રાજાલ જવાબ દેનો, “આમહે બી ચોક નિયમ હેય, એને ચ્યા નિયમશાસ્ત્રા નુસાર તો માઆઈ ટાકના લાયકે હેય, કાહાકા ચ્યાય પોતાલ પોરમેહેરા પોહો આખ્યાં.”

8 જોવે પિલાત રાજા ઈ વાત વોનાયો તો બોજ ગાબરાઈ ગીયો.

9 એને પાછો મેહેલામાય ગીયો એને ઈસુવાલ પુછ્યાં “તું કેછને હેતો?” બાકી ઈસુય કાયજ જવાબ નાંય દેનો.

10 તોવે પિલાત રાજાય આખ્યાં; “માન કાહા નાંય આખા? કાય તુલ નાંય ખોબાર, કા તુલ છોડી દેઅના ઓદિકાર માન હેય, એને હુળીખાંબાવોય ચોડાવના બી ઓદિકાર માન હેય?”

11 ઈસુવે જવાબ દેનો, “જો તુલ પોરમેહેરાપાઅને નાંય દેનલો જાતો, તે તો માયે ઉપે તુલ કાયબી ઓદિકાર નાંય રોતો, યાહાટી જ્યે માન તો આથામાય દોઅવાડી દેનહો, અ્યા પાપ વોદારી હેય.”

12 અ્યાહાટી પિલાત રાજા અ્યાલ છોડી દાં કોઅે, બાકી યહૂદી લોકહાય બોંબલી બોંબલીન આખ્યાં, “જોવે તું અ્યાલ છોડી દેહે તો તું કૈસર રાજા દોસ્તાર નાંય હેય, કાહાકા જું માઅહું પોતાલ રાજા આખહે તો કૈસરા રાજા વિરુદ્ધ કોઅહે.”

13 ઈ વોનાઈન પિલાત ઈસુવાલ બાઅા લેય યેનો, એને ન્યાય આસન વોય બોહી ગીયો, જો દોગડા ચબુતરા નાંવા જાગાવોય આતો, જો હિબ્રુ ભાષામાય ગાબ્બાથા આખાયેહે.

14 તોદિહી પારુકા સણા આગલો દિહી આતો લગભગ બોપાર જાઅલો આતો પિલાતે યહૂદી લોકહાન આખ્યાં, “અેઆ, ઓ હેય, તુમહે રાજા.”

15 બાકી અ્યા બોંબલા લાગ્યા, “અ્યાલ માઅાઇ ટાકાં, માઅાઇ ટાકાં, અ્યાલ હુળીખાંબાવોય ચોડવા” પિલાત રાજાય આખ્યાં, “કાય આંય તુમહે રાજાલ હુળીખાંબાવોય ચોડવી દાંઉ?” મુખ્ય યાજકાંય જવાબ દેનો, “કૈસર રાજા સિવાય આમે બિજો રાજા કાદો નાંય હેય.”

16 તોવે પિલાત રાજાય ઈસુલ હુળીખાંબાવોય ચોડવી દાંહાટી અ્યાહાન હોઅપી દેનો.

હુળીખાંબાવોય ચોડાવના

(માથ્થી 27:32-44; માર્ક 15:21-32; લુક. 23:26-43)

17 તોવે સીપાડાહાય ઈસુવાલ તાબામાંય લેદો એને અ્યાહાય અ્યાલ હુળીખાંબ પોતે ઉસલાડ્યો એને ચેરૂસાલેમ શહેરા બાઅા “ખોપરીયે જાગો” આખે તાં લેય ગીયા, જ્યાલ હિબ્રુ ભાષામાય ગુલગથા આખતેહે.

18 તાં આહાય આલ એને આઆરે બિજા બેન માઅહાન હુળીખાંબાવોય ચોડવી દેના, ચેકાન્યે ચોક એને ચેકાન્યે ચોક, એને વોચ્યે ઈસુલ.

19 એને પિલાત રાજાય ઈસુ ટોલપી ઉચે હુળીખાંબાવોય ચોક દોષા પત્ર લાવી દેની, આમાય એહેકોય લોખલાં આતા, “નાજરેત ગાવામાઅને ઈસુ ચહૂદીયાહા રાજા.”

20 દોષા પત્ર બોજ ચહૂદીયાહાય વાચી કાહાકા તો જાગો જાં ઈસુવાલ હુળીખાંબાવોય ચોડવ્યેલ તો ચેરસાલેમ શેહેરા પાહીજ આતો, એને પત્ર હિબ્રુમાય એને લતીની એને યુનાની ભાષામાય લોખલાં આતા.

21 તોવે ચહૂદીયાહા મુખ્ય ચાજકાહાય પિલાત રાજાલ આખ્યાં, “ચહૂદીયાહા રાજા, એહેકોય મા લોખહે બાકી આય પોતાલ ચહૂદીયાહા રાજા આખ્યાં, એહેકોય લોખજે.”

22 પિલાત રાજાય આખ્યાં, “માચે જીં લોખ્યાં તી નાંચ બોદલાય.”

23 જોવે સીપાડા ઈસુવાલ હુળીખાંબાવોય ચોડવી ચુક્યા, તો આ ડોગલે લેઈને ચાર ભાગ કોઅયા, ચારી સીપાડાહાય ચોકચોક ભાગ વાટી લેદો, એને ઝોબો બી લેદો, બાકી ઝોબો હિલાઈ વોગાર ઉચરે નિચે લોગુ વિઅલો આતો.

24 ચાહાટી સીપાડાહાય ચોકાબીજાલ આખ્યાં, “આપા ચાલ ચીઈતા, બાકી કા ઓરી તી ચિઠ્ઠી ટાકીન નોક્કી કોઅતા” એહેકેન ચાહાટી જાયા કા પવિત્રશાસ્ત્રમાય લોખલાં હેય તી પુરાં ઓઅે, “આહાય મા ડોગલે વાટી લેદે એને મા ઝોબા હાટી ચિઠ્ઠી ટાકી.”

ઈસુવા આયહેહાટી સમાધાન

25 તોવે સીપાડાહાય એહેકેનુજ કોઅયા, બાકી ઈસુવા હુળીખાંબા પાય આ આયહો એને આ આયહે બોઅહી મરિયમ જીં કલોપાસા થેઅઈ આતી, એને મરિયમ જીં મગદલેના શેહેરા આતી, ચ્યો ઉબલ્યો આત્યો.

26 ઈસુવે આ આયહેલ, એને આ શિષ્યાલ જ્યાલ તો પ્રેમ કોઅતો આતો પાહી ઉબલે દેખીન, ઈસુવે આ આયહેલ આખ્યાં; “આયા, એઅે, ઓજ તો પોહો હેય.”

27 તોવે ય્યા શિષ્યાલ આખ્યાં “એએ, ઈ તો આયોહો હેય” એને એજ સમયથી તો શિષ્ય, મરિયમેલ ય્યા કુટુંબમાય લેય ગીયો.

કામ પુરાં કોઅના

28 ય્યા પાછે ઈસુય એહેકોય જાંઆઈન કા ય્યાય ય્યા બોદા કામ પુરાં કોઈ દેનલા હેય, યાહાટી કા પવિત્રશાસ્ત્રામાય લોખલાં તી હાચ્યાં સાબિત ઓએ, ઈસુવે આખ્યાં; “માન પીહી લાગહી.”

29 તાં ચોક ખાટાકોય બોઅલાં વાહાણા થોવલાં આતા, યાહાટી કાદે તેરી દાંહાદી જાયને, દારાખા ખાટામાય બુડાવાલા અજોબ જાડા હોટી વોય થોવિન ઈસુવા મુંચાલ લાવ્યાં.

30 જોવે ઈસુય ખાટા ચાખ્યાં, તોવે આખ્યાં, કા “પુરાં ઓઈ ગીયા” એને ટોલપી નોમાવીન મોઅઈ ગીયો.

ભાલે કોઈ ડોચી દેઅના

31 આમી ઓ તિયારી દિહી આતો, એને આગલો દિહી આરામા દિહી એને પાસ્કા સણા દિહી બી આતો, ઓ યહૂદી લોકહાહાટી ચોક ખાસ દિહી આતો, એને ય્યાહા મોરજી નાંચ આતી કા એ દિહે ય્યા તીન્યાહા કુડયો હુળીખાંબાવોય રોય, યાહાટી યહૂદીયાહાય પિલાત રાજાલ આખ્યાં, કા ય્યા પાગ મૂડી દેનલા જાય, યાહાટી કા તો જલદી મોઅઈ જાય, એને કુડયો નિચે ઉતાડી હોકે.

32 યાહાટી સીપાડાહાય ચેયન ઈસુવાઆરે જ્યા હુળીખાંબાવોય ચોડાવલા આતા ય્યાહા પાગ મૂડી ટાક્યા, પેલ્લા ચોકા એને પાછે બિજા બી મુડ્યા.

33 બાકી જોવે ય્યા ઈસુવાપાય ચેના, તોવે ય્યાલ મોઅલો દેખ્યો, યાહાટી ય્યા પાગ નાંચ મુડ્યા.

34 બાકી ચોક સિપાડાય ય્યા પાહાળામાય ભાલો ડોચી દેનો, એને તારાત ય્યામાઅને લોય એને પાઆય નિંગી ચેના.

35 જ્યા માટડાય ઈ બોદા દેખ્યા, ય્યાય સાક્ષી દેનહી, કા તુમાબી ઈસુવોય બોરહો કોએ. એને ય્યા સાક્ષી હાચ્યી હેય, એને તો જાંઅહે કા તો હાચ્યાં બોલહે.

36 યો વાતો યાહાટી જાયા કા પવિત્રશાસ્ત્રમાય લોખલાં હેય તી હાચ્યાં ઓએ, કા “ચ્યા યોકબી આડકાં મૂડી નાંય ટાકી.”

37 એને પાછી પવિત્રશાસ્ત્રમાય લોખલાં હેય, કા “જ્યાલ ચ્યાહાય ભાલો ડોચી દેનો, ચ્યાલ ચ્યે એઅરી.”

યોસેફ કોબારેમાય ઈસુવાલ ડાટના

(માથ્થી 27:57-61; માર્ક 15:42-47; લુક. 23:50-56)

38 યે વાતહે પાછે અરીમતિયા ગાવા યોસેફ, જો ઈસુવા શિષ્ય આતો, બાકી યહૂદી આગેવાનહા દાકે યે વાતેલ ગુપ્તમાય રાખતો આતો, ચ્યાય પિલાત રાજાપાય ઈસુવા કુડી લેય જાઅના માગણી કોઅચી, કા આંય ઈસુવા કુડી લેય જાવ, પિલાત રાજાય ચ્યા વિનાંતી વોનાયને કુડી લેય જાં પરવાનગી દેની, એને યુસુફ યેયન ઈસુ કુડી લેય ગીયો.

39 નિકોદેમુસ બી, જો પેલ્લા ઈસુવાપાય રાતી ગીઅલો આતો, એલવા બેખાળલો લગભગ તેત્રીસ કિલો ગંધરસ લેય યેનો.

40 તોવે ચ્યાહાય ઈસુ કુડી લેદી એને યહૂદી લોકહા ડાટના રીવાજ પરમાણે સુગન્દિત દ્રવ્ય ચોપડયા એને ફાડકામાય ચોડાવ્યા.

41 આમી ઈસુવાલ જાં હુળીખાંબાવોય ચોડાવલો આતો, તાં પાહીજ યોક વાડી આતી, એને તી વાડીમાય યોક નોવી કોબાર આતી, ચ્યેમાય પેલ્લા કાદાલ નાંય થોવ્યેલ.

42 યાહાટી ચ્યાહાય ઈસુવા કુડી ચ્યેજ કોબારેમાય થોવી દેના, કાહાકા તી પાહાય આતી, એને તો યહૂદીયાહા આરામા તિયારી દિહી બી આતો.

20

ખાલી કોબાર

(માથ્થી 28:1-10; માર્ક 16:1-8; લુક. 24:1-12)

1 રવિવારે બોજ કોવાળ્યાં આજુ આંદારાં આતા તોવે મરિયમ જી મગદલા નાંવા શેહેરામાઅને આતી, કોબારે એછે ગીચી, તોવે દેખ્યાકા કોબારે મુયાઇહીને દોગાડ પેલ્લોજ હોરકાવલો હેય.

2 તોવે તી સિમોન પિત્તર, એને એલો બિજો શિષ્ય જ્યાલ ઈસુ પ્રેમ કોઅહે ચ્યાહાપાય દાંહાદી ગીચી, એને ચ્યાહાન ચ્યે આખ્યાં,

“કોબારેમાઅને પ્રભુ કુડીલ કાડી લેય ગીયે, એને આમા નાંય જાંઆજે કા કેછ થોવ્યોહો.”

3 તોવે પિત્તર એને બિજો શિષ્ય કોબારે એછે ગીયા.

4 એને બેની શિષ્ય આરે-આરે દાંહા દેત, બાકી પિત્તરા કોઅતો તો બિજો શિષ્ય આગલા નિંગી ગીયો, એને કોબારેપાય પેલ્લો જાય પોઅચ્ચો.

5 એને ડોંગો વોળીન ફાડકે બુઇ પોડલે દેખ્યે, તે તો બિઇ ગીયો યાહાટી તો માજા નાંય ગીયો.

6 સિમોન પિત્તર ચ્યા પાહલા યેનો એને પાદરોજ કોબારેમાય ગીયો એને ચ્યે તો ફાડકે પોડલે દેખ્યે.

7 એને ઈસુવા ટોલખેલ વેટાળલો રુંબાળ બી દેખ્યો, બિજા ફાડકાહા આરે નાંય, બાકી આલાગુજ જાગાવોય ગોડી વાળલો દેખ્યો.

8 પાછે બિજો શિષ્ય જો કોબારેપાય પેલ્લો જાઈ પોઅચ્ચેલ તોબી માજે ગીયો એને ઈ એઇન કા ઈસુ મોઅલાહામાઅને જીવતો ઓઈ ગીયહો બોરહો કોઅયો.

9 પવિત્રશાસ્ત્રમાય ઈસુ બારામાય ઈ લોખલાં આતા કા ઈસુ મોઅલા માઅને પાછો જીવતો ઉઠી, બાકી ચ્યાહાન આજુ લોગુ નાંય હોમજાલા આતા.

10 તોવે ચ્યા શિષ્ય પાછા ચ્યાહા ગોઓ વોળી ગીયા.

મરિયમ મગદલા દર્શન

(માર્ક 16:9-11)

11 બાકી મરિયમ રોડતીજ કોબરે પાહી બાઆ ઉબી રોયી એને રોડતી-રોડતી કોબરે એછે ડોંગી પોડીન,

12 બેન હોરગા દૂતહાન ઉજળેકુલ ડોગલે પોવલા ચોક ટોલખેએહે એને ચોક પાગહાહે બોઠલા દેખ્યા, જાં ઈસુવા કુડી થોવલી આતી.

13 ચ્યાહાય ચ્યેલ આખ્યાં, “બાઈ તું કાહા રોડતીહી?” ચ્યેય ચ્યાહાન આખ્યાં, “ચ્યે મા પ્રભુ કુડી લેય ગીયા એને આંય નાંય જાંઉ કા ચ્યાલ કેછ થોવ્યોહો.”

14 ઈ આખીન તી પાહલા ફિરી યેની એને ઈસુલ ઉબલો દેખ્યો એને નાંય વોળખ્યો કા ઓ ઈસુ હેય.

15 ઈસુવે ચ્યેલ આખ્યાં, “ઓ બાઈ તું કાહા રોડતીહી? કાલ હોદતીહી?” ચ્યેય વાડીવાળો હોમજીન ચ્યાલ આખ્યાં, “ઓ સાયબ,

જો તું ચાલ ઇસી લેય ગીયો તોવે ચાલ કેઇ થોવ્યા તીં માન આખ, એને ચાલ આંય લેય જાહીં.”

16 ઇસુવે ચ્યેલ આખ્યાં, “મરિયમ!” ચ્યેય પાહલા ફિરીન ચાલ હિબ્રુનીમાય આખ્યાં, “રબ્બુની મતલબ ઓ ગુરુજી.”

17 ઇસુવે આખ્યાં, “તું માન દોઅહે મા? આજુ લોગુ આંય આબાઇહી ઉચે નાંય ગીયહો, બાકી તું મા શિષ્યહાપાય જાયને ખોબાર આખ, કા જો મા આબહો હેય તો તુમહે આબહો હેય, એને જો મા પોરમેહેર હેય તો તુમહે પોરમેહેર હેય, ચ્યાપાય આંય ઉચે જાતહાવ.”

18 તોવે મરિયમ જી મગદલેના શેહેરા આતી જાયને શિષ્યહાન આખ્યાં કા, “માયે પ્રભુલ દેખ્યો એને ચ્યે મા આરે વાતો કોઅયો.”

શિષ્યહા વોચમાય ઇસુવા દર્શન

19 ચ્યાજ રવિવારે વોખાતે બોદા શિષ્ય બેગા જાયા, એને ચ્યાહાન યહૂદી આગેવાનહા દાક આતી, યાહાટી ચ્યાહાય બાઅણા બંદ કોઇ લેદલા આતા, તોવે ઇસુ માજે યેનો એને વોચમાય ઉબો રોયન આખ્યાં, “તુમહાન શાંતી મીળે.”

20 ઈ આખીન પાછે તો ચ્યાહાન ચ્યા આથ એને પાહાળા દેખાડ્યાં, એને શિષ્યહાય પ્રભુલ એઅયો એને બોજ આનંદિત ઓઅયા.

21 તોવે ઇસુવે પાછા ચ્યાહાન આખ્યાં, “તુમહાન શાંતી મીળે. જેહેકેન આબહે માન દુનિયામાય દોવાડયો તેહેકેન આંય તુમહાન દુનિયામાય દોવાડતાહું.”

22 ઈ આખીન ચ્યાય ચ્યાહાવોય કુક્યા એને ચ્યાહાન આખ્યાં, “પવિત્ર આત્મા લા.

23 જ્યા કાદા પાપ તુમા માફ કોઅહા, ચ્યાહા પાપ માફ ઓઈ જાય, જ્યા કાદા પાપ તુમા નાંય માફ કોઅહા, ચ્યાહા પાપ નાંય માફ ઓઅય.”

એઅના એને બોરહો કોઅના

(માથ્થી 28:16-20; માર્ક 16:14-18; લુક. 24:36-49)

24 બાકી બાર શિષ્યહા માઅને ચોક એટલે થોમા જ્યાલ દિદુમુસ આખાય, જોવે ઇસુ યેનો, તોવે ચ્યાહાઆરે નાંય આતો.

25 જોવે બિજા શિષ્ય ચ્યાલ આખા લાગ્યા, “આમહાય પ્રભુવાલ દેખ્યો” તોવે ચ્યાય ચ્યાહાન આખ્યાં, “ચ્યા આથામાય ખીલા ઠોક્યાં ચ્યા જોખમા વોણ એઉ એને ખીલહા વોણામાય મા આંગળી થોવુ એને ચ્યા પાહાળામાય મા આથ ટાકીન એઇ નાંય લાવ, તાં લોગુ આંય નાંય બોરહો કોઉ કા તો મોઅલા માઅને જીવતો ઉઠયહો.”

26 યોક આઠવડયા પાછે ચ્યા શિષ્ય પાછા ગોઅમે આતા, એને થોમા ચ્યાહાઆરે આતો, એને બાઆણા બંદ આતા, તોવે ઈસુય ચેયન એને વોયમાય ઉબા રોયન આખ્યાં, “તુમહાન શાંતી મીળે.”

27 તોવે ચ્યાય થોમાલ આખ્યાં, “તો આંગળી ઈહીં લેય ચે એને મા આથ એએ, એને તો આથ દોઅો એને મા પાહાળામાય ટાક, એને શંકા કોઅના બંદ કોઅો, બાકી બોરહો કોઅો કા આંય જીવતો હેય.”

28 થોમાય જાવાબ દેનો, “અો મા પ્રભુ, અો મા પોરમેહેર.”

29 ઈસુવે ચ્યાલ આખ્યાં, “તુયે તે માન એઅયો તે તું બોરહો કોઅતોહો? ધન્ય હેય ચ્યે માન એઅયા વોગાર બોરહો કોઅતેહે.”

ઈ ચોપડી યોહાનાય કાહા લોખલી

30 ઈસુવે આજુબી બો બોદે ચમત્કારા કામ શિષ્યહા દેખતા કોઅયે, જું ચે ચોપડયેમાય નાંય લોખલે હેય;

31 બાકી ચે યાહાટી લોખલે હેય, કા તુમા બોરહો કોઅે, કા ઈસુજ પોરમેહેરા પોહો ખ્રિસ્ત હેય, એને ચ્યાવોય બોરહો કોઇન ચ્યા નાવાકોય અનંતજીવન મિળવા.

21

તીબીરીયા દોરિયા કોરાડા ઉપે ઈસુ શિષ્યાહાન દર્શન

1 ચે વાતહે પાછે ઈસુ પોતાલ તીબીરીયાસ દોરિયા મેરે ચ્યા શિષ્યહાન દેખાયો, એને ઈ એહેકેન જાયા.

2 સિમોન પિત્તર, થોમા જ્યાલ દિદુમુસ આખતેહે, ગાલીલ ભાગા કાના ગાવામાઅને નતનઅેલ, એને જબદયા બેન પાહા, એને ઈસુ બિજા બેન શિષ્ય, ચોખઠા આતા.

3 તોવે સિમોન પિત્તરે ચ્યાહાન આખ્યાં, “આંય માછલે દોઅરાં જાય રિયહો” ચ્યાહાય ચ્યાલ આખ્યાં, “આમા બી તોઆરે યાહુ” યાહાટી ચ્યા નિંગીન ઉડીમાય ચોડી ગીયા, બાકી ચ્યે રાતી ચ્યાહાય કાય નાંય દોઅયા.

4 આગલે દિહી હાકાળેહે કોવાળ્યાં ઈસુ દોરિયા મેરે ઉબલો આતો. તેરુંબી શિષ્યહાય ચ્યાલ નાંય વોળખ્યો કા ઓ ઈસુ હેય.

5 તોવે ઈસુવે ચ્યાહાન આખ્યાં, “ઓ પાહાહાય, કાય તુમહાપાય કાય ખાઅના હેય?” ચ્યાહાય જાવાબ દેનો, “નાંય.”

6 ઈસુવે ચ્યાહાન આખ્યાં, “ઉડી જમણે એછે જાળ ટાકાં, તે તુમહાન મિળી” તોવે ચ્યાહાય જાળ ટાકી, એને આમી બો બોદા માછલાહા લીદે જાળ તાણી નાંય હોક્યા.

7 યાહાટી ચ્યા શિષ્યાય જ્યાલ ઈસુ પ્રેમ કોઅે, તો સિમોન પિત્તરાલ આખ્યાં, “ઓ તો પ્રભુ હેય” પિત્તરે ઈ વોનાઈન કા પ્રભુ હેય, ડોગલાં પોવી લેદા જ્યે ચ્યાય માછલે દોઅતા સમયે કાડી થોવલે. એને પાઅયામાય કુદી પોડ્યો.

8 બાકી બિજા શિષ્ય ઉડીવોય બોહીન માછલાહાકોય બોઆલી જાળ તાણતા યેના, કાહાકા ચ્યા મેરાવોયને બોજ દુઉ નાંય આતા, લગભગ હોવ મીટર આતા.

9 જોવે ચ્યા મેરે યેના, તોવે ચ્યાહાય કોળસાહા આગ બોળતી એને આઅરા ઉપે માછલા થોવલાં, એને બાખે દેખ્યી.

10 તોવે ઈસુવે ચ્યાહાન આખ્યાં, “તુમહાય જ્યે માછલે આમી દોઅયેહે, ચ્યાહામાઅને વોછે માછલે લેતા યા.”

11 સિમોન પિત્તરાય ઉડીવોય ચોડીન ચોક હોવ ને ત્રેપૂન મોઠા માસલાહાકોય બોઆલી જાળ મેરાવોય તાણી. એને ઓલે બોદે માછલે આર્તે તેરુંબી જાળ નાંય ફાટી.

12 ઈસુવે ચ્યાહાન આખ્યાં, “યા, ખાઅના ખાં” એને શિષ્યહા માઅને કાદાલ ઈમાત નાંય જાયી કા, ચ્યાલ પુછે, “તું કું હેતો?” કાહાકા ચ્યાહાન ખોબાર આતી કા ઓ ઈસુજ હેય.

13 તોવે ઈસુવે બાખે લેઈને ચ્યાહાન દેની, એને તેહેકેન માછલે બી દેને.

14 ઈ તીજેદા હેય, ઈસુવે મોઅલા માઅને ઉઠયા પાછે ચ્યા શિષ્યહાન દર્શન દેના.

ઈસુવા પિત્તરા આરે વાત

15 ખાય ઉઠયા પાછે ઈસુવે સિમોન પિત્તરાલ આખ્યાં, “ઓ યોહાના પાહા સિમોન, યા બીજહા કોઅતો તું માન વોદારી પ્રેમ કોઅતોહો કા?” અ્યે આખ્યાં, “હાં પ્રભુ, તુલ તે ખોબાર હેય, આંય તુલ પ્રેમ કોઅતાહાંવ” ઈસુવે ચ્યાલ આખ્યાં, “મા ગેટહાન ચાચા.”

16 ઈસુવે આજુ બિજા દા ચ્યાલ આખ્યાં, “ઓ સિમોન યોહાના પોહા, કાય તું માન પ્રેમ કોઅતોહો?” પિત્તરે જવાબ દેનો, “હાં પ્રભુ તુલ ખોબાર હેય કા આંય તોવોય પ્રેમ કોઅતાહાંવ” ઈસુવે ચ્યાલ આખ્યાં, “મા ગેટહા રાખવાળી કોઓ.”

17 તીજા દા ઈસુવે આખ્યાં, “ઓ સિમોન યોહાના પાહા, કાય તું માયેવોય પ્રેમ કોઅતોહો?” પિત્તર મોનામાય દુઃખી જાયો, કાહાકા ઈસુ ચ્યાલ પાછા તીજા દા પુછ્યાં, કા તું માયેવોય પ્રેમ કોઅતોહો? એને ચ્યે ઈસુવાલ આખ્યાં, “ઓ પ્રભુ, તુલ તો બોદી ખોબાર હેય, આંય તુલ પ્રેમ કોઅતાહાંવ તી તુલ ખોબાર હેયેજ” ઈસુવે ચ્યાલ આખ્યાં, “મા ગેટહાન ચાચા.”

18 આંય તુલ હાચ્યાં-હાચ્યાં આખતાહાવ, જોવે તું જુવાન આતો, તોવે તું કોંબાર બાંદિન, જાં મોન ગોમે તાં જાંઉ આતો, બાકી જોવે તું ડાઆયો ઓઈ જાહે તોવે તો આથ આગાડી કોઅહે એને બિજો તો કોંબાર બાંદિન તુલ નાંય ગોમે તાં લેય જાય.”

19 ઈસુય ઈ આખાહાટી આખ્યાં, કા પિત્તર કેહેકેન મોઅરી એને પોરમેહેરાલ મહિમા કોઅરી, એને એહેકોય આખીન ચ્યાલ આખ્યાં, “મા શિષ્ય બોની રો.”

ઈસુ એને ચ્યા પ્રિય શિષ્ય

20 પિત્તર ફિરી વોળીન ચ્યા શિષ્યાલ પાહલા ચેતો દેખ્યો, જ્યાલ ઈસુ પ્રેમ કોઅતો આતો, જ્યે ખાઅના ખાતે સમયે ઈસુવા એછે ડોંગો પોડીન પુછ્યાં, “ઓ પ્રભુ, તુલ દોઆડી દેનારો કું હેય?”

21 ચ્યાલ એઇન પિત્તરે ઈસુવાલ આખ્યાં, “ઓ પ્રભુ, ચ્યા કાય ઓઅરી?”

22 ઈસુવે ચ્યાલ આખ્યાં, “જો મા ઇચ્છાકોય તો આંય પાછો ચીહીં તાંવ લોગુ તો જીવતો રોય, તે તુલ કાય? તું મા શિષ્ય બોની રો.”

23 યાહાટી વિસ્વાસ્યાહામાય ઈ વાત ફેલાઈ ગીયી, કા તો શિષ્ય નાંય મોએ, તેરુંબી ઈસુય ચ્યાલ ઈ નાંય આખ્યાં, કા ઓ નાંય મોઅરી, બાકી ઈ આખ્યાં, “જો મા ઇચ્છાકોય તો આંય પાછો યીહીં તાંવ લોગુ તો જીવતો રોય, તે તુલ કાય?”

પુરાં ઓઅના

24 ઓ તોજ શિષ્ય હેય, જો યે વાતહેબારામાય સાક્ષી દેહે, એને જ્યાંય યે વાતહેબારામાય લોખલાં હેય, એને આમહાન ખોબાર હેય કા ચ્યા સાક્ષી હાચ્ચી હેય.

25 ઈસુવે આજુબી બો બોદે ચમત્કારા કામે કોઅયે, જો તીં બોદા લોખલાં જાતા, તોવે બોદી દુનિયામાય બી ચ્યે ચોપડયેહેન સાંભાળાહાટી ઓલો જાગો નાંય રોતો જ્યે લોખલે જાતે.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d